


3204



1920

ԱՐԳԵՒ ԵՊԽԱԿՈՒԹՈՒ

1006

184

9(47.925)

4-59

Այ.

ՔԱԶՆ-ՎԱՐԴԱՆ

ԿԵՆՍԱԳՐՈՒԹԻՒՆ

ՀԱՅՈՑ ՄԵՇ ՍՊԱՐԱՊԵՏ ԿՈՐՈՎԻՆ ԵՒ ԿԱՐՄԻՐՆ

ՎԱՐԴԱՆ ՄԱՄԻԿՈՆԵԱՆԻ

Ե Ի

ՊԱՏՄՈՒԹԻՒՆ ՎԱՐԴԱՆԱՑ

ՊԱՏԵՐԱԶՄԻՆ

ԸՍՏ ԵՂԻՇԵՒ

Ե Ի

ԱՅԼԵՒԱՑԼ ՈՒՍՈՒՄՆԱՍԻՐՈՒԹԻՒՆՔ

ՎԱՐԴԱՆԱՑ ՊԱՏԵՐԱԶՄԻՆ ՎՐԱՅ

Գրեց

ԲԱԲԳԵՆ ԵՊԻՍԿՈՊՈՍ

ԽԵՆ. Կառլույան. Բաբգէն.

1920

ՊՈՍՈՆ

9768

25892. հ. Հ.

ՏՊԱՐԱՆ «ԱԶԳԻ»
1000 օրինակ միայն տպուած

4819-56



(384) 40

Զ Օ Ն

ՀԱՅՈՑ ՄԵԾ ԱՍՊԵՏ ԵՒ ՍՊԱՐԱՊԵՏ

Ք Ա Զ Ն - Վ Ա Ր Դ Ա Ն Ի

ԱՆՁԻՆ ԵՒ ԳՈՐԾԻՆ

ՆՈՒԻՐԵԱԼ ԱՅՍ ԳՐՔՈՅՎՔ ԿԸ ԶՈՆԵՄ

ԲՈՂՈՐ ԱՆՈՆՑ, ՈՐ ԿԸ ՆԵՐԾՆՉՈՒԻՆ

ԱԻԱՐԱՑՐԻ ԴԻՒՑԱԶՆԻՆ ԱՍՊԵՏԱԿԱՆ ՈԳԻՔՆ,

ԱՆՈՐ ԱՐԻԱԿԱՆ ՈՒ ՔՐԻՍՏՈՆէԱԿԱՆ ՆԿԱՐԱԳՐԻՆ,

ԵՒ

ԿԸ ՆԱՌԱՅԵՆ ԻՐԵՆՑ ԱԶԳԻՆ

Մ Ա Ք Ո Ւ Ր Ա Ն Զ Ն Ո Ւ Ի Ր Ո Ւ Թ Ե Ա Մ Բ,

ԱՍՊԵՏԱԿԱՆ ՎԵՀԱՆՁՆՈՒԹԵԱՄԲ,

ԵՒ

ՆԱՌԱՅՈՒԹԵԱՆ ԲԱՐՁՐ ԳԻՏԱԿՑՈՒԹԵԱՄԲ,

ԱՐԱՐԱՏԻՆ ՄԻՆՉԵՒ ՏԱՐՈՍ

ԵՒ

ՄԵՐ ԲՆԱՇԽԱՐՀԵՆ ՀԵՇԻ ԳԱՂՈՒԹՆԵՐՈՒ ՄԷԶ:

ԲԱԲԳԵՆ ԵՊԻՍԿՈՊՈՍ

2004

ԲՈՎԱՆԴԱԿՈՒԹԻՒՆ

Էջ

Զ Օ Ն

ՇԱՐՍԿԱՆ ՎԱՐԴԱՆԱՆՑ (Արիացեալֆ)	Ա—Զ
ՅԱՌԱՋԱԲԱՆ	
ՔԱԶՆ-ՎԱՐԴԱՆԻՆ ՑԱՅՏԱՐԱՐՈՒԹԻՒՆԸ ՑԱԶԿԵՐԸ	
Բ.Ի ԱՌՋԵՒ ԵՒ ԻՐ ԽՈՐՃՐԴԱՀՈՐ ՈՒԽՏԸ	1
ՎԱՐԴԱՆԻՆ ԾԱԳՈՒՄԸ (Մամիկոնեալֆ)	3
ՄԱՄԻԿՈՆԵԱՆՑ ԿԱԼՈՒԱԾՆԵՐԸ	8
ՄԱՄԻԿՈՆԵԱՆՑ ՆԿԱՐԱԳԻՐԸ	10
ՄԱՄԻԿՈՆԵԱՆՑ ՊԱՏՄՈՒԹԻՒՆԸ	16
ՎԱՐԴԱՆԻՆ ԾՆՈՒՆԴԸ	18
ՎԱՐԴԱՆԻՆ ԿՐԹՈՒԹԻՒՆԸ	19
ՀԱՅ ԶԻՆՈՒՈՐՈՒԹԻՒՆԸ ԵՒ ՄԱՄԻԿՈՆԵԱՆՑ	22
ՎԱՐԴԱՆ՝ ՍՏՐԱՏԵԼԱՏ	26
ՄՊԱՐԱՊԵՏՈՒԹԵԱՆ ՆՇԱՆԱԿՈՒԹԻՒՆԸ	31
ՎԱՐԴԱՆԻՆ ԱՌԱՋՆԱՑՈՒՄԸ ՄՈԿԱՅ ԼԵԲՆԵ- ՐՈՒՆ ՄԵԶ	32
ՎԱՐԴԱՆԻՆ ԳԵՐԴԱՍՏԱՆԸ	37
ՎԱՐԴԱՆԻՆ ՆԱՀԱՏԱԿՈՒԹԻՒՆԸ	39
ԱԻԱՐԱՅՐԻ ՊԱՏԵՐԱԶՄԸ	50
ՎԱՐԴԱՆԻՆ ԱՐԺԱՆԻՔԸ	53
ԶՈՒԳԱԿՇԻՐ ՔԱԶՆ-ՎԱՐԴԱՆԻՆ ԵՒ ՎԱՏՆ ՎԱՍԱԿԻ	56
ՎԱՐԴԱՆԱՆՑ ՊԱՏԵՐԱԶՄԸ ԸՍՏ ԵՂԻՇԵՒ	
ՆԱԽԵՐԳԱՆՔ	58
ԱՌԱՋԻՆ ՑԵղԱՆԱԿ	60
ԵՐԿՐՈՐԴ »	62
ԵՐՐՈՐԴ »	65
ՉՈՐՐՈՐԴ »	68
ՀԻՆԳԵՐՈՐԴ »	70

ՎԵՑԵՐՈՐԴ ՅԵՂԱՆԱԿ	74
ԵՕԹՆԵՐՈՐԴ »	78
ՈՒԹԵՐՈՐԴ »	88
ԴԱՐՁԵԱԼ ՎԱՍՆ ԽՈՍՏՈՎԱՆՈՂ ԱՇԱԿԵՐՏԱՅ	
ՆՈՅՈՒՆՅ	94
ԱՆՈՒԱՆՔ ՆԱԽԱՐԱՐԱՅՆ ՈՐՔ ԿԱՄՈՔ ԵԻ ՅՈԺԱ-	
ՐՈՒԹԵԱՄԲ, ՎԱՍՆ ՍԻՐՈՅՆ ՔՐԻՍՏՈՍԻ Ե-	
ՏՈՒՆ ԶԱՆՁԻՆ Ի ԿԱՊԱՆՍ ԱՐՔՈՒՆԻ	98
ՏԻԿՆԱՅՔ ՓԱՖԿԱՍՈՒՆՔ ՀԱՅՈՅ ԱՇԽԱՐՀԻՆ	104
ԴԱՍԵՐ ՎԱՐԴԱՆԱՆՅ ԵԻ ՎԱՀԱՆԵԱՆՅ ՊԱՏԵ-	
ՐԱԶՄՆԵՐԵՆ	109
ՎԱՐԴԱՆԱՆՅ ՊԱՏԵՐԱԶՄԸ (Նոր Տեսութիւններ)	137
ՎԱՐԴԱՆԱՆՅ ՊԱՏԵՐԱԶՄԻՆ ՏԵՂ	150
ԹԱՆԿԱԳԻՆ ՅԻՇԱՏԱԿԱՐԱՆ ՄԸ	156

ԿԱՐԵՒՈՐ ՈՒՂՂԵԼԻՔՆԵՐ

Էջ 32, Ծանօթութեան առաջին երկու տողերը
ուղել այսպէս.

— Աւելի նիշդ է ըսել, Արտաշէսի գահազրկու-
թենէն երեք չորս տարի ետքը, 431-32ին, եվն։

Էջ 57, տող 11, «Վասակ, արիացած է»ի տեղ պի-
տի ըլլայ՝ «Վարդան արիացած է»։

ՇԱՐԱԿԱՆ ՎԱՐԴԱՆԱՅ


Ս Տ Ե Ղ Ի


ԴԿ.

Արիացեալք առ հակառակն, քաջութեամբ առ-
նուլ ըզկրէժ խարկութեան. հանճարեղք 'ի հատու-
ցումըն դաւանացն զամբարըշտացն արդարադատ
չափրմամբ. Զօրականք յաղթողք, պըսակեալք 'ի
Քրիստոսէ։

Փոխանակեալք գունայնութիւնս ընդ նըշմարիտ
յուսոյ անմահութեանն. փափաքանաց ձերոց առիք
ըզկատարումն, մաքրիլ արեամբ յաղտոյ մեղաց տրդ-
մոյ. Զօրականք յաղթողք, պըսակեալք 'ի Քրիստոսէ։

Հայցեցէ՛ք զլսաղաղութիւնն, նըշմարիտ վըկայք
Սըրբոյ Երբարդութեան, նեղելոցն յանօրինաց բըռ-
նութենէ. զի ցընծացուք յաղթանակաւ մարտի ձե-
րոյ. Զօրականք յաղթողք, պըսակեալք 'ի Քրիստոսէ։





ՅԱՌԱՋԱԲԱՆ

ՎԱՐԴԱՆԱՆՑ ՊԱՏԵՐԱԶՄԸ մեր Ազգային Պատմութեան այն դրուագներէն է, որանց պէտք է ոք լա՛ւ ծանօթանայ Հայ ժողովուրդը:

Այս գրքոյկը գրուած է, որպէս զի այդ ծանօթիւնը նշգրիտ ու հարազատ կերպով մատչելի ըլլայ մեր ժողովուրդին:

Ստոյգ է որ Վարդանանց Պատերազմէն ասդին մեր Ազգը հազար տեսակ պատերազմներու մէջ մտաւ ելաւ իր գոյութիւնը պահպանելու համար. ստոյգ է որ 451-էն մինչեւ 1920, հազար չորս հարիւր վարսուն ինը տարիներու ընթացքին՝ մեր ժողովուրդին մտածելու, զործելու կերպերն ու պայմանները նոյն չմնացին. ստոյգ է որ 1895-էն ի վեր մանաւանդ մեր ժողովուրդը անցաւ քաղաքական այնպիսի տագնապներէ, որոնք նախընթաց չունին. ստոյգ է որ այդ տագնապներուն եւ հալածանեներուն մէջ մեր ազգը ծնաւ բազմաթիւ նոր Վարդաններ, նոր Վահաններ, նոր Ղեւննի Երեցներ, նոր Սահակ Ռշտունիններ, ինչպէս նաև նոր նոր Վասակներ եւ Գդիկնեններ. վերջապէս ստոյգ է, որ այս բոլոր նորագոյն դէպքեր եւ իրողութիւններ սիրու չեն թողուր մեր ներսը, որ մոռնանք ներկայ անողոք իրականութիւնը եւ ելլենք գրադինք շա՞տ իին անցեալի մը պատմութիւններով...: — Եւ սակայն, ստոյգ է նաև որ մենք ուզեցնեմ, Վարդանանց Պատերազմն է, որ կ'արձանանայ շէն կոքողի մը պէս մեր ազգային բոլոր տագնապներուն, բոլոր հալածանեներուն, բոլոր

քաջագործութիւններուն, բոլոր ինքնապաշտպանութեան շարժումներուն եւ բոլոր ազատագրական պատմութիւններուն սկիզբն ու գլուխը:

Եւ ամէն տարի, երբ Սրբոց Վարդանանց Զօրավարաց Տօնը կու գայ, Հայ ժողովուրդը կը խանդավառի — որովհետեւ մեր ազգային ողջմոռթեան, մեր ազգային ազատ գոյութեան գլուխցութեան տօնին դարադարձն է որ կու գայ:

Ամերիկայի Հայոց մէջ կա'ն այնպիսիներ, որ կը մոլորին Վարդանանց Պատմութեան մէջ, եւ գրչով ու խօսքով կ'եղծեն այդ ազգային, այդ հայացի շարժման պատմական նկարագրին ամէնէն քնիկ եւ ամէնէն գեղեցիկ գիծերը, և այսպէս՝ անհաւելի մեղքեր կը գործեն ընդդեմ պատմական նշմարտութեան:

Ես 1914 Հոկտեմբերի 22-ին ոտք դրի նոր Աշխարհիս հողին վրայ, եւ այդ բռնականէն ի վեր ամէն տարի, Վարդանանց Տօնին առքիւ, բան մը գրեցի թերթերու մէջ եւ խօսեցայ թեմերու վրայ, երկու որոշ նպատակով. նախ՝ ներկայացընել այդ իրողութիւնը ինչպէս որ է պատմութեան մէջ, եւ յետոյ՝ Վարդանանց ոգտով տոգորել մեր ժողովուրդը:

Շատ ուրախալի երեւոյք մըն է արդարեւ, որ Ամերիկայի Հայութեան մէջ կա'ն հետաքրքիրներ, որոնք կը փափաքին ո՛չ միայն լաւ սորվիլ Վարդանանց Պատերազմին պատմութիւնը, այլ նաև կը հիանան Քաջն-Վարդանի ասպետական վեհաճնութեան, արիական հայրենասիրութեան եւ հաւատարիմ քրիստոնութեան վրայ, եւ կ'ուզեն որ այդ ոգտով ու նկարագրով դաստիարակուի Հայութիւնը:

Այս տարի, 1920, Շիքակօ էի, երբ վրայ հասաւ Վարդանանց Տօնը: Հոյլ մը բարեկամներ առաջար-

կեցին ինձ, որ դասախոսութիւն մը ընեմ այդ առքիւ: Ընդունեցի առաջարկը եւ այդ նպատակով պատրաստեցի Քաջն-Վարդանի կենսագրութիւնը եւ կարդացի զայն՝ Փետր. 16, ԲՇ. գիշեր անոնց ընտիր հաւաքոյթին առջեւ:

Շատ բան գրուած եւ խօսուած է Վարդանանց Պատերազմին վրայ. բայց այդ պատերազմի Սպարապետին կեանքը անծանօթ է առհասարակ, եւ շատեր ու շատեր Աւարայրի պատերազմով միայն կը նանչնան Մամիկոննեան Զօրավարը: Մինչ այս մեծ եւ նորահրաշ Զինուորը՝ բարձր կրթութեամբ օժտուած եւ հոյակապ գործունեութեամբ փառաւորուած վարսուն գարուններու ժպիտներով ու քերեւութեամբ կը գուարքանայ Տղմուտի ափնրուն մօտ, ի նիւս ներմակ եւ օդապարիկ երիվարին:

Այդ կենսագրութիւնը հետզհետէ կարդացի նաեւ Ուստր, Փետր. 29, Կիր. գիշեր՝ երապարակային ժողովի մը մէջ, եւ Մարտ 16, ԳՇ. գիշեր, Պոստոն, դարձեալ ընտիր հաւաքոյթի մը առջեւ, որոնց երկուուն ալ սարքուած էին ի յիշատակ Սրբոց Վարդանանց Զօրավարաց, եւ Քաջն-Վարդանի կեանքին վրայ ափուուած այս լոյսեր այնքան հանելի եւ կրթիչ տպաւորութիւն մը ըրին ունկնդիրներու վրայ, որ նայն իսկ անոնց բաղանենով որոշեցինք երաստակել զայն եւ մատչելի ընել ժողովրդեան:

Ես 1908-ին երատարակած եմ քննական ուսումնասիրութիւն մը Եղիշէի Վարդանանց Պատերազմի Պատմութեան վրայ, որ զուտ բանասիրական ու պատմագիտական գործ մըն է, գրուած մասնագէտներու համար:

Քաջն-Վարդանի այս կենսագրութիւնը զրուած է այդ գործին ֆննական արդեանց համաձայն, ինչ ինչ նորագոյն յաւելուածներով :

Եւ որովհետեւ Քաջն-Վարդանը կենսագրելու ատեն՝ նպատակս եղած էր ո'չ միայն Աւարայրի պատերազմին Հրամատարը ծանօթացնել, այլ նաև ի վեր հանել այդ պատերազմին նշանակութիւնը, ասոր համար Քաջն-Վարդանի կենսագրութեան կցորդեցի ԵղիՇի Վարդանանց Պատմութեան շատ խիտ մէկ ամփոփումը, ինչպէս նաև ուրիշ յօդուածներ, գորս զրած եմ Ամերիկա հասնելէս ի վեր — քիչ մը յառաջ ալ դիտել տուի արդէն — Վարդանանց Զօրավարաց Տօնին առթիւ :

Թէ՛ կենսագրութիւնը եւ թէ՛ այս անջատ նիւթեր զրուած են ժողովրդեան համար, պատմութեան հաւատարիմ ոգուվ եւ ոնով, եւ ամէնքը միասին կը կազմեն զրեք-է ամբողջութիւնը այն բոլոր նիւթերուն եւ խնդիրներուն, որ կարեւոր են Քաջն-Վարդանի կեանքը եւ Աւարայրի Պատերազմը շիտակ հասկընալու համար :

Ես, որ քան հինգ տարիէ իվեր ֆննասիրութեանս նիւթ եմ զրած մեր ազգային պատմութեան Ե. Ք. Դարուն այս փառաւոր դէպքը, տեսակ մը նուիրական պարսէ եւ իրաւունք կը համարիմ ինձ խնդրել ընթերցողներէս, որ սիրով եւ ուշի ուշով կարդան այս գրքոյկը, եւ ըստ այնու սորվին եւ իրացնեն պատմութեան հարազատ դասերը :

Դժբախտաբար մեր ժողովուրդը առ հասարակ չփոխեր իր ազգային պատմութեան դասերը :

Եթէ մենի՞ Հայերս՝ լաւ եւ շիտակ սորված ըլլային մեր Ազգին Պատմութիւնը, այսօր, հաւատա-

ցէ՛ք, տարբեր առաւելութիւններով եւ յաջողութիւններով կ'Ելլէինք 1915-ի հայկական հալածանքներու արհաւիրքներէն, որոնց ենթարկուեցաւ մեր Ազգը Եւրոպական մեծ պատերազմի պատճառաւ :

Այսպիսի պատմական աւտոմենասիրութիւններ գրելու ատեն իմ ջանքս եղած է սա' ծառայութիւնը ընել իմ հայրենակիցներուն, որ անոնք դիւրին դիւրին սորվին եւ լա՛ւ սորվին մեր ազգային պատմութեան դասերը :

Եւ պէտք է խնամքով դիտել տամ, որ Վարդանանց Պատերազմին դասը այդ դասերուն գլխաւորն է եւ պարտաւորիչը :

* * *

Վարդանանց Պատերազմին պատմութիւնը թերի կը մնայ, եք-է այն զատուի Վահանեանց Պատերազմին Պատմութենէն : Այս է պատճառը, որ Վահանեանց շարժման կարեւորութիւնը եւ ատոր վերաբերեալ խնդիրները յանախ շեշտեցի եւ ի վեր հանեցի այս գրքոյկին մէջ :

Ինչպէս ԱՒԱՐԱՅՐ Վարդանանց Պատերազմին մէջ, նոյնպէս ՆՈՒԱՐՍԱԿ Վահանեանց դիմադրութիւններու ելքին վրայ՝ ա'յնպիս հանգրուաններ են, որոնց անուններն ու թուականները պէտք է որ ամէն Հայ գիտնայ ջուրի պէս :

451 Աւարայրի Պատերազմին եւ Քաջն-Վարդանի նահատակութեան թուականն է. իսկ 484՝ ՆՈՒԱՐՍԱԿի դաշինքին եւ Քաջն-Վահանի յաղթանակին թուականը. յաղթանակ մը, որով կը պսակուի Վարդանանց Պատերազմը :

Եւ ասիկա կը նշանակէ , որ մեր նախնիք Արտաշատու ժողովքէն (449) , ուր պաշտօնապէս յայտարարուեցաւ Վարդանանց դիմադրութիւնը , մինչեւ ՆՈՒԱՐՍԱԿԻ դաշինքը , երեսուն հինգ տարի խնդիր եւ կոիւ ունեցան Պարսից հետ , մինչեւ որ յաջողութեամբ ձեռք բերին ազգային ինքնօրինութեան իրաւունքը^(*) :

Ազգային իրաւանց հասկըցողութեան եւ ատոնց պաշտպանութեան մէջ ի յայտ եկող ներդաշնակութիւնը , կորիմերու մէջ սիրող յարատեւ ոգին , ազգային փառաւոր աւանդութեանց հանդեպ ցոյց տըրուած նախանձախնդրութիւնը , եւ միշտ սակաւարիւ հաւատարիմներու վնասողական եւ աննկուն արտայայտութիւնը այնպիսի իրողութիւններ են՝ Վարդանանց եւ Վահանեանց շարժումներուն մէջ , որոնց այսօր ալ պէտք ունի մեր Ազգը՝ այսքան աննըլարազրելի Զոհողութիւններէ ետք . . . :

Բ. Ե.

Ուօքըրքառւն , 1920 Յուլիս 1 , ԵՇ :

Ի Տօնի Սրբոց Թարգմանչացն Մերոց
Սահակայ եւ Մեսրոպայ

(*) Վահանեանց շարժումներու մտաին տռանձինն ուշադրութիւն դարձնելու համար , իմ ընթերցողներուն կը յանձնարարեմ հմտորէն գրուած եւ գիւրամատչնի գրքոյք մը . — ՎԱՀԱՆ ՄԱՄԻԿՈՆԵԱՆ , Հայրենեաց Ազատարար , Կեանի եւ Գործունելութիւն , Պատմական եւ Աշխարհագրական Մանօքութիւններ . Գրեց Վ. Մ. Քիւրքնեան . 1917 . Տպ . Ներսո , Նիւերք . Գին 50 սէնք :

ՔԱԶՆ-ՎԱՐԴԱՆԻՆ

ՅԱՅՏԱՐԱՐՈՒԹԻՒՆԸ ՅԱԶԿԵՐՏ Բ.Ի

ԱՌՁԵՒ ԵՒ ԻՐ ԽՈՐՀՐԴԱԽՈՐ ՈՒԽԾԸ

— «Զիմոց զնախնեացն զիպատակութիւն եւ զվաստակ՝ զոր յայս դուրս եւ առ Ձեր թագաւորութիւնդ արարեալ է, ի ժամանակէ յորմէհետէ կարգեալ եմք ի ձեր ծառայութիւնդ, դուք ամենեման ժաշագոյն զիտէք. եւ ինձ ոչ է պիտոյ յաղագա այդպիսի իրաց մի ըստ միոցէ տեղեկացուցանել զձեզ, զոր սոսուզագոյն առաւել նաևաչէք ժան զիս:

«Իսկ ես, քէպէտ և շատ նուազ եմ քան զիմ նախնիսն, սակայն ո՛քափ կարն էր յիս, եղեալ էր ի մտի արդար վաստակօք համել զմիսս ձեր. եւ ուր հասեալ էի ի գործ ի ձեր հրամանէ, տեսեալ էր զօրագլխաց ձերոց եւ իմ ընկերաց՝ ըստ իմ ուժոյ միամտութեամբ զիմ զգործն եւ զվաստակն:

«ԲԱՅՑ ԱՐԴ ՅԱՅՍՄՀԵՏԸ ԱՅՍՊԵՍ ԿԱՄՔ ԵՆ, ԶԱՆԱՄ ԶԻ ԹԷ ՅԱՅԺՄ ԳՈՐԾԵԱԼ ԻՆՉ ԻՑՔ՝ ԵՒ ՈՉ ԱՐԺԱՆԻ ԱՆՈՒԱՆ ԿԱՄ ԳՈՎՈՒԹԵԱՆ, ՅԱՅՍՄՀԵՏԸ ՀԱԱՐԻՄ ԱՄԵՆԱՅՆ ԶՈՐՈՒԹԵԱՄՄԲ ԵՒ ՈՒԺՈՎ՝ ՕԴՆԱԿԱՆՈՒԹԵԱՄԲՆ ԱՍՏՈՒԽՈՑ՝ ԳՈՐԾԵԼ ԳՈՐԾ ԱՑՆՊԻՍԻ, ԶՈՐ ՈՉ ՄԻԱՑՆ ԱՌԱՋԻ ԶԵՐ ԱՐԵԱՑ, ԱՅԼ ԵՒ Ի ԿԱՅՍԵՐ ԴՐԱՆՆ ԵՒ ՅԱՅԼ ԱԶԳՍ ՊԱՏՄԵՍՑԻ ՀԱՄԲԱՆ ԱՅՆ ՄԻՆՉԵՒ ՅԱԿ-ԻՏԵԱՆ» (Ղ. ՓԱՐՊ. էջ 175-76):

ՔԱԶՆ - ՎԱՐԴԱՆ

ՎԱՐԴԱՆԻՆ ԾԱԳՈՒՄԸ

(ՄԱՄԻԿՈՆԵԱՆՔ)

ԱՄԻԿՈՆԵԱՆ ՏՈՀԱՄԻՆ Հառաւիղն է Քաջն
Վարդան։
Եւ կ'արժէ որ Քաջն Վարդանը ճանչնա-
լէ յառաջ, ճանչնանք Մամիկոնեանները, գիտնալու
համար թէ ի՞նչպիսի տոհամէ մը սերած է Աւարայրը
Դիցազնը։

Մեր ազգային պատմագիրներ(1) կ'աւանդեն,
թէ Մամիկոնեանք բնիկ ձենացի են, քաջատոհմիկ,
թաղաւորական տոհամէ, եւ իրենց նախնին Մամգուն
(ըստ Խորենացւոյ), ձենաց աշխարհէն եկած հաս-
տատուած է ի Հայաստան, ներքին խոռվութեան մը
հետեւանքու։

Խորենացի շատ հետաքրքրական տեղեկութիւն-
ներ կուտայ ձենաց վրայ, եւ ճարտարօրէն ալ կը
նկարագրէ ձենաց աշխարհին բնական ճոխութիւն-
ները։ — Այդ տեղեկութեանց համաձայն՝ ձենք մօ-
տաւոր են Հայաստանի սահմաններուն, արեւելեան
հիւսիսային կողմէն, եւ իրենց աշխարհն ալ առաջին

(1) Փ. Բուզանդ, Մովսէս Խորենացի, Սեբէու։

Եւ գլխաւոր է հիւսիսական բոլոր ազգերու մէջ։
Ճենք՝ խաղաղասէր են նկարագրով, իսկ իրենց աշ-
խարհն ալ սքանչելի է։

Խորենացւոյ նկարագրութեան մէջ ուշադրաւ են
քրիմակտ, սիրամարգաշատ, քազմանետակն բա-
ցատրութիւններն եւ թանկագին քարերու եւ մար-
դարիտներու չատութիւնը(1):

Առաջին տեսութեամբ այս բոլորը այնպէս կարծէին, թէ Խորենացին՝ ձենք, ձենաց աշխարհ ծեղեարկած ըլլար ո'չ թէ Հայաստանի մօսելով՝ ակնարկած ըլլար ո'չ թէ Հայաստանի մօսելով՝ ազգի մը եւ երկրի մը, այլ իեռաւոր Զինաց եւ Զինաստանի, որ կը տարածուի Ծայրագոյն Արեւելքի հարաւային արեւելեան սահմաններու վրայ, մինչեւ Խաղաղականի ջուրերը։ Բայց իրողութեան մէջ ալդպիսի բան մը չկայ։

Վասն զի , եթէ այդ նկարագրութիւնը պատշաճէր իսկ Զինաստանի , Խորենացին հակասութեան մէջ ինկած պիտի ըլլար ինքնին , երբ մէկ կողմէն ձենաց

աշխարհը կը տեղազրէ իբրեւ մօտաւոր Հայոց
աշխարհին, արեւելեան հիւսիսային դիրքով, եւ միւս
կողմէն աւ դէ՛ Զինաստանը մատնանիշ ընէր, իբրեւ
երկիր քրիմակտ, սիրամարգաշատ եւ քաղմանի-
տափս:

Զինական արիւնը, չինական դիմագիծը, չիսական լեզուն, մէ'կ բառով, չինականութիւնը՝ բոլորին օտա՞ր է նենազնեայ Մամիկոնեանց, որոնց յատուկ անունները, դիմագիծը, անոնց մարմնչողութին, արիական եւ հայացի նկարագիր մը ունին:

գ. Փառնակ, հիմնուելով Փ. Բուզանդի սէկ սուբ-
ւոյն վրայ (Դ. բ.), ուր կը նկարագրուի Մամիկոն-
եանց սպարապետական կարգուսարքը եւ անոնց դրօ-
շը, իրեւ աղանազգին, աղանադրօշը, արծուէնչանին
եւ վարժնականիշը, Մամիկոնեաններու ծագումը կը
փնտոէ Ալանաց մէջ. իսկ Ալանները, ինչպէս նաեւ
Պահլաւ կամ Պարթեւները ազգակից կը համարի
սկիւթական ցեղի մը, կամ աւելի բացայայտ կերպով
կիւթական ցեղի մը. կը նոյնացնէ զանոնք Թիւրքմէններու հետ (1):

թիւրքմէններ արխական ցեղէն են, եւ նոյն սեր
Թորգումնեանց հետ, եւ հետեւաբար սկիւթական ծա-
թուրգումնեանց հետ, եւ հետեւաբար սկիւթական ծա-
թորգումնեանց հետ, եւ հետեւաբար սկիւթիա (Seythia)
գումար չունին:— Որովհետեւ Սկիւթիա (U. էջ 271, Ծնթ.) կը
ըստած երկրը, ըստ Կիպարնի (Ա. էջ 271, Ծնթ.) կը
տարածուի Պալթիկ ծովին մինչեւ Արալ լիճը, եւ
այն ժողովուրդը, որ կը բնակէր այդ երկրին հիւսի-
սային արեւելեան անկինու, ընդէջ Կեղսիկայի եւ
Սկիւթիոյ, կը կոչուիր Կեղսո-Սկիւթացի: Իսկ ըստ
Մոմսէնի (Գ. էջ 281), Սկիւթացիք կը պատկանին

(1) Տե՛ս ԱնԱՀԻՏ, Ժ. Տարի, 1908, թիւ 1-4. և ՏԱԿՐՈՒ
1918, էջ 172-74:

Մոնկոլեան ցեղին, և շատ կը նմանին Սիալերիոյ արդի ժողովրդեան՝ իրենց սովորութիւններով և իրենց բնախօսական երեւոյթներով։ Հստ Զամչեանի՝ Սկիւթացիք եւ Թաթարք նոյն են ծագումով, բայց կը բաժնում բազում ցեղերու եւ թագաւորութեանց (Գ. էջ 197, 418, 419, եւլլն.)։

Արդ՝ Մամիկոնեանք դարձեալ իրենց արիական ցեղի յատուկ անուններով եւ հայացի նկարագրով ինչպէս որ ժխտեցին չինական գաղթի մը երեւոյթը, նոյնպէս կը ժխտեն սկիւթական (Մոնկոլ կամ Թաթար) ծագման մը վարկածն ալ։

Մեզ համար պարզ եւ բաւական դոհացուցիչ են Խորենացւոյն տուած տեղեկութիւնները ձենաց եւ ձենաց աշխարիի մասին, Հայաստանի արեւելեան հիւսիսային կողմերը, մօտաւոր սահմաններու վրայ։

Դժբախտաբար պատմութիւնը պլացեր է մեզ լրացուցիչ տեղեկութիւններ ձենաց չուրջ, եւ այս պատճառաւ անկարելի է ճշգրտել անոնց երկրին բուն դիրքն ու սահմանները։

Ստուդիւ, պատմութեան համար դժբախտութիւն մըն է այս, եւ այս դժբախտութիւնը արդիւնք է այն մեծ յեղափոխութիւններուն, որոնք, գարերու ընթացքին, վերիվայր ըրջեցին Կովկասեան բոլոր ցեղերը, որոնցմէ ոմանք բնաջինջ եղան իսպառ. ոմանք իրարու խառնուեցան ու ձուլուեցան։

Եւ այս ջնջումներու եւ փոփոխութեանց մէջ դժուար է ուրուազծել հին ազգաց պատմութիւնը եւ անոնց բնաշխարհներուն տեղադիրը։

Իսկ այս դժուարութեանց մէջ դարձեալ Խորենացւոյն սուլ տեղեկութիւններն են, որ քիչ մը լոյս կը նշողեն Մամիկոնեան նախարարութեան սկզբնա-

ուրութեան վրայ՝ Հայաստանի մէջ, առանց խառնելու եւ խառնել տալու մեզ այդ քաջատոհմիկ եւ աղ-նուական տոհմին արիւնը Զինական կամ Մոնկոլեան ցեղերու արեան հետ։

Եւ հետեւելով Խորենացւոյն, կը տեսնենք, ո՞ր ձենաց թագաւորական ցեղէն Մամգուն անունն նա- խարար մը, քաղաքական պատճառներով, կը թողու խարար մը, քաղաքական պատճառներով, կը թողու իր բնաշխարհը, եւ տնով տեղով փախստեայ կ'իյնայ նախ Պարսկաստան, եւ յետոյ՝ Հայաստան, Տրդատի ատեն, եւ մեծ ընդունելութիւն կը գտնէ Հայոց սէդ թագաւորէն։

Տրդատին դէմ նախարարական ներքին դաւա- դրութիւններ կային այդ պահուն, եւ Տարօնի մէջ վրոյաշխարհ (Մշոյաշխարհ) Սլկունեաց նախարարութիւնը պար- զած էր ապստամբութեան դրօշը՝ իր բերդին, հռչա- կաւոր Ողական ամրոցի վրայ։

Մամգուն շատ հաւատարիմ կ'ըլլայ Տրդատին, և լաւ կազմուած ծրագրի մը համաձայն, օր մըն ալ կը հեռանայ Տրդատի քովէն, իբրեւ թէ թշնամու- թեամբ, եւ կ'անցնի Սլկունեաց կողմը, առանց տեղի տալու ունէ կասկածի։

Քիչ յետոյ, երբ Մամգուն կը գրաւէ Սլկունեաց բացարձակ վստահութիւնը, կը գործադրէ իր ծրա- գիրը. այսինքն՝ սրէ կ'անցընէ ապստամբութեան պարագլուիները եւ բնաջինջ կ'ընէ Սլկունեանց նա- խարարութիւնը։

Տրդատ, վարձատրելու համար Մամգունի հա- ւատարմութիւնն ու քաջազործութիւնը, անոր կը պարզեւէ Ողական ամրոցը եւ Սլկունի նախարարու- պարզեւէ ապստամբութեան թեան բոլոր կալուածներն ու իրաւունքները։ Եւ թեան բոլոր կալուածներն ամրոցը այսինքն՝ Մա- այս կերպով ձենազն Մամգունի ցեղը, այսինքն՝ Մա-

միկոնեանք, տէր կ'ըլլան Տարօնին կամ Մշոյ աշխարհին, եւ իրենց աւանդական հաւատարմութեամբ եւ քաջութեամբ կը ծառայեն իրենց նոր հայրենիքին:

ՄԱՄԻԿՈՆԵԱՆՑ ԿԱԼՈՒԱԾՆԵՐԸ

SԱՐՕՆ սիրոն է Հայաստանին: Հեթանոս Հայաստանի պարծանքն է Տարօն, իր համբաւաւոր մեհեաններով՝ Աշտիշատէն մինչեւ Քարքէ: Քրիստոնեայ Հայաստանի ալ վիառքն եղաւ Տարօն՝ իր եկեղեցիներով, Աշտիշատէն մինչեւ Ս. Կարապէտ: Տարօն եղաւ Հայ զինուրութեան հայրենիքը: Տարօն եղաւ Հայ քաղաքակրթութեան օրորանը: Հայ գրականութեան ոսկեդարը կերտուեցաւ Տարօնի մէջ: Տարօնցի են Ս. Սահակ եւ Ս. Մեսրոպ, եւ Տարօնի հայերէնն է, որ եղաւ հայերէն Աստուածաշնչի լեզուն:

Բայց միայն Տարօն կամ Մշոյ աշխարհ չէր Մամիկոնեանց սեփականութիւնը:

Տարյոց աշխարհն ալ Մամիկոնեանց սեփականութիւնն էր վաղեմի ժամանակներէ իվեր, եւ նոյն իսկ կարելի է ըսել, թէ Մամիկոնեանք Տարօնէն յառաջ տէրն էին Տարյոց:

Տայք՝ հին Հայաստանի հնգետասան նահանգներէն կամ Աշխարհներէն ժԴ. րդն է, որ ունէր ութը Գաւառներ:

Տարյոց աշխարհը կը համապատասխանէ Սեւ Ծովուեցերաց վրայ այն երկրին, որ մէկ կողմէն կ'ընդգրկէ Տրապիզոնի նահանգին մէկ մասը, միւս կողմէն կը հասնի մինչեւ Պաթում: Իսկ ներքին կողմէն

Բարերդիկ (Պայպուրդ) եւ Օլթիի (նախնեաց Ութալիքը) գաւառները:

Պոնտոսի Ճանիւս (Ճանիք) կամ Խաղտիք մասը, Պարխար լեռները⁽¹⁾ Ճորոխ գետը՝ Տարյոց աշխարհ հին մէջ են:

Եւ Տայք նշանաւոր էր իր անմատչելի լեռներով, ձորերով, եւ մանաւանդ իր թանձրախիտ անտառներով, այնպէս որ Եղիչէ, անլոյս կ'անուանէ Խաղտիւաց երկիրը:

Այդ ամուր եւ անմատչելի բարձունքներու վրայ շինուած էին Ախանի կամ իրախանի Բերդը, Եւ ուրիշ ամրոցներ, ուր կ'ապաստանէին Մամիկոնեանք ի հարկին, եւ պատերազմի ատեն հո՛ն կը պահէին իրենց ընտանիքները:

Մամիկոնեանք ունէին նաեւ ուրիշ կալուածներ Այլաբատի եւ Գուգուրաց մէջ:

Բայց իրենց գործունէութեան մէջ նշանաւոր են Տարօն եւ Տայք, երկուքն ալ, անմատչելի իրենց լեռնուութեամբ, եւ այդ լեռներու վրայ է որ պահեցին իրենց ազատութիւնը, արծիւներու պէս:

Մամիկոնեանք կարող եղան գարերով պահել իրենց գոյութիւնը Սասնոյ լեռներուն մէջ:

Մինչեւ ԺԴ. րդ դար, մէր ազգային պատմութիւնը արձանագրած է Մամիկոնեան տոհմին քաջադործութիւնները:

(1) Պարխար լերինք, ըստ Ալիշանի, հիւսիսային արեւմուտքին Համբէնը եւ հարաւային արեւմուտքին ալ Կիւրմիսան տանը կը զատեն իրամէ: Իսկ այս վերջին մասը կ'իրճիստան դասուած է, երբեմն Վրաց ձեռքին տակ ըլլալուն համար: (Տեղագիր Հայոց Մեծաց, 39):

ՄԱՄԻԿՈՆԵԱՆՑ ՆԿԱՐԱԳԻՐԸ

ՄԱՄԻԿՈՆԵԱՆ տոհմին նկարագիրն է ծառայութեան հայրենեաց՝ բացարձակ հաւատարմութեամբ, ասպետական, անպարտելի քաղութիւն, եւ մեռնիլ պատերազմի դաշտին վրայ:

Այս նկարագիրը չեղուեցաւ Մամիկոնեանց վըրայ, հակառակ այն քանի մը անարժաններու, որոնք խոտորեցան Մամիկոնեան տոհմին փառաւոր աւանդութենէն:

Մամիկոնեան քաջերէն արիստիրտն Վաչէ, երբ մեռաւ պատերազմի դաշտին վրայ, հայրենիքի ազատութեան համար, Վըթանէս կաթողիկոս, ի յիշատակ անոր մեծամեծ ծառայութեանց, տարեկան տօն հաստատեց(1), եւ սրբոց կարգը դասեց զայն (Փ. Բուզ. Գ. Ժա.) :

Եւ այս կանոնը մնաց Հայաստանեայց Եկեղեցւոյ մէջ, եւ հայրենիքի համար արիւն թափողներու տօներ հաստատուեցան:

Արտաւազդ եւ Վասակ Մամիկոնեաններն էին, որ Ռշտունի եւ Արծրունինախարարութեանց անձիստման պահուն ազատեցին երկու մանչ մանուկներ, մին՝ Մեհքնդակ Ռշտունիի որդին՝ Տաճատ, իսկ միւսը՝ Վաչէ Արծրունիի որդի Շաւասպ, եւ պահեցին, մեծցուցին զանոնք իրենց Տայոց աշխարհի էրախանի բերդին մէջ (Փ. Բուզ. Գ. Ժա.) :

Սպարապետ Վասակ Մամիկոնեան՝ Արշակ թագաւորի հետ հիւր էր Տիգրոն, Շապուհի արքունեաց մէջ:

(1) Վաչէ Զօրավարին տօնը, յայտնի չէ թէ ի՞նչ պատճառաւ, դժբախտաբար խափանուած է:

Արշակ օր մը փափաքեցաւ այցելել արքունի ախոռ եւ տեսնել Շապուհին ձիերը:

Ախոռապետը ո'չ միայն չմեծարեց Հայոց թագաւորը, այլ ընդհակառակն ծաղրել ուզեց զայն, ըսելով պարսկերէն,

— ի' այծերու (Հայոց) թագաւոր, եկուր նստէս' խոտերու խուրձին վրայ(1):

Վասակ, որ Արշակին քովն էր, չհանդուրժեց այս նախատինքին եւ իր կեանքը վտանգելով, քաշեց իր սուրբ եւ հոն սատկեցուց ախոռապետը (Փ. Բուզ. Գ. Ժա.):

Մուշեղ Մամիկոնեան, որ Քաջն Վարդանի նախատիպարն է, երբ մէկ կողմէն այնքան խստիւ կը պատժէր Հայ ուխտադրուժներն եւ ուրացեալները, միւս կողմէն մէծ խնամքով կը պահէր Շապուհին գերուած կանանցը, եւ զայն պատուով կը դրկէր անոր:

Շապուհ այնքան զգածուեցաւ Մուշեղ Զօրավարի այն ասպետական ընթացքին, որ իր գինիի գաւաթին վրայ քանդակել տուաւ Հայոց ձերմակաձի Սպարապետին պատկերը, եւ ամէն անզամ, որ գաւաթը ձեռք կ'առնէր, Մուշեղի կենաց կը պարպէր զայն, ըսելով.— «Ճերմակաձին գինի արբցէ», (Փ. Բուզ. Ե. թ.):

Մուշեղ Զօրավար պատերազմի մը մէջ բռնեց Աղուանից Ռւոնայր թագաւորը:

(1) Արշակ շատ մազուր էր մարմնով, եւ առ հասարակ Հայեր քաւամազ են: Ախոռապետը հաւանաբար այդ նախատիմքը յանդգնեցաւ ընել, ակնարկել ուզելով Արշակին քաւամազութեան:

Մուշեղ ըսաւ անոր՝ թէեւ բռնեցի քեզ, բայց
պիտի չըսպաննեմ, որովհետեւ թագաւոր մըն ես,
եւ թեթեւ պատիժով մը թող տուաւ որ փախչի եր-
թայ իր երկիրը:

Եւ երբ ասոր համար Մուշեղ ամբաստանուեցաւ
Պապ թագաւորին առջեւ, եւ Պապ բացատրութիւն
պահանջեց քաջ Զօրավարէն, սա՛ ըսաւ.

Ես սպաննեցի իմ աստիճանակիցներս, բայց
Ուռնայր թագաւոր մըն էր, եւ ես չէի կրնար ձեռք
երկնցնել թագաւոր մարդուն: Ան աստիճանակից է
քեզ, եթէ կ'ուզէիր անոր մահը, պէտք էր որ զուն
սպաննէիր զայն պատերազմի մէջ: Եթէ ասոր հա-
մար կ'ուզէս սպաննել զիս, սպաննէ՛ (Փ. Բուզ.
Ե. Դ.):

Վերջապէս Մուշեղ զոհ զնաց դաւաճանութեան
մը՝ Վարազդատ թագաւորի պալատան մէջ, երբ նոյն
դիւրահաւան թագաւորին հրամանաւ բռնուեցաւ:
Բայց ի՞նչ բռնուիլ — տասուերկու հուժկու մարդիկ,
վեցը մէկ թեւէն եւ վեցը միւս թեւէն բռնեցին եւ
զօրով կրցան ոլորել զանոնք, եւ այդպէս վատարար
կտրեցին այս անխոցելի Քաջին դլուխը:

Մեծ Զինուորը հազիւ ատեն ունեցաւ Վարազդա-
տին երեսն ի վեր բողոքելու սա՛ խօսքերով.

— Միթէ ա՞յս է իմ ծառայութեանց, իմ թափած
արիւն քրտինքին հատուցումը:

Բայց այս մահը ձիու վրայ հանդիպելու էր
ինձ... (Փ. Բուզ. Ե. Դ.):

Մանուէլ Մամիկոնեան, որու սպարապետու-
թեան ատեն Հայաստան կատարեալ իսաղազութիւն
վայելեց, երբ ստիպուեցաւ վերոյիշեալ գեռատի,
յաւակնոտ եւ անփորձ Վարազդատին դէմ պատերազ-

միլ, Վարազդատ տկարացաւ կոռուին մէջ, եւ Մա-
նուէլ Զօրավարին երկու զաւակները, Հմայեակ եւ
Արտաշէս, յարձակեցան անոր վրայ եւ պիտի սպան-
նէին զայն, եթէ Մանուէլ չպուար եւ չարդիլէր.

«Ա՛յ, մի՛ լինիք տիրասպանուք»:

Մանուէլ սապէս ըրաւ իր կտակը մահուան մահ-
ճին մէջ, իր խօսքերը ուղղելով իր որդւոյն եւ յա-
ջորդին Արտաշէր Մամիկոնեանի.

— Հնազանդ, հպատակ եղիր Արշակ թագաւո-
րին. անկեղծօրէն ջանա՛ եւ ծառայէ, եւ անձդ զոհէ
Հայոց աշխարհէին, ինչպէս որ մտադիւր զոհեցին
նախնիքդ: Վասն զի Աստուծոյ առջեւ Արդարութիւն
է այդ. երբ այդ կերպով կը ծառայէք՝ Աստուած
ձեռքէ չթողուր ձեզ:

Քաջի անուն թողէք երկրի վրայ. իսկ երկինքին
ընծայեցէք Արդարութիւնը:

Մահէն մի՛ վախնաք ամենեւին, այլ ձեր յոյսը
դրէք Անոր վրայ, որ ամէն բանի ստեղծիչն է եւ
հաստիչը:

Նենդութիւնը, պղծութիւնը, չարութիւնը մեր-
ժեցէ՛ք ձեզմէ:

Սրբութեամբ եւ անկեղծութեամբ պաշտեցէք
դՏէր Աստուած, եւ «Համարձակութեամբ մեռարուք»
աստուածապաշտ Հայաստանի վրայ. վասն զի Եկե-
ղեցւոյ եւ անոր Ուխտին, ինչպէս նաեւ մեր երկրի
բնիկ տէր Արշակունիներու համար մեռնիլ՝ Աստու-
ծոյ համար մեռնիլ է:

Պատմիչը աւելի յառաջ տանելով Մանուէլ Սպա-
րապետին վերջին վայրկեաններուն նկարագրութիւ-
նը, կ'ըսէ.

— Մանուէլ բոլորովին մերկացաւ անկողնի մէջ,

եւ ցոյց տուաւ իր մարմինը, որուն վրայ ողջ իսայծ մը չէր մնացած.— պատերազմի խոցերով եւ սպի-ներով ծածկուած էր բոլորովին:

Հսկայ Զօրավարը ևսաւ լալ եւ ըսել.— Ման-կութենէս ի վեր պատերազմներու մէջ սնայ, եւ այս բոլոր վէրքերը առի մեծ մեծ քաջութիւններով:

Երանի՛ թէ այս մահը պատերազմի մէջ հասնէր ինձ եւ այսպէս՝ անասունի պէս չմեռնէի: Այո՛, երանի՛ թէ պատերազմելով մեռնէի հայրենիքի վր-րայ, Հայոց աշխարհին բնիկ տէր Արշակունիներու վրայ, մեր կիներու եւ զաւակներու վրայ, աստուա-ծապաշտ մարդոց վրայ, Եղբայրութեան, ընկերու-թեան եւ մտերիմ բարեկամութեան վրայ: Բայց ի՞նչ օգուտ, «քէպէտ շատ զանձն յանդուզն վարեցի, զվատքար մահս մահնացս եհաս ինձ մեռանել»:

— «Ի պատերազմի ի մահուանէ մի՛ երկնչիք, ուր ես չմեռայ. զի առանց Աստուծոյ ինչ ոչ լինի» (Փ. Բուզ. Ե. Խո.):

Կրօնական այս մաքուր եւ ազնուական ոգին սքանչելի է:

Մամիկոնեանք նշանաւոր եղան իրենց քրիստո-նէական կեանքով, իրենց կենդանի գործունէու-թեամբ, եւ իրենց բարեպաշտ ու երկիւղած արտա-յատութիւններով:

Ասպետական քաջագործութեանց այսպէս դը-րուազներով յօրինուած է Մամիկոնեանց պատմու-թիւնը:

Եւ այդ քաջագործութիւններէն յառաջ բերուած քանի մը օրինակներով կ'ուզեմ ցոյց տալ, թէ Քաջն-Վարդան սերած է Տոհմէ մը, որուն պանծալի աւան-

դութիւնները աւելի եւս փառաւորուեցան նոյն ինքն Վարդանի եւ իր եղբօրորդւոյն Վահանի շարժուա-ներով, ինչպէս որ պիտի տեսնենք:

Մամիկոնեանք, ըստ Մեսրոպ Երիցու տեղեկու-թեան, Մեծն Ներսէսի ատեն ինամութեամբ պա-տուաստուեցան Լուսաւորչի սերունդին, եւ այս կեր-պով աւելի եւս ուշադրաւ եղան իրենց քաջագործու-թիւնները՝ աղղային եւ կրօնական իրաւունքներու պաշտպանութեան մէջ:

Երեան ինամութիւնը ազնուացաւ եւ գեղեցկա-ցաւ գաղափարի եւ սկզբունքի նոյնութեամբ եւ հա-մագործակցութեամբ ալ:

Քաջ-Վարդանին ծնողքը, ինչպէս նաեւ նոյն ինքն Վարդան եւ իր եղբայրները, զարգացան եւ ուռնա-ցան Սահակ-Մեսրոպեան շրջանին ներչնչուներով, եւ վայելեցին Հայ դարպութեան ոսկեդարեան գեղեց-կութիւնները իրենց կրթութեան եւ դաստիարակու-թեան մէջ, եւ անոնք՝ այս բոլոր թանկագին առա-ւելութիւնները եւ առանձնաշնորհուամները արժեցու-ցին իրենց Հայացի ծառայութեան երկա՛ր ուղեգծին վրայ եւ փառաւոր ասպարէզին մէջ, եւ կարող եղան պահել ու պաշտպանել Հայութիւնը՝ անոր թագին ու մականին կրուստէն ետքն ալ:

Մամիկոնեանց ծառայութեան այդ նկարագիրը պէտք է, որ առաջնորդէ մեր Ազգին նոյն իսկ այսօր, Հայաստանի ազատագրութեան եւ վերաշնուրեան այս նոր շրջանին մէջ:

ՄԱՄԻԿՈՆԵԱՆՑ ՊԱՏՄՈՒԹԻՒՆԸ

ՍԵՐ Ազգային Պատմութեան առաջին քանի մը դարերուն պատմութիւնը՝ դրեթէ նոյնացած է Մամիկոնեանց պատմութեան հետ:

Փաւստոս Բուզանդ, Ղազար Փարպեցի, եւ Եղիշէ, որոնք գոհարներն են մեր նախնեաց գրականութեան, նուիրուած են Մամիկոնեանց ծառայութիւնը ցայտեցնելու ազգային կեանքի քաղաքական եւ կրօնական բարդ գրուագներու մէջն:

Հայ պատմութեան առաջին դրուագը գրի առնուած է Ազաթանգեղոսով: Երկու գլխաւոր դէմքեր կան հոն, Տրդատ եւ Լուսաւորիչ, որոնց անուան եւ գործունէութեան շուրջ կը դառնայ Ազաթանգեղոս:

Իսկ Տրդատ եւ Լուսաւորիչ իրենց գործերով եւ իրենց արիւնով, քիչ ետքը կը միանան եւ կը նոյնանան Մամիկոնեանց հետ:

Կորիւն, որ գրի առած է Հայերէն այբուբենքին պատմութիւնը, իրականին մէջ ուրիշ բան չէ ըրած, եթէ ոչ պանծացնել Վուամշապուհի եւ Սահակ-Մեսրոպի գործունէութիւնը, որոնք միացած եւ նոյնացած են Մամիկոնեանց հետ:

Եւ այս բոլոր պատմիչներ մասնաւոր պատմիչներ են, այսինքն՝ որոշ դէպքերու եւ դէմքերու շուրջ կը դառնան՝ մեր ազգային կեանքը պատկերացնելու ատեն:

Միայն Մովսէս Խորենացին է, որ առաջին փորձ մը ըրած է մեր ազգին ընդհանուր պատմութիւնը դրելու: Եւ իր պատմութեան երրորդ Գիրքը, որ

վերջին մասն է, պատմութիւնն է Լուսաւորչի յաջորդներուն, եւ Արշակունի վերջին թագաւորներուն եւ Հայերէն այբուբենքի դիւտին:

Չատ հետաքրքրական է դիտել, որ Խորենացի վերոյիշեալ պատմագիրներէն միայն Ազաթանգեղոսը կը յիշէ յաճախ, եւ լուս է միւսներու մասին: Դարձեալ՝ կը պատմէ թէ ի՞նչպէս Քաջն Վարդանին հայրը, Համազասպ Մամիկոնեան Սպարապետ եղաւ. կը յիշատակէ նոյնպէս Քաջն-Վարդանին պատգամաւորութիւնը թէ՛ ի Բիւզանդիոն եւ թէ՛ ի Տիգրոն, բայց ոեւէ յիշատակ չունի Վարդանանց պատերզմէն:

Խորենացի, որ ըստ աւանդութեան, բնիկ Տարօնցի է, եւ Քաջն-Վարդանի բարձր պաշտօնները ճանչնալէ ետքը, հարկաւ պիտի ճանչնար նաեւ Վարդանանց Պատերազմին պարագաները, իր այդ բացարձակ լուսութեամբ բաւական լուրջ շուարումի մատնած է քննադատները:

Ինչ եւ իցէ. իրականութիւնը սա՛ է — Տարօնէն, Մամիկոնեանց կեդրոնէն է, որ կը ծագին Հայ քաղաքակրթութեան ոսկեղարը, եւ այդ հոյակապ շրջանին բոլոր նահապեաններն ու գործիչները, եւ գրեթէ բոլոր պատմագիրները, յանձին մեր երանաշնորհ թարգմանչաց:

Եւ Մամիկոնեան Տոհմին գործունէութեան մէջ է ազգային բոլոր շարժմանց ծանրութեան կեդրոնը:

Հետեւաբար զարմանալի չէ, որ ժամանակակից պատմագիրներ գրեթէ Մամիկոնեանց պատմութիւնը դրած են, Ազգային Պատմութիւն գրելու ատեն:



ՎԱՐԴԱՆԻՆ ԾՆՈՒՆԴԸ

ՎԱՐԴԱՆԻՆ հայրն է Համազասպ Մամիկոն-
եան, իսկ մայրը՝ Սահականուշ Տիկին,
Մեծն Սահակի միամօր դուստրը:
Համազասպի եւ Սահականուշի ամուսնութեան
թուականը — հաւանական հաշուով մը — կ'իյնայ
384-386 տարիներու մէջ:

Այս ամուսնութիւնը օրհնուեցաւ երեք մանչ զա-
ւակներով, որոնց երեցն է մերն Վարդան, որ կը կո-
չուէր նաեւ Վարդկան: Միջնակն է քաջ «Սեպուհն»
չուէրն առաջ Սեծն Վահանին եւ Եղբարց. իսկ
Հմայեակ, հայրը Մեծն Վահանին եւ Եղբարց. իսկ
կրտսերն է՝ Համազասպ կամ Համազապեան. եր-
կուքն ալ զինակից եւ խորհրդակից եւ անձնուէր ի-
րենց երեց եղբօր:

Վարդան, հաւանական հաշուով, ծնաւ 387ին:
Այդ միջոցին Հայոց Սպարապետն էր քաջն Սա-
հակ Ասպետ, Բագրատունեաց Տոհմէն, որ հաւանա-
բար մեռաւ 388ին(1):

Սահակ Սապետին յաջորդեց՝ Վարդանին հայրը՝
Համազասպ Մամիկոնեան, Պարսից Շահ՝ Վուամ-
կումանի (388-399) հրամանով, Մեծն Սահակի միջ-
նորդութեամբ, զոր ըրաւ իր դստեր Սահականուշի
թախանձանքին վրայ, հաւանաբար 389ին:

Բայց է, որ Վարդան մէկ երկու տարուան ման-
չուկ մըն էր՝ երբ իր հայրը Սպարապետ եղաւ Հայ-
կական Բանակին:

(1) Քաջն Սահակ Բագրատունի Սպարապետ եղաւ Պարս-
կարածին Հայաստանի վրայ, Խորով քագաւորի կարգադրու-
թեամբ (Մ. Խոր. Գ. Խոդ.):

ՎԱՐԴԱՆԻՆ ԿՐԹՈՒԹԻՒՆԸ

ՎԱՐԴԱՆԻՆ պատանութեան միջոցին, այսինքն՝
400-410ին էր, որ տեղի ունեցաւ Հայերէն
այրութենքին դիւտը, եւ Աստուածաշունչը
Հայերէնի թարգմանուեցաւ Սահակ-Մեսրոպեան
դպրոցին մէջ:

Վարդան եւ իր եղբայրները բախտ ունեցան ուղ-
ղակի իրենց մեծ հայրիկէն սորվելու Հայերէն դրա-
կանութիւնը եւ Սուրբ Գրոց ուսումը:

Կորին դժուել կուտայ, թէ Մեծն Սահակ մաս-
նաւոր հոգ եւ խնամք տարաւ իր թոռներուն կրթու-
թեան եւ դաստիարակութեան:

— «Առաւել երանելոյն Սահակայ զՄամիկոն-
եան որեարն՝ ի վարժու վարդապետութեան պարապե-
նուցեալ. որոց առաջնոյն ՎԱՐԴԱՆ անուն էր, եւ
ՎԱՐԴԿԱՆ կոչէր» (Կորին, Էջ 13-14):

Վարդանանց պատերազմին նախընթաց դէպքե-
րուն մէջ կը տեսնենք, թէ Վարդան ստուգիւ կրօնա-
կան եւ քաղաքացիական շատ ընտիր եւ շատ զօրաւոր
դաստիարակութիւն մը ստացած է, բացի իր զինուո-
րական կրթութենէն: Վասն զի Վարդան կ'արտա-
րական կրթութենէն: Վասն զի Վարդան կ'արտա-
րական կ'արտագութիւն գինուորի մը անվե-
յայտ ո՛չ միայն քաջամարտիկ զինուորի մը անվե-
յայտ այս կ'արտագութիւնը, այլ նաև խորունկ յարգանք եւ ակնա-
ծերութիւնը, այլ նաև խորունկ յարգանք եւ ակնա-
ծանք կը տածէ Սուրբ Գրոց մասին, պարձանքով
կը յիշէ Մեծն Սահակին ուսուցչութիւնը՝ իբրեւ Հա-
յական տառած դաստիարակութիւնը:

Մեծն Սահակին տուած դաստիարակութիւնը
այնքան զօրաւոր եղած էր, որ Վարդան դիւտազու-
այնքան զօրաւոր եղած էր, որ Վարդան դիւտազու-

թիւններ ըրաւ ո'չ միայն Աւարայրի պատերազմին մէջ, այլ նաեւ իր մղած բոլոր պատերազմներուն մէջ, եւ մանաւանդ պատերազմի դաշտերէն դուրս, իր առանին եւ ընկերային կեանքին դժուարութեանց մէջ:

Ինչպէս որ պիտի տեսնենք քիչ ետքը, երբ Յաղկերտի Դրան մէջ նենդութեամբ վար դրուեցան ՀայԱզգին ներկայացուցիչները եւ բոնադատուեցան կրօնափոխութեան, Վարդան յայտարարեց, թէ ինքն նախամեծար կը համարի պահել իր հաւատքը ամէն դնով, քան թէ ուրացող մը համարուիլ.

— «Քա՛ւ լիցի. ոչ զվարդապետութիւն եւ զիաւասս Աւետարանին, զոր ուսոյց եւ հաստատեաց յիս նշամարիտ հան իմ Տէր Սահակ, մերժեցի յինէն» (Ղ. Փարպեցի):

Եւ Վարդան յանձն առաւ կեղծուրացութիւնը, իր բոլոր հոյակապ եւ հաւատացեալ բանտակիցներու պնդումներուն վրայ, հայրենիքի փրկութեան սիրուն. վասն զի կը հաւատային, թէ միայն Վարդան կարող էր ի գլուխ հանել ապստամբութեան դործը եւ պաշտպանել Հայութեան ազգային եւ կրօնական աղասութիւնը:

Եղիշէ կը պատմէ, թէ Աւարայրի պատերազմին գիշերը, երբ Հայոց Ս. Կաթողիկոսն Յովսէփ եւ Հայքահանյութեան պարծանքն հիանալին Ս. Ղեւոնդ՝ կը քաջալերէին վաթսուն հազարներու բանակը, իւրենց կրակու հայրենասիրութեամբ, Սպարապետ Վարդանն ալ, Մակարայեցւոց գիրքն ի ձեռին, կը խանդավառէր իր զինակիցներն ու մարտակիցները, որպէս զի յառաջիկայ կոխւին մէջ Մակարեան քաջերու պէտ անմահանան:

Եւ ասիկա ցոյց կուտայ, թէ Վարդան շատ լաւ սերտած էր Սուրբ Գիրքը, իր ճշմարիտ հաւուն, Մեծն Սահակի, առաջնորդութեամբ եւ շատ լաւ կը դործածէր զայն, որովհետեւ իր խօսակցութեան մէջ կը բիւրեղանան Աստուածաշնչական գաղափարներ ու ճշմարտութիւններ՝ բեղուն գեղեցկութեամբ մը:

Ղ. Փարպեցի եւ Եղիշէ դիտել կուտան, թէ Վարդան «յոյժ հմուտ էր եւ ընդել գրոց վարդապետութեան՝ ուսեալ խրատեալ ի սուրբ հայրապետէն ի Սահակայ ի հաւոյն իւրմէ»: — «Զի եւ ինքն իսկ տեղեակ էր ի մանկութենէ իւրմէ Սուրբ Կտակարանաց»:

Վարդանի դաստիարակութեան եւ կրթութեան մէջ վստահ եմ, որ իր մայրը, Սահականուշ Տիկինն ալ բաժին մը ունի:

Այդ ժամանակներու մէջ, Հայոց աշխարհի փափկասուն եւ առաջինազարդ Տիկիններու շարքին՝ Մամիկոնեան եւ Կամսարական Տունները արտաքոյ կարգի իմաստութիւն եւ արիութիւն երեւան բերին:

Դժբախտաբար շատ քիչ բան գիտենք Սահականուշ Տիկինը կեանքին վրայ: Բայց ես վստահ եմ, որ Մեծն Սահակ իր միածին աղջիկը կրթեց եւ մեծցուց իր չնչով, եւ ընտրեց անոր ամուսին մը, յանձին Համազասպ Մամիկոնեանի, եւ հիմը դրաւ այնպիսի տան մը, որ օրհնութիւն եղաւ մեր թագազուրկ Աղդին համար:

Մեծն Վահանին մայրը, Տիկին Զուիկ եւ ասոր քոյրը Անուշվառմ, Վրաց Բդէշի Աշուշային Տիկինը, նոյն աւանդութեան եւ նոյն կրթութեան հաւատարիմ Մայրեր եղան:

Մեծն Սահակ եւ իր աղջիկը, Սահականուշ Տի-
կին՝ Վարդանը տուին Հայ Ազգին, իր քաջազուն եւ
Քաջասուն Եղբայրներով։ Իսկ Տիկին Ձուիկ, որ «Ե-
պես կին անուանի եւ առաւելեալ ամենայն լաւ մա-
զեւ կին յամենայն կանայս ի Հայաստան աշխարհին»,
սամբք յամենայն կանայս ի Հայաստան աշխարհին»,
եւ իր քոյլն Անուշվոսամ՝ Հայ Ազգին տուին Վահանը,
իր գելցազն Եղբայրներով, եւ այս երկու Մեծ Մա-
միկոննեաններ այնպիսի սիրալի քաջադրծութիւններ
ըրին, որ ստիպեցին Պարսիկ կառավարութիւնը
ճանչնալու Հայ զինուորին արժանիքը եւ Հայ Ազգին
ինքնօրէնութեան իրաւունքները։

ՀԱՅ ԶԻՆՈՒՈՐՈՒԹԻՒՆԸ ԵՒ ՄԱՄԻԿՈՆԵԱՆՔ

ՄՈՒՇԵՂ Զօրավարի հրամանատարութեամբ
Հայ գունդը այնպիսի հարուած տուաւ Պար-
սիկ բանակին, որ Շապուհ զարմացաւ, եւ
աս' իմաստով յայտարարութիւն մը ըրաւ, պատե-
րազմի դաշտէն Տիղբոն վերադառնալէ ետքը.

— Մանկութենէ իվեր կեանքս անցած՝ և ապամա-
ներու եւ կոխներու մէջ ։ Թագաւորական գահն ալ
բարձրացած եմ երկար տարիներէ իվեր, եւ առանց
կոռուի տարիի մը չեմ անցուցած. բայց իմ ամէնէն
տաք կոհսւ եղաւ այս անդամ : Վասն զի, երբ Հայոց
նիզակաւորներ յառաջ կ'անցնէին՝ այնպէս մը կը
յարձակէին, որ կարծես թէ բարձր լեռ մը կամ հաս-
տաբեստ, հզօր եւ անշարժ աշտարակ մը եղած ըլլար
յարձակողը. եւ երբ մենք քչիկ մը կը շարժէինք զա-

նոնք, այն ատեն անոնք կ'ապաստանէին Հռոռմոց
Լէդէոնին, որ բանալով իրենց վահանափակները, կը
շրջապատէին զանոնք ամուր պարիսպի մը պէս։ Եւ
հան քիչ մը շունչ առնելէ ետքը, դարձեալ դուրս
կ'ելնէին կոռւելու համար, եւ ցիրուցան կ'ընէին մեր
գօրքերը։

Ասկէ զատ ես շատ զարմացեր եմ Հայաստանին գնդին անկեղծ տիրասիլուութեան. որովհետեւ այնքան ժամանակ անցած է Արշակ թագաւորի մահուան վրայ, բայց դեռ Հայ զինուորներ անոր անունով կը խրախուսուին: Երբ իրենց ախոյեանները գետին տապալէին, կը գոչէին «առ Արշակ»: այսինքն՝ զոհեղեր մեր քաջ Արշակ թագաւորին:

Իսկ հապա սա Մուշեղին մոլեկան գունդը՝
ինձ այսպէս կը թուշիր, թէ հուր բոց մը կ'ելնէր այդ
գունդէն եւ անոնց դրօչներէն. ինչպէս որ բոցը
կ'անցնի եղէքի մէջէն, կարծես թէ այդպիսի հրդե-
հի բոց մը կ'անցնէր գունդին մէջէն:

Երանի՛ անոր, որ տէրն է Հայ գնդին, այդ տէ-
րասէր, միաբան եւ անկեղծ զօրքերուն:

— «Երանի» որ Հայոց գնդին տէր իցէ, այնպիսի
տիրասէր եւ միաբան միամիտ զօրացն», (Փ.
Բուզ. Ե. Ե.):

Բայց այսպիսի պատուական զինուորութիւն մը,
իր այնքան հաւատարիմ եւ արիական ծառայութեան
փոխարէն, չարաշուք վիճակի մը ենթարկուեցաւ,
երբ Յազկերտ Բ. զանոնք քչեց հեռաւոր երկիրներ՝
խոր անապատներ՝ Պարսկաստանի թշնամիներուն
դէմ կոռւելու համար, ծայրայեղ թշուառութեան
մէջ:

Հստ Եղիշէի, Յազկերտ այս անդուժ ընթացքը
բռնեց, որպէս զի Հայերն ստիպէ ուրացութեան :

Եւ թէպէտ Հայ զինուորներ ներքնապէս ուրախ
էին Քրիստոսի սիրուն, բայց անոնց արտաքին տես-
քը շատ ողորմելի էր օտարութեան մէջ :— «Այնպիսի
պատուական զինուորութիւն հասեալ էր ի չարաշունք
անարգութիւն, եւ հայրենի ազատութիւնն չարաշար
կայր ի ծառայութեան մարդախոշոշ բռնաւորին» (Ե-
ղիշէ Բ. Յեղ.) :

Պարսիկ կառավարութեան անողորմ վարմունքը
մէկ կողմէն, եւ ինչպէս որ կ'երեւի, Մամիկոնեանց
պահ մը ասպարէզէն քաշուիլը միւս կողմէն, այնքան
անարդ եւ խղճալի վիճակի մը հասցուցին Հայ զի-
նուորութիւնը, որ այլեւս Պերոզ, Յազկերտ Բ. ին
յաջորդը, հրապարակաւ կը նախատէր Հայ զինուո-
րը, իրեւ վատթար եւ անպիտան, եւ ասիկա կը խո-
ցոտէր Վահան Մամիկոնեանին սիրոը :

Դ. Փարավեցի կ'ըսէ . Հայոց զինուորները, որ
ատենօք այնքան քաջանուն կը փայլէին ուրիշ զի-
նուորներու մէջ, եւ անոնց զօրագլուխներն անուանի
եւ յաղթող էին, հիմայ ծաղրուծանակ եղած էին ա-
մենուն առջեւ, այնպէս որ նոյն ինքն Պերոզ յատենի
յայտնապէս կը նախատէր, ըսելով . եթէ իմ իշխա-
նութեան մէջ անպիտան եւ յետին գունդ մը կայ, ան
ալ Ասորոց գունդն է . բայց Հայը՝ Ասորիէն ալ աւելի
յետին է եւ անպիտան : Եւ ասիկա ողբ ու լացի ար-
ժանի լուր մըն էր :

Իսկ Վահան Մամիկոնեան, որ մահը աւելի կը
նախընտրէր քան թէ Պերոզի այդ նախատինքը, երեք
կոփուներու մէջ ցոյց տուաւ թէ բուն Հայ զինուորը,

օժտուած Մամիկոնեան կրթութեամբ, վատթար եւ
անպիտան չէր :

Վահան քաջարար դիտել տուաւ Պարսից կառա-
վարութեան ներկայացուցիչ Միհրանին, թէ Հայ զի-
նուորութեան անկման պատճառ եղած է նոյն ինքն
Պարսիկ կառավարութիւնը . որովհետեւ, յայտարա-
րեց Քաջն Վահան, եթէ այս Հայ զինուորները իմ
ձեռքիս տակ ըլլային այնպէս որ էին իմ
նախնեաց ձեռքին տակ, ես գլուխը կը կտրէի կռուի
մէջ վատացողներուն . իսկ քաջացողներուն ալ պատիւ
կուտայի, եւ այնպէս կը ցուցընէի Շահնշահին, թէ
ո՛ր գունդը քաջ եւ անուանի էր Պարսից իշխանու-
թեան մէջ : Բայց ձեր կառավարութիւնը՝ վատա-
տոհմ եւ անպիտան մարդոցմէ իշխաններ կարգեց
Հայոց աշխարհին վրայ, եւ անոնք ալ իրենց յետ-
նութեամբ Հայաստանէն չնջեցին քաջութիւնը, բա-
րի անունը եւ լաւութիւնը .— «Զի զնդի՝ որոյ զօրա-
գլուխն վատ է, զնդին լաւ լինել չէ հեար . եւ աշխար-
հի՝ որոյ իշխանէն յետին են, աշխարհին այնմ ան-
հեար է յառաջադէմ եւ անուանի լինել» (Դ. Փարալ.
էջ 379-80, եւ 473-76) :

Վահան Մամիկոնեան կարող եղաւ խօսք հաս-
կըցնել Պարսիկ կառավարութեան, եւ անզամ մը ըն-
դունել տալէ ետքը իր նշանաւոր երեք պայմանները,
առաջին գործը եղաւ իշխանութենէն վտարումը այդ
անպիտան, յետին եւ վատթար ուրացեալներու, ո-
րուն հետեւանքով, գարձեալ իրեն տրուեցաւ Հայ
Բանակին Սպարապետութիւնը, ինչպէս նաեւ, քիչ
ետքը, Հայաստանին Մարզպանութիւնը, եւ այս բո-
լորին արդիւնքն եղաւ Հայ զինուորութեան պատուին
ու վարկին վերականգնումը ու վերհաստատութիւ-

նը, ինչ որ արդէն հաստատուած եւ հոչակուած էր
Վահանեանց զարմանալի քաջագործութեանց մէջ:

Տրուած հայացի կրթութեան եւ հայացի դաս-
տիարակութեան արդիւնքն էր այս:

Ի՞նչ որ կը ցանես եւ ի՞նչպէս որ կը ցանես, այս-
պէս ալ կը հնձես:

Վարդանին եւ իր եղբայրներուն ու եղբօրորդե-
ներուն մտաւոր եւ մարմնաւոր պատրաստութիւնը
եղած է շատ մեծ խնամքով եւ հոգածութեամբ:
Վարդան ճշմարիտ Հայ զինուոր մըն էր, որովհետեւ
զինուորութեան մէջ էր ծնած եւ սնած, Մամիկոն-
եան Տան աւանդութեանց համաձայն:

Ասպետական ողին, որ յատուկ է Վարդանի
տիաբէն զօրականներու, պէտք է խոստովանիլ, որ
խօսքի եւ գործքի մէջ հաւասարապէս խանդավառած
է Մամիկոնեան Քաջերը. եւ այդ ողին աւելի եւս
պայծառ ու ներշնչող եղած է յանձին Վարդանի եւ
Վահանի, չնորհիւ տրուած խնամու դաստիարա-
կութեան եւ կրթութեան:

ՎԱՐԴԱՆ՝ ՍՏՐԱՏԵԼԱՏ

Ի՞ՆՉ է Վարդանին կեանքը Աւարայրի պատե-
րազմէն յառաջ: — Այս մասին դժբախտա-
բար շատ քիչ բան դիտենք պատմութենէն:
Բայց կրնանք ըսել հաւաստեաւ, թէ մեր Մամարապե-
տը, որ վաթսունէ աւելի Մայիսներ բոլորած էր՝
երբ ինկաւ Աւարայրի պատերազմին մէջ, 451ի Մա-
յիսին, փառաւորած էր իր կեանքն ու ասպարէզը՝
հայրենանուէր գործունէութեամբ եւ պաշտօններով:

Ամէնէն յառաջ կրնանք ըսել, թէ Վարդան իրը եւ
Սեպուհ Մամիկոնեան Նախարարութեան, իր հօր
Համազասպի ձեռքին տակ գործօն պաշտօն մը ունէր
Մամարապետութեան մէջ:

Իսկ իր հօր մահէն (415) ետքը, երբ 28 տարեկան
էր, ստանձնեց Մամիկոնեանց Տէրութիւնը կամ Տա-
նուտէրութիւնը, ժառանղական իրաւունքով, իրբեւ
անդրանիկը իր եղբայրներուն:

Եւ յայտնի վկայութիւններ կան պատմութեան
մէջ, որոնք ցոյց կուտան, թէ Վարդան իրը եւ Տէր
Մամիկոնեան Տան, իրբեւ կարող զօրական, իրբեւ
ուսեալ եւ ներկայանալի անձնաւորութիւն, յաճախ
դանուած է կարեւոր եւ բարձր պաշտօններու մէջ:

Զոր օրինակ. Մ. Խորենացի կը պատմէ, թէ
Վոամ Ե. (410-438), որ ծանօթ է իր Գոռ (Յիո,
Վայրի էշ) տիտղոսով, երբ հաշտութիւն կնքեց Յու-
նաց հետ, սկսաւ ճնշել Պարսկաստանի դրօշին տակ
դանուող փոքրիկ ազգերը:

Վոամին նեղութիւնները այնքան խստացան եւ
անհանդուրժելի եղան պարսկաբաժին Հայաստանի
մէջ, որ Մեծն Սահակ ստիլսուեցաւ անցնիլ յունա-
կան Հայաստան: Բայց հոն ալ Բիւզանդական կա-
ռավարութեան պաշտօնեաններ չուզեցին ճանչնաւ
Կաթողիկոսին հեղինակութիւնը, եւ հետեւարար
թոյլ չտուին, որ նորագիւտ Հայ այրութենքը ուսու-
ցուի եւ տարածուի Հայոց մէջ:

Մեծն Սահակ պարտաւորուեցաւ դիմել Բիւզան-
դիոն, թէ՛ Թէոդոս Բ. Կայսեր (408-450) եւ թէ՛
Աստիկոս Պատրիարքին, ծագումով Հայ (406-426),
որպէս զի վերջ տրուին այդ արգելքներուն: Այս
դիմումը ըրաւ պատկառելի պատզամաւորութեամբ

մը, 420ին, որու գլուխ նշանակեց Ս. Մեսրոպն ու իւր թռո Վարդանը։ Պատգամաւորութեան միւս անդամներէն յիշուած են Ս. Ղեւոնդին եւ Դերջանու Եպիսկոպոս Գնիթին անունները. բայց Ս. Ղեւոնդ կը մնայ ի Մելիտինէ, եւ Գնիթ Եպիսկոպոս կ'երթայ մինչեւ Բիւզանդիոն։

Պատգամաւորութիւնը յաջողութեամբ ի գլուխ հանեց իր պաշտօնը, եւ այս առթիւ երկու գլխաւոր պատգամաւորներ պատուեցան բարձր աստիճաններով։ Ս. Մեսրոպին տրուեցաւ Առաջին Վարդապետ աստիճանը (յունարէն՝ Ակրոմիդ եւ Եկպեսիաստիկոս բառերով ճշգուած)։ իսկ Վարդանին տրուեցաւ Ստրատելատ գինուորական աստիճանը, որ կը նշանակէ Զօրավար, Զօրագլուխ, Սպարապետ։

Մեծն Սահակ յունարաժին Հայաստանի մէջ թողուց Ս. Մեսրոպը եւ Վարդանին երկու եղբայրները, Հմայեակ եւ Համազասպեան, որպէս զի հոն օգնեն Ս. Մեսրոպի գրական եւ կրօնական աշխատութեանց, իսկ ինքն Հայ նախարարաց խնդրանքով, Վարդանի հետ վերադարձաւ Այրարատեան գաւառ, ուր նախարարական ժողով մը գումարեց (422), եւ այդ ժողովին մէջ որոշուեցաւ պատգամաւորութիւն մը զրկել Տիգրոն, որպէս զի Վասմաշապուհի որդի Արտաշէսը թագաւոր ըլլայ պարսկարաժին Հայաստանի վրայ։

Այս պատգամաւորութեան գլուխ նշանակուեցան Սմբատ Ասպետ եւ Վարդան Ստրատելատ։

Վասմ Ե., որ արդէն Սմբատ Ասպետի միջոցաւ որոշած էր սիրաշահիլ Հայ նախարարութիւնը, կատարեց պատգամաւորութեան խնդիրքը, եւ թագա-

ւորեցուց Արտաշէս Գ.ը Հայոց վրայ, Արտաշիր անունով, որ եղաւ Հայոց վերջին Արշակունի թագաւորը (422–428)։

Բայտ իս, այս առթիւ Վուամ Ե. ճանչցաւ Թէոդոս Բ. Կայսեր կողմէ Վարդանին տրուած Ստրատելատութեան աստիճանը։ Որովհետեւ շատ բնական է, որ երբ Հայոց թագաւոր մը տուաւ, տուաւ նաեւ անոր Սպարապետը։

Հայ նախարարք չսիրեցին Արտաշէսը, եւ որոշեցին գահնկեց ընել տալ զայն։ Մեծն Սահակ խստիւ հակառակեցաւ անոնց։ Իսկ նախարարք թէ՛ թագաւորը եւ թէ՛ Կաթողիկոսը միանդամայն ամբաստանեցին Վուամ Ե. ի առջեւ՝ իբրեւ յունասէրներ։

Արտաշէս եւ Սահակ կանչուեցան Դուռը։ Վուամ Ե. բռնադատեց զՍահակ որպէս զի միաբանի նախարարաց հետ եւ ամբաստանէ Արտաշէսը, այն խոստումով որ Վարդան, իր թոռը, պիտի կարգուի Հայոց վրայ այնպիսի բարձր պաշտօնով մը, որ գուգահաւասար է քաֆաւորին եւ համապատիւ։

Մեծն Սահակ մերժեց այսպիսի դաւաճանական սակարկութիւն մը։ Հետեւաբար Արտաշէս զրկուեցաւ իր թագաւորութենէն, եւ ինքն Սահակ ալ իր Կաթողիկոսութենէն եւ երկուքն ալ վար դրուեցան։ Արտաշէսին տեղ Հայաստանի վրայ Մարզպան կարգուեցաւ Վեհաջրապուհ անուն Պարսիկ մը, իսկ Մեծն Սահակին տեղ հետզհետէ գործակալ-կաթողիկոս եղան Սուրբակ եւ Բրգիշոյ անուն Ասորի եպիսկոպոսներ։

Այս վիճակը երեք տարի հազիւ տեւեց։ Մեծն Սահակ մինտուեցաւ։ Պատգամաւորութիւններ դըր-

կուեցան վոսամ Ե.ին, որ այս անդամ թէեւ թոյլ տուաւ Սահակին վերագառնալ Հայաստան եւ վարել կաթողիկոսութեան հոգեւոր իշխանութիւնը, բայց ընդուխմափառ եւ հակառակաթոռ գործակալ-կաթուկիոս մըն ալ նշանակեց, որպէս զի սա գործակցի Մարզպանին, հարկերու, դատական խնդիրներու եւ Մարզպանին, հարկերու, դատական կամաց» հսկելու համար: Այս ուրիշ «աշխարհական կարգաց» հսկելու համար: Այս ալ Ասորի եպիսկոպոս մըն էր Շմուէլ անունով:

Սահակ այս առթիւ մեծ համարձակութեամբ եւ պերճախօսութեամբ արդարացուց ինքղինքը, թուեց իր ծառայութիւնները, պախարակեց եւ չքացուց իր հակառակորդներուն բոլոր ամբաստանութիւնները, եւ իրեւ քաջաբան եւ ուժգինասիրտ մարդ՝ այնպիսի տպաւորութիւն մը թողուց վուամին վրայ, որ սա գանձերով վարձատրել զինքն: Բայց Մեծն ուզեց գանձերով վարձատրել զինքն: Բայց Սահակ մերժեց դրամական ուեւէ պարզեւ, եւ ատոնց տեղ ինչըրեց վերահաստատութիւնը այն Նախարարութեանց, որոնք զրկուած էին իրենց դահերէն եւ իրաւունքներէն:

Վոսամ հաւանեցաւ, կատարեց ազգասէր եւ վեհանձն Սահակին բոլոր ինդիրքը, եւ այս առթիւ հաստատեց նաեւ «զբոն նորա զՎարդան Ստրատելանի ի տէրութիւն իւր ազգին Մամիկոննից» (Մ. Խոր. Գ. կե.):

Այդ դէպքեր տեղի ունեցան 431-432 տարիներու ընթացքին:

Եւ այդ հաստատութիւնը կը նշանակէ թէ Քաջն Վարդան, ո՛չ միայն Տէր, Նախապետ կամ Նախարար եղաւ Մամիկոննան Տոհմին, այլ նաեւ Սպարապետ Հայ բանակին:

ՍՊԱՐԱՊԵՏՈՒԹԵԱՆ ՆՇԱՆԱԿՈՒԹԻՒՆԸ

Պ ԱՅ Փ. Բուզանդի՝ Սպարապետութիւն է «իշխանութիւն բովանդակ ի վերայ ամենայն գորաց բազմութեան Մեծաց Հայոց» (Փ. Բուզ. Գ. բ.):

Ալիշան տարբերութիւն մը կը դնէ Սպարապետութիւն եւ Ասպետութիւն պաշտօններուն կամ աստիճաններուն մէջ:

Հստ Ալիշանի՝ Սպարապետն առաջնորդ է հետեւակ գունդերու. իսկ Ասպետ՝ Հրամանատարն է այրուժիոյն, այսինքն՝ հեծեալ գունդերու:

Ասպետութիւնը յատուկ էր Բագրատուննեաց Նախարարութեան. իսկ Սպարապետութիւնը՝ Մամիկոննեանց:

Բայց յայտնի է, որ այս երկու պաշտօններն ալ միացած էին միեւնոյն անձի վրայ. այնպէս որ Բագրատունի Սահակ Ասպետ՝ կոչուած է միանգամայն Սպարապետ:

Եւ որովհետեւ Սպարապետութիւնը սեփական էր Մամիկոննան Նախարարութեան, կ'երեւի թէ Մամիկոննեանց գլուխը փորձանք մը եկած է պահ մը՝ Պարսիկ կառավարութեան կողմէ, եւ այդ պատճառաւ Մամիկոննանք զրկուած են Սպարապետութեաւ Մամիկոննեան Տոհմին, եւ Հայ բանակին Հրամանատարութիւնը անցած է Բագրատուննեաց:

Վերջապէս իրողութիւնը սա՛ է, որ Քաջն Վարդան 431-32ին կը վերահաստատուի Մամիկոննան Դանուտէրութեան Տոհմին, եւ Հայ բանակին:

կի հրամանատարութեան պաշտօնին մէջ, Վռամ Ե.ի կողմէն, եւ Հայ բանակին հրամանատարութիւնը կը ծաւալի թէ՛ այրուձիոյն եւ թէ՛ հետեւակներու վը-րայ:

Վարդանանց պատերազմը տեղի ունեցաւ 451ին, եւ գիտենք որ Քաջն Վարդան էր վաթսուն հազար-ներու Սպարապետը: Ուրեմն, Վարդան Մամիկոն-եան տասնը իննին քան տարի շարունակ Սպարապետ եղաւ Հայ բանակին, եւ Հայ Ազգին կամքով՝ վերջին անգամ առաջնորդեց անոր Աւարայրի դաշտը, ուր ինկաւ նիզակ ի ձեռին . . . :

ՎԱՐԴԱՆԻՆ ԱՌԱՆՁՆԱՑՈՒՄԸ ՄՈԿԱՑ ԼԵՇՆԵՐՈՒՆ ՄԷԶ

ՍՈՂԻԿ կը պատմէ, թէ Արտաշէս թագաւորի մահէն ետքը՝ (1) Հայ նախարարներ ժողով ըրին եւ Սպարապետ կարգեցին «զսուրբն Վարդան», թէ Վարդան տասնը ինը տարի վարեց Հայ բանակին Սպարապետութիւնը, մինչեւ Վարդանանց պատերազմը, որուն մէջ մեռաւ Փի վերայ սուրբ ուխտի եւ քրիստոնէական հաւատոց ի դաշտին Աւերայրի, ի գաւառին Արտազու (Ասողիկ, Բ. թ.):

(1) Աւելի միշտ է ըսկը՝ Արտաշէսի գահազրկութենէթ ետքը, որ եղաւ 431-32ին, որուն վրայ աւելցնելով 19 տարիներն Քարդանի Սպարապետութեան, կ'ունենանք 451, Վարդանց Պատերազմին, ինչպէս նաև իր մահուան քուականը:

Ասողիկ դիտել կուտայ միանգամայն, թէ այս տասնը ինը տարիներու ընթացքին Հայք երեմն հը-նազանդ եղան Պարսից, երբեմն ալ ապստամք: Եւ այս ապստամբութեան պատճառն էր հաւանաբար Արշակունեաց Թագաւորութեան բարձումը, եւ Հայ Արշակունի թագաւորին տեղ Պարսիկ Մարզպանի մը ներկայութիւնը, յանձնին Վեհամիհրշապուհի:

Գիտենք թէ Մամիկոնեանք, իբրեւ դայեակ եւ ազգական Հայ Արշակունեաց, ո՛րչափ տիրասէր եւ անձնուէր եղած էին սկիզբէն իվեր:

Թէ՛ Շահապիվանի Առաջին ժողովին (445) եւ թէ՛ Թովմաս Արծրունիի պատմութիւններէն կը տեղե-կանանք, որ այդ տասնը ինը տարիներու ընթացքին, եւ հաւանաբար 445էն յառաջ, Քաջն Վարդան եւ բո-լոր Մամիկոնեանք քաշուած էին Մոկաց ամուր եւ անմատոյց լեռները, եւ կը մնային Զողայլ (Զոել, Զուայլ) բերդին մէջ, ուր կ'այցելէին Հայոց Սպարա-պետին՝ Մոկաց Յովհան, Ռշտունեաց Սահակ եւ Անձեւացեաց Շմաւոն եսլիսկոպուները, հոգեւոր մը-խիթարութեան համար:

Մոկք կամ Մոկաց Գաւառ, ըստ Ալիշանի, սա-կաւածանօթ է իր անմատչելի լեռներուն եւ Քիւրտե-րու բոնակալութեանց պատճառաւ: Հին Հայաստա-նի այս «աշխարհը», որ նշանաւոր էր իր ծառախիտ անտառներով եւ խորափիտ խոխոմներով, իբրեւ բը-նական վիթխարի ամրութիւն, հիմայ բաժնուած է շատ մը մասերու, որոնց գլխաւորը կ'իյնայ Վանի կուտակալութեան մէջ: Մինչեւ ցարդ Մոկա կը կո-չուի Հայ քաղաքաւան մը՝ գժուարակոխ քարալերի մը վրայ:

Վարդան ամրացաւ այսպիսի երկրի մը լեռներուն մէջ եւ պարզեց ապստամբութեան դրօշը Զըռդայլի վրայ:

Մամիկոնեանց բացակայութեան այս շրջանին է, որ ընկերային, առանին եւ եկեղեցական գեղծումներ կը չեշտուին Հայ ժողովուրդի կենցաղին վրայ, թերեւս հեթանոս կամ Պարսիկ ազդեցութեանց ներքեւ:

Ս. Սահակ եւ Ս. Մեսրոպ շատոնց էին վախճաներ: Ընդդիմափառ Ասորի գործակալ-կաթողիկոսներէն զզուած էր ժողովուրդը: Սահակ-Մեսրոպեան Դպրոցէն Յովսէփ Եպիս., ըստ Ասորիկի, կաթողիկոս ընտրուեցաւ Հայոց Եպիսկոպոսներու կողմէն եւ Քաջն Վարդանի հրամանաւ նստաւ «յաթոռ Կաթողիկոսութեան»:

Դիտելի է նաեւ, որ այս շրջանին մէջ վերջ կը գտնէ Պարսիկ Մարզպանին (Վեհմիհրշապուհ) 13 տարուան իշխանութիւնը, որ Արտաշէս Գ.ի գահազըրկութենէն անմիջապէս յետոյ (428) զրկուած էր Հայաստան, եւ Սիւնեաց Տէր հանրածանօթ Վասակ՝ Մարզպան կը կարգուի պարսկաբաժին Հայաստանի վրայ (441), Յաղկերտ Բ.ի կողմէն:

Կ'արժէ յիշատակել նաեւ, որ Վահան Ամատունի Հայրաբար կը վարէր Հայոց աշխարհին հազարապետութիւնը (վերակացուութիւն), իսկ Վրիւ Խորխոսունի վրայ էր Մալյսապութեան (թիկնապահութիւն?) պաշտօնը:

Այս բոլորը կը նշանակեն, թէ պարսկաբաժին Հայաստանի մէջ կերպով մը Հայկական ինքնավարութիւն հաստատուած էր, եւ Մամիկոնեանք այլեւս չէին կընար վակուած մնալ Մոկաց ամրութիւննե-

րուն մէջ: Եւ մեզ շատ հաւանական կը թուի, որ Հայոց Սպարապետն այս միջոցին, այսինքն՝ 441էն ետքը վար իջած ըլլայ Մոկաց լեռներէն միանալու համար նորահաստատ Հայ Մարզպանին:

Յովսէփ Ա. Կաթողիկոսին առաջին գործը եղաւ ժողով մը գումարել ի Շահապիվան, վերցընելու համար տիրող գեղծումները:

Կ'արժէ գիտնալ, որ ոսկեղարեան եւ հայերէնապիր Հայաստանի այս առաջին ազգային ժողովի տեղեկագրին մէջ չիշուուիր Յովսէփ Կաթողիկոսին ո'չ նախաձեռնութիւնը, ո'չ ալ ներկայութիւնը:

Իսկ Քաջն Վարդանի, ինչպէս նաեւ իր փեսին Արշաւր Կամսարականի, նոյնակս Մանամիհը Ռըշտունիի եւ Զիկ Դիմաքսեանի անունները կը յիշուին այդ տեղեկագրին ինչ ինչ օրինակներու մէջ միայն:

Սակայն շատ հաւանական է, որ այդպիսի կարեւոր ժողով մը չէր կընար գումարուիլ առանց նախագահութեան Հայոց Կաթողիկոսին եւ առանց հաւանութեան եւ գործակցութեան Մամիկոնեան Սպարապետին:

Շահապիվանի այս Առաջին ժողովը գումարուեցաւ 445ի Նաւասարդին (Օգոստոս) մէջ, Ամանորի տօնին(1):

(1) Շահապիվան շատ նշանաւոր վայր մըն է քէ՛ իր բնական դիրքով ու գեղեցկութիւններով, եւ քէ՛ իր պատմական դեպքերով: Այստեղ սաշափը միայն յիշենք եւ անցնենք, քէ՛ Շահապիվան բուն բանակետոյն է Հայոց Արշակունի քազաւորներուն: Լեռնու վայր մըն էր Շահապիվան, բազերէ (որսի կենդանիներով լի), Ծաղկուն գաւառին մէջ, հոչակաւոր իր Անգղ բերդով եւ Վարշակի ջերմուկով: Հոն էին Հայ քազաւորներէն շատերուն գերեզմանեցը, եւ նախնեացմէ մքերուած

Այդ ժողովին եկան Հայ ազգին բոլոր դասակարգերուն ներկայացուցիչները։ Խմբադրուեցաւ կանոնագիր մը քսան յօդուածներով, որոնք հիմնուած են Լուսաւորչի, Մեծն Ներսէսի, Սահակ-Մեսրոպի կանոնական եւ կարգապահական սկզբունքներով վրայ, աղնուացնելու համար Հայոց ընկերային եւ ամուսնական բարքերը, եւ բարեկարգելու համար Եկեղեցւոյ վարչական գործերը, պատժական խիստ տրամադրութիւններով։

Շահապիվանի ժողովին բոլոր գործերն ալ ակընյայտնի ապացոյց են Մամիկոնեանց նախանձայութեան եւ հաւատարմութեան նախնեաց փառաւոր աւանդութեանց։

Քաջն Վարդանը անդամ մըն ալ կը գտնենք Արտաշատու միւս նշանաւոր ժողովին մէջ, որ տեղի ունեցաւ 449ի վերջերը, Յովսէփ Կաթողիկոսի նախագահութեամբ, պատասխանելու համար Միհրներսեհի ծանօթ պաշտօնագրին, որ սկիզբն եղաւ Վարդանանց Պատերազմին նախընթաց պաշտօնական գործերուն։

Քաղում գտներ։ Քաջն Վարդան հոն անցուց իր վերջին ամառը իր բանակով, վասն զի հիանալի հովոց (ամառանց) մըն էր Շահապիվան (Ղ. Փարպ. էջ 193-94. Հմբու. էջ 457)։

Շահապիվան կ'իյնայ Բագրեւանդ գաւառին մէջ, Պայտագիտի շրջանակ, եւ Բագրեւանդ հշանաւոր է ինչպէս իր հին գիտի շրջանակ, եւ Բագրեւանդ հշանաւոր է ինչպէս իր հրաշագիտներով, նոյնպէս Ս. Յովհաննու հոյակապ եւ հրաշակառոյց Եկեղեցիով (Խւչ-Քիւսէ), որ ի սկզբան շինուեցաւ ի յիշատուած Եկեղեցիով (Խւչ-Քիւսէ), որ ի սկզբան մկրտութեան, որ կատարուեցաւ Եփրատի մէջ, Լուսաւորչի ձեռքով, սկսելով Տրդառքագաւորքին։

ՎԱՐԴԱՆԻՆ ԳԵՐԴԱՍԱՆԸ

ՎԱՐԴԱՆԻՆ առանին կեանքին վրայ շատ քիչ տեղեկութիւն հասած է մեզ, եւ ի՞նչ որ հասած է, այնքան զուարթ չէ։

Վարդան ամուսնացաւ, հաւանաբար 407-413 թուականներուն մէջ, երբ 20-25 տարեկան էր։ Իր Տիկնոջ անունը պատմիչներէն յիշուած է Դուստր կամ Դստիկ կամ Դխտիկ ձեւերով, որոնք պարզապէս կը նշանակեն աղջիկ։

Վարդանի կնոջ անունը միայն մէկ անդամ յիշուած է պատմութեան մէջ, Մեծն Սահակի մահուան առթիւ, իբրեւ «աստուածասէր իշխանակին», որ տէր կ'ըլլայ Սուրբ Հայրապետի նշխարքին, եւ զայն Բագրեւանդէն փոխադրել կուտայ Մշոյ Աշտիշատ գիւղը, որ սեփական կալուածն էր Կաթողիկոսական Տան։

Վարդան ունեցաւ միայն երկու աղջիկ զաւակներ։ — ՎԱՐԴԵՆԻ եւ ՎԱՐԴԱՆՈՅՑ։

Վարդենի, որ Ճառընտիրներու մէջ Վարդանի, Վարդանուի եւ Վարդուի ձեւերով ալ գրուած կը գտնուի, գգուական անունով՝ կոչուած է նաեւ Շուշան կամ Շուշանիկ։

Շուշանիկ ամուսնացած է Վրաց Բգեշի Վազգէնի հետ(1)։

(1) Այս Վազգէնի հայրը, Աշուշա եւ Քաջն Վարդանին եղբայրը Հմայեակ՝ մենեկալ էին։ Հմայեակին կնոջ անունն էր Զուիկ, իսկ Աշուշայինը՝ Անուշ-Վուս։ Խմչպէս կ'նրեւի երկու իշխանական տումեր արդէն խնամեցած էին։

Շուշանիկին ամուսնական կեանքը եղերերդութիւն մը եղաւ՝ իւր հօր նահատակութենէն ետքը։ Վասն զի Վարդէն, յայտնի չէ թէ ի՞նչ պատճառաւ, — թէեւ պատմիչներ պատճառ ցոյց կուսուն իր «կտի և անառակ» վարքը — ուրացաւ իր հաւատքը, ընդունեցաւ Պարսից դենը, եւ ամուսնացաւ Շահի գոքանչին հետ, եւ այսպէս եղծեց եւ պղծեց իր քրիստոնէական ամուսնութեան պատակը, եւ աւելի մեծ յանդըդնութեամբ ստիպեց Շուշանն ալ, որ իրեն պէս ուրացող ըլլայ։

Շուշան Քաջն Վարդանի պէս դիւցազնի մը աղջիկ եւ Մեծն Սահակի պէս Կաթողիկոսի մը թոռնիկն էր, եւ հետեւարար տեղի չտուաւ։

Վարդէն Յուրտաւի Ուկրէթ բանտին մէջ եօթը տարի չարչարեց Շուշանիկը, որպէս զի տեղի տայ. բայց Շուշանիկ ամուր եւ անաղարտ պահեց իր նկարադիրը, եւ նահատակուեցաւ բանտին մէջ, իր քառասուն հինգ տարեկան հասակին, 458ին։

Շուշանիկ չորս զաւակ ունեցաւ Վարդէնէն, երեք մանչ եւ մէկ աղջիկ. մանչերէն մէկը զոհ գնաց կուր գետին, երբ բանտի մէջ էր ինքն. իսկ անօրէնն Վարդէն սպաննուեցաւ (481-2) Վախթանգի ձեռքով։

Քաջն Վարդանին միւս աղջկան — Վարդանուշին — կեանքը անձանօթ է մեզ։ Միայն գիտենք որ նա տիկին եղաւ Կամսարականաց տան։ Իր ամուսինն է Քաջն Արշաւիր Կամսարական, որ Վարդանին թեւ թիկունքն էր պատերազմներու մէջ։

Արշաւիր՝ չինկաւ Աւարայրի դաշտին մէջ։ Նա զօրաւոր դատախազ մը եղաւ Վասակին դէմ, Տիղրոնի արքունիքին մէջ, մեծ դատավարութեան ատեն, եւ կորովի կերպով պաշտպանեց Վարդանանց

դատը։ Արշաւիր յետոյ՝ զինակից եղաւ Վահան Մամիկոնեանին, եւ բախտ ունեցաւ տեսնելու Վարդանանց դատին յաջող լուծումը։ Արշաւիր եղաւ նաեւ կենդանի աղբակը Վարդանանց եւ Վահանեանց պատերազմներուն պատմութեան, եւ Ղ. Փարսկեցի այս պատուական զօրականէն քաղեց իր այնքան հետաքրքրական տեղեկութիւնները։

Արշաւիր եւ Վարդանոյց քանի՛ զաւակ ունեցան, չենք գիտեր։ Իրենց երեք մանչ զաւակներուն անունները եւ քաջագործութիւնները արձանագրուած են Վահանեանց պատերազմներուն մէջ։

Ներսէն՝ Տէրն Շիրակայ, Հրահատ եւ Սահակ — ասոնք են Քաջն Վարդանի թոռները, որք շիտակ քալցին իրենց մեծ հօր ճամբէն, եւ ժառանգեցին քաջութեան անունը այնքան փառաւոր կերպով, եւ վայելեցին իրենց քաջագործութիւնները աղզաշէն եւ պահծալի արդիւնքները, չնորդիւ Վահանի ձեռք բերած աղդային ինքնօրէնութեան։

ՎԱՐԴԱՆԻՆ ՆԱՀԱՏԱԿՈՒԹԻՒՆԸ

S ԵՍԱՆՔ թէ Մամիկոնեանց համար ապերջանեկութիւն մըն էր մեռնիլ անկողնի մէջ։ Անոնք կը նախընտրէին մեռնիլ պատերազմի ճակատներուն վրայ։

Քաջն Վարդան՝ դիւցազնարար ինկաւ Աւարայրի ճակատին վրայ, անգամ մըն ալ պանծացնելու համար Մամիկոնեան Տան հոյակապ աւանդութիւնը։

Մամիկոնեանք, ինչպէս որ դիտել տուի սկիզբէն, նուիրուած էին Արդէն եւ Եկեղեցւոյն։ Եւ իրենց նուիրումը հաւասար էր դերագոյն զոհողու-

թեան։ Որովհետեւ Մամիկոնեանց ցեղային սպառման մէջ շատ կարեւոր դեր մը ունի իրենց քաջաբար մեռնիլը պատերազմներու մէջ։

Մամիկոնեանք հաւատարիմ էին, իրենց կեանքին գնով, ո՛չ միայն իրենց Ազգին, այլ նաեւ գերիշխան պետութեանց։

Վարդան, իր նահատակութեան դիշերը, երբ կը խրախուսէր իր վաթսուն հազար զինակիցները, կ'ըսէր թէ ինքն շատ մը պատերազմներու մէջ մտեր ելերէ, որուն իբր վկայ մատնանիշ կ'ընէր իր ստացած վէրքերն ու սպիները։ Այդ պատերազմներուն թիւը, Վարդան Պատմագրի տեղեկութեանց համաձայն ժառանակուն երկու է։ Մամիկոնեան դիւցազնը այս պատերազմները մղեց մէծ մասսամբ ի հաշիւ Պարսիկ Կառավարութեան, եւ Յազկերտ Բ. իր աչքերով տեսած էր այդ պատերազմներու ամէնէն փառաւորներէն մէկը, երբ Վարդան իր քաջասրտութեամբ եւ իր քաջարի գնդով ի սպառութիւն մատնեց թշնամին (Քուշանները) Մարվի Ռոտ գետին եզերքը, ըստ պաշտօնական յայտարարութեան Միհրներսէքի։

Դ. Փարսէցի հրաշալի դրուագ մը արձանագրած է Քաջն Վարդանի կեանքէն։ — Երբ երեք ազգաց (Հայոց, Վրաց եւ Աղուանից) զինուորական եւ եկեղեցական երեւելիները Տիղբոնի մէջ վար դրուեցան, եւ Յազկերտ Բ. առաջարկեց անոնց, որ պէտք է թողուն քրիստոնէութիւնը եւ ընդունին Պարսից դեհը, Հայոց Սպարապետը «աներկիւղ եւ քաջասիրտ մըտօք», իբրեւ պատասխան սա՛ կերպով խօսեցաւ Յազկերտին։

— «Այս երեք երկիրներու ներկայացուցիչներուն մէջ շատեր կան, որ ինէ աւելի վե՛ր են, թէ՛ աստիւ-

ճանով եւ թէ՛ տարիքով. շատեր ալ կան, որ վարեն. եւ մեր մատուցած ծառայութիւնները եւ հպատակութիւնը ո՛չ միայն դուք լաւ գիտէք, այլ նաեւ զայն գիտէ բոլոր Արեաց ազգը, եւ հետեւաբար աւելորդ է խօսիլ այդ մասին։ Բայց ես սաշակը կ'ուզեմ ըսել, թէ՛ այսօր եւ թէ՛ ասկէ յառաջ միտքս դրած եմ, որ եթէ հնար է բազմապատկեմ ինքնինքս, ինչպէս նաեւ ոյժերս եւ պատրաստակամութիւնս աւելի եւս շատցընեմ, եւ իմ բոլոր հարստութիւնս եւ ինչքս ծախսեմ ի նպաստ Արեաց աշխարհին։ Ասիկա միտքս դրած եմ եւ պիտի ընեմ. բայց իմ կրօնքս, զոր մանկութենէս սորված եմ Աստուծմէ, չեմ կըրնար փոխել՝ ձեզմէ վախնալով։ Եթէ ես մարդոցմէ սորված ըլլայի ճշմարիտ հաւատքը, եւ այս հաւատքը ուրանայի, շատ ողորմելի պիտի ըլլայի. Թո՛ղ որ ես Աստուծոյ բերնէն ընդունած եւ սորված եմ իմ հաւատքս, եւ հետեւաբար չեմ կրնար վաճառել զայն վախով կամ սնոտի փառքերու սիրուն. Քա՛ւ լիցի. ատանկ բան չեմ կրնար ընել։ Այս է իմ պատասխանս եւ կ'ուզեմ մեռնիլ ասոր համար քան թէ իբրեւ ուրացող ապրիլ, առանց Աստուծոյ։

Իսկ ասոնք, որ հոս կեցած են ձեր առջեւ եւ քրիստոնեայ մարդիկ են, կարող են պատասխանել իւրաքանչիւրը իր հաշոյն։

Յազկերտին երեսը գունատեցաւ, սաստիկ զայրոյթով, այնպէս որ երեք երկիրներու ներկայացուցիչներ խօսեմութիւն սեպեցին ներողութիւն խնդրել Շահէն, քանի մը օր խորհելու եւ իրենց պատասխանը տալու համար։

Այդ քանի մը օրուան մէջ երեք երկիրներու նախարարներ շատ խորհեցան, քննեցին, եւ վերջապէս

որոշեցին առ իրեսս ուրանալ, որպէս զի անդամ մը աղատին, եւ երբ վերադառնան իրենց երկիրներ կամ ապստամբութեան դրօշ կը պարզեն եւ իրենց արեան դնով կը պաշտպանեն իրենց հաւատքը, եւ կամ տունով տեղով կը գաղթեն Յունաց բաժինը, եւ հո՛ն աշատօրէն կը պահեն իրենց քրիստոնէական հաւատքը:

Այս որոշումը տուին իրենց մէջ քանի մը օր դիշեր ցորեկ մտածելէ եւ խորհրդակցելէ յետոյ, բայց չյանդգնեցան իրենց որոշումը յայտնել Վարդանին, որովհետեւ դիտէին թէ Վարդան պիտի չհաւանէր: Բայց չէին կրնար ալ չյայտնել: — «Քանզի գլուխին եթքէ առանց նորա ամենայն խորհեալքն ի նոցանէ եւ պատճառադրութիւնն եւ արարուածք՝ քերիք են եւ անկատարք» (Ղ. Փարպ. էջ 159):

Վերջապէս, շատ մը վարանումներէ ետքը, յայտնեցին իրենց խորհուրդը: Վարդան յուղուեցաւ մէծապէս, եւ կտրուկ կերպով ըստ անոնց, թէ ինքն ամենեւին հոդ չըներ իր կնոջ եւ տան համար, եւ հաստատ կը մնայ իր որոշման վրայ: Դուք, դիտել տուաւ անոնց, ամէն կերպով երեւելի էք, իրբեւ աղատ, իրբեւ քաջ զինուոր, իրբեւ հաւատացեալ մարդիկ, եւ կարող էք ընել այնպէս ինչպէս որ օգտակար կը կարծէք: ամէն ոք պատասխանառու է իր անձին: գացէք ըրէք ինչպէս որ կուպէք, բայց այդպէս բան մի՞ ըսէք ինձի: վասն զի ինչ որ չեմ ուզեր լսել, չեմ ալ ուզեր գործադրել:

Նախարարք բոլորովին արտմեցան, որովհետեւ ստուգիւ անկեղծ էին, եւ ուրիշ ճար չկար իրենց համար, եթէ ոչ կեղծուրացութեամբ անդամ մը իրենց օձիքը աղատել Յաղկերտի ձեռքէն, եւ վերադառնալով իրենց տեղերը՝ պարզել ապըստամբու-

թեան դրօշը: Ինչպէս կ'երեւի պատմութեան ընթացքէն, Նախարարք վերջապէս համաձայնեցան միայն մէկ ծրագիր գործադրել, այսինքն՝ փոխանակ դաղթելու Յունաց կողմը, մնալ իրենց երկիրներուն մէջ, եւ պաշտպանել իրենց հաւատքը:

Մոկաց իշխան Արտակ, որ «համեստ, մտացի եւ քաջ» անձ մըն էր, իրբեւ մտերիմ Հայոց Սպարապետին, երեք երկիրներուն նախարարաց թախանձանքին վրայ, սկսաւ մօտենալ Վարդանին եւ համոզել որ հաւանի կեղծուրացութեան ծրագրին: Իշխան Արտակին մասնաւորապէս ոյժ տուաւ Վրաց Բուշին Աշուշա, շատ խելացի անձ մը, որ ինչպէս յառաջազոյն ալ դիտել տուի, խնամի էր Վարդանի Տան, իրբեւ քենեկալ՝ իր եղոր Հմայեակին: Վերջապէս կոչում ընելով իր ասպետական ոգւոյն, իր Սուրբ Գրոց հմտութեան եւ պնդելով Հոռմ. Թ. 3-4 համարին վրայ, ուր Առաքեալը կը նախընտրէ նզովուիլ Քրիստոսէն, իր մարմնաւոր զաւկաց եւ ազգականաց համար, մէծ դժուարութեամբ պարտաւորեցին զՎարդան, որ հաւանի իրենց ծրագրին, եւ Աւետարանի վրայ ձեռք դնելով երդում ըրին հանդիսաւորապէս, եւ ուխտեցին միաբանութեամբ ի գլուխ հանել այդ ծրագիրը: որոշեցին նաեւ ուխտադրութեամբ լուծել երեք երկիրներուն կրելիք բոլոր փասներուն վրէժը:

Աւետարանը այդպէս ահաւոր երդումներով կընքուեցաւ, եւ հաւատացեալն Վարդան ստիպուեցաւ համակերպիլ կեղծուրացութեան: — «յարտասուհարեալ յանձն առ վայր մի զպատճառանօք վիրաւորին վասն երեցունց աշխարհացն եւ բազմութեանց ՚ի նոսա արանց եւ կանանց» (Անդ, էջ 170):

Յազկերտ կարծեց, որ յաջողեցաւ. մեծ մեծ պարդեւներով արձակեց երեք երկիրներու նախարարները՝ իրենց տեղերը։ Եւ այս առթիւ իւրաքանչիւր նախարար բան մը ըստ իր ցեղին հաւատարմութիւնը յայտնելու համար Պարսից Գահուն, փայլուն խօսքերով։

Իսկ Վարդան, իր կեղծուրացութեան դիմակին տակ, այնպիսի յայտարարութիւն մը ըրաւ Յազկերտի առջեւ, որ ամբողջ խորհուրդ է։

— «Իմ նախնեաց հպատակութիւնը եւ ծառայութիւնը թէ՛ այս գահուն եւ թէ՛ ձեր անձին, դուք շատ լաւ գիտէք, եւ աւելորդ է որ ես կրկնեմ զանոնք։ Իսկ ես, թէեւ շատ «նուազ» էի քան իմ նախնիքը, բայց միտքս դրած էի «արդար վաստակօք» (հաւատարիմ ծառայութեամբ) հաճելի ըլլալ ձեզ, եւ ձեր հրամանով, ո՛ր գործի որ գացի, տեսան ձեր զօրավարները, ինչպէս նաեւ իմ ընկերներս, թէ իմ ուժերուս համեմատ բոլորովին անկեղծ հաւատարմութեամբ ըրի այդ գործերն ու ծառայութիւնները։

Բայց այսուհետեւ իմ կամքս սա է. եթէ մինչեւ իիմայ ըրածներս արժանի չեղան յիշատակութեան կամ գովեստի, բայց ասկից ետքը պիտի աշխատիմ իմ բոլոր ուժով եւ զօրութեամբ եւ Աստուծոյ օգնութեամբ այնպիսի գործ մը ընել, որուն համբաւ պիտի պատմուի ո՛չ միայն Արեաց աշխարհին (Պարսկաստան) մէջ, ձեր առջեւ, այլ նաեւ Բիւզանդիոնի (Կ. Պոլիս) կայսերական պալատին մէջ, եւ թէ՛ ուրիշ ազգերու մէջ, մինչեւ յաւիտեան»(1)։

(1) Այս յայտարարութեան եւ ուխտին բնագիրը տե՛ս այս գիրքին սկիզբը։

Վարդան այս յայտարարութեամբ կը խորհրդաւրէր իրենց ապստամբութիւնն ու իր նահատակութիւնը. բայց Յազկերտ եւ իր աւագանին՝ իրենց նըպաստաւոր կերպով հասկըցան զայն, եւ մեծապէս շնորհակալ եղան Մամիկոնեան Քաջին եւ գովեստներ տուին իրեն։

Այս կեղծուրացութիւնը շատ գէշ տպաւորութիւն մը գործեց Հայաստանի մէջ. որովհետեւ իւրական կարծուեցաւ այդ. մանաւանդ տեսնելով եօթը հարիւրէ աւելի մողերու կարաւանը, որոնք ընկերացեր էին նախարարաց՝ Հայաստանը կրօնափոխ ընելու համար։ Ինչպէս կ'երեւի, Վարդանին դիրքը դժուարացաւ. նախարարք կարծես պահ մը թուլցան։

Վարդան այդ միջոցին աւելի գործնական կը համարի, իր առաջին ծրագրին համեմատ, հեռանալ Պարսկաբաժին Հայաստանէն եւ անցնիլ «ի կողմանս իշխանութեան Յունաց», եւ իրօք ճամբայ կ'ելլէ իր եւ իր եղբարց ամբողջ գերդաստանով եւ իրենց գաղափարակիցներով, եւ կը հասնի Բագրեւանդ նաշնդին Արաման դիւլը։

Այս յանկարծական եւ անշօռվակ մեկնումը գէշ կերպով ցնցեց Մարզպանն (Վասակ) ու նախարարները։ Անզամ մըն ալ զգացին անոնք, թէ առանց Մամիկոնեան քաջերու պիտի չկրնային բան մը ընել։ Հետեւաբար, առանց ժամանակ կորսնցնելու, նամակ գրեցին, պատկառելի պատգամաւորութիւն մը դըրկեցին, Վարդանին ետեւէն, Ղեւոնդ երէցի գլխաւորութեամբ, Երդման Աւետարանին հետ։

Պատգամաւորութիւնը հասաւ Արաման գիւղը, հասաւ նաեւ իր նպատակին. վասն զի, Վարդան բա-

ցէ ի բաց մատնանիշ ընելով հանդերձ իր անվստահութիւնը նախարարաց վրայ եւ դիտել տալով հանդերձ, թէ Մամիկոնեան Տունը միշտ տուժած է նեղ օրերու մէջ, խոնարհեցաւ անդամ մըն ալ Ազգի ձայնին առջեւ, որ կը նուիրագործուէր դարձեալ Աւետարանին վրայ երդումով եւ ուխտով, եւ վերադարձաւ «ի բանակն Հայոց», իր եղբայրներուն եւ սիրելիներուն հետ:

Վարդանին վերադարձը հրահրեց ապստամբութեան կայծը Հայ խղճանքին մէջ:

Վարդան գործի սկսաւ. Հայոց բանակը կեղրոնացուց Ծաղկուն գաւառի մէջ, Անդղ բերդին մօտ, տաք օգերը անցընելու համար:

Այդ Անդղի եկեղեցւոյն դրան առջեւն էր որ 450, Յունիս 25ին, Ղեւոնդ Երէց իր խումբով առաջին դիմագրութիւնը ըրաւ եւ քարկոծելով հալածեցին մոգերը, որոնք եկած էին դրաւելու այդ եկեղեցին եւ ատրուչան հաստատելու հոն փոխանակ սուրբ սեղանին:

Վարդան, տեսնելով որ ապստամբական շարժումներ կը ծաւալին ամէն կողմ, եւ կարելի չէ այլեւս ծածկել իրողութիւնը, ժողովի հրաւիրեց բոլոր մեծ նախարարները, սեպուհները, եկեղեցականները, եւ այդ ժողովին մէջ որոշեցին պաշտօնապէս դիմել Մարգարան Վասակին, եւ ստիպել դայն, որ առանց այլեւայլի գործի սկսին:

Վասակ վարանեցաւ պահ մը. բայց ստիպուեցաւ տեղի տալ. այնպէս որ հո՛ն, Վասակի ապարանքին մէջ, պաշտօնապէս յայտարարեցին իրենց քրիստոնէութիւնը, եւ նոր երդումներով եւ ուխտերով հոչակեցին իրենց հաւատամքը եւ կոռելու ծրադի-

ըը, որոշեցին Բիւզանդիոն դիմել՝ ապահովելու համար Յունաց օդնութիւնը, եւ կնքեցին Երդման Աւետարանը՝ իւրաքանչիւրն իր կնքով, եւ աղօթքով վերջացուցին այդ խորհրդաւոր ժողովը:

Վարդանին առաջին գործը եղաւ բանակը Անդղէն վիստադրել Այրարատ գաւառը. որովհետեւ դաշնակից Աղուաններէն լուր եկաւ որ Միհրներսէ անձամբ եկած է Փայտակարան, եւ գունդեր կը կազմէ՝ Աղւանից վրայէն յարձակելու համար Հայաստանի վըրայ:

Վասակ ուղեց օգտուիլ առիթէն եւ առաջարկեց Վարդանին, որ շուտով դիմէ Աղուանք եւ հո՛ն լմընցընէ Պարսից գործը, առանց թողլու որ Հայաստան անցնին ատոնք:

Ասիկա սակայն պարզ պատճառանք մըն էր. Վասակին բուն նպատակն էր շարժումը կասեցնել, եւ Վարդանը հեռացնելով, կոտրել բանակին ոյժը:

Վարդան առարկեց, ըսելով թէ ինքն պատրաստ է երթալ Աղուանք, բայց անկէ յառաջ պէտք է Բիւզանդիոն զրկել պատղամատրութիւն մը, համաձայն տրուած որոշման:

Վասակ դարձեալ ստիպուեցաւ համակերպիլ, եւ այսպէս պաշտօնական նամակներ գրուեցան Բիւզանդիոն, Յունաց կայսեր, եւ Յունարաժին Հայաստանի Հայ նախարարներուն, նոյն իսկ Անտիոքի Սպարապետին, եւ այդ բոլոր նամակներ կնքուեցան Վասակին պաշտօնական կնքով:

Բիւզանդիոն զրկուած պատղամատրութիւն անդամ նշանակուեցան Վահան Ամատունի, նոյն ինքն Վասակին անձնական հակառակորդը, եւ Սեպուհն Հմայեակ, Վարդանին եղբայրը եւ Մերհութան Արծ-

բունի, Սուրբ Աղանին եղբայրը :

Երբ պատգամաւորութիւնը ճամբայ ելաւ, Վարդան ալ, իր հաւատարիմ նախարարներով եւ անոնց գունդերով բռնեց Աղուանից ճամբան :

Վասակ վարպետօրէն Վարդանին ընկերացուց այն բոլոր Նախարարներն ու Սեպուհները, որոնց ամուր նկարագիրը ծանօթ էր իրեն, որպէս զի դըժուարութիւններ չունենայ իր երկդիմի եւ անվատահելի խաղերը յառաջացնելու համար՝ իրրեւ Մարդման Հայոց Աշխարհին :

Եւ երբ Վարդան ճամբայ ելաւ դէպի Աղուանք, Պարսից գունդերուն դէմ, Վասակ անմիջապէս նամակներ գրեց Միհրներսէհին, եւ Պարսիկ բանակին ուրիշ զօրավարներուն եւ աւագանիին, թէ Վարդան թէեւ ձեր վրայ կուգայ, բայց զուք հոգ մի՛ ընէք. վասն զի Հայ բանակին կարեւոր մասը ես պահած եմ քովս, շատերն ալ ցրուած եմ ասդին անդին, այնպէս որ Վարդան շատ քիչ մարդ ունի :

Վարդան հասաւ Աղուանք. Պարսիկ զօրավարներ լսեցին Հայոց ժամանումը, եւ անմիջապէս անցուցին իրենց գունդերը կուր գետէն, եկան Խաղիսաղ դիւզին մօտ, կտրելու համար Վարդանանց առաջը :

Վարդան տեսաւ, որ սոսկալի բազմութեան մը առջեւ կը գտնուի: Կայծակի արագութեամբ գործի սկսաւ, եռանկիւն կազմեց իր սակաւաթիւ գունդերը, եւ խոյացաւ Պարսից բազմութեան վրայ, որոնք սկսան ետ դառնալ եւ փախչիլ կուր գետին վրայէն: Վարդանանք հալածեցին թշնամին, եւ Արշաւիր Կամսարական, որ ընտիր նետաձիգ մըն էր, գետամոյն ըրաւ շատ մը զօրավարներ եւ նաւավարներ, երբ անոնք ճեպով խոյս կուտային նաւակներու մէջ:

Աղուանից յաղթութիւնը շահեցան Վարդանանք, եւ չուտով անցնելով կուր գետը, հասան Աղուանից եւ Հոնաց սահմանագլխին, եւ Հոն պարիսպին դուռը պահող Պարսիկները սուրէ անցուցին, եւ պահակը յանձնեցին Աղուանից թագաւորական տունէն Վահան անուն իշխանի մը: Եւ այս Վահանին դեսպանութեամբ՝ Հոները եւ ուրիշ լեռնցի ցեղերը դաշինքով միացուցին իրարու, կոուելու համար ընդդէմ Պարսից:

Այս մէջոցին, երբ Վարդանանք Աղուանից երկրին մէջ փառաւոր յաջողութիւններ ձեռք կը բերէին, Վասակ Հայաստանի մէջ ազատ կ'զգար ինքզինք, եւ իրեն զաղափարակից նախարարներով, կը գրժէր իր երդումն եւ ուխտը, եւ նամակներ գրելով Պարսից՝ կը գաշնակցէր անոնց հետ, եւ Հայ բերդերն ու ամրոցները կը պարպէր եւ Պարսից կը յանձնէր զանոնք, եւ Մամիկոնեան, Կամսարական եւ ուրիշ Վարդանի զինակից նախարարութեանց մանչ զաւակները առնելով անոնց գայեակներու ձեռքէն, փոխադրել կուտար Սիւնեաց բերդերը եւ անկից ալ կը զրկէր Պարսից Դուռը:

Այս դաւաճանութեան լուրը արագ հասաւ Վարդանին :

Վարդանանք սաստիկ տրտմեցան, բայց չյուսահատեցան ամենեւին: Երեսուն օրուան մէջ վերադան Այրարատ, ձմրան սկիզբը (450, Նոյեմբ.) , Վարդան իր գունդերուն մէկ մասը արձակեց, որպէս զի երթան իրենց տուներուն մէջ անցընեն տօնական օրերը: Իսկ ինքն իր մօտ մնացողներով՝ պաշարեց Սիւնեաց երկիրը եւ գրեթէ սովամահ ըրաւ զայն:

Աղուանից յաղթութեան տօնը՝ 451 Յունլար 6ի

Ծննդեան տօնին հետ տօնեցին Հայաստանի եկեղեցիները, հոգեւոր վերին իշխանութեան կարգադրութեամբ:

Վասակ ալ կը գործէր առանց յուսահատելու, որպէս զի ժողովուրդը ուժացնէ Վարդանէն, եւ սուս սուս խոսառմաներով եւ յոյսերով կը խարբալէր պարզամիտները՝ կարգ մը եկեղեցական գործիչներու միջոցաւ:

Յարկերտի վրայ ալ շատ գէշ կ'ազդէ Վարդանին յաջողութիւնները Աղուանից երկրին մէջ, եւ այսպէս երկու կողմէն ալ կ'սպասեն, որպէս զի ձմեռն անցնի եւ դարնան պարզուի կացութիւնը:

ԱԻԿՐԱՅՐԻ ՊԱՏԵՐԱՄՁԸ

Ա'լ ԳԱՐՈՒՆ է, 451ին գարունը:
Վարդանանք, մաս մը բանակեղտին մէջ
եւ մեծ մասամբ ցրուած իրենց տուները,
Մեծափոյ օրերը կ'անցընեն հոգեւոր եւ ուազմական
պատրաստութիւններով, եւ գերազոյն ուրախութեամբ մը կը տօնեն Զատիկը, որ հանդիպեցաւ 451
Ապրիլ 8ին (Ահեկան 6):

Վարդան երբ տեղեկացաւ, թէ Պարսիկներ զօրք
կը կերպնացնեն Հեր եւ Զարեւանդ գաւառին մէջ,
փութով ի զէն կոչեց իրեն զինակից նախարարութիւնները:

Անմահութեան տենչով վառ հոգիներ դղրդեցան,
եւ հրեշտակային արագութեամբ մը վաթսուն հազար
Հայ կտրիճներ բոլորուեցան Քաջ Սպարապետին
չուրջ:

Միհրներսէհ երբ իմացաւ Հայոց Սպարապետին
պատրաստութիւնները, բանակը յանձնեց Մուշկան
Նիսալաւուրտ եւ Դողըվճ զօրավարներուն, եւ ինքն
փութաց Տիգրոն, անձամբ պատմելու Յաղկերտին,
ըստ Եղիշէի, իր իմաստուն կարգադրութիւնները եւ
Վասակին խարեբայութիւնները:

Վարդան՝ Պարսից գիրքը եւ զինուորական ոյժը
լրտեսելու համար ընտրեց Ամատունեաց նախարարութենէն Սեպուհն Առանձարը, որ երեք հարիւր հեծեալներով գնաց Հեր եւ Զարեւանդ, տեսաւ, քննեց
ամէն բան, եւ օգտուելով առիթէն՝ յարձակեցաւ
Պարսից բանակին մէկ հզօր վերջապահ գնդին վրայ
եւ սրէ անցուց զայն:

Քաջն Վարդան, ուրախ եւ հպարտ Առանձարի
յաջողութեամբ, ուղեց յանկարծ իյնալ Պարսից բանակին վրայ նոյն անդ՝ Հեր եւ Զարեւանդի մէջ,
որպէս զի առիթ չտայ Պարսիկ զինուորներուն Հայաստան մտնելու, սպաննելու, գերելու եւ այլեւայլ վնասներ հասցնելու:

Սակայն Պարսից զօրավարներ աւելի արագ շարժեցան, եւ չուտով հասան Արտազ գաւառը, եւ Աւարայր գիւղին մօտ ընտրեցին Տղմուտի գաշար, որ «Ճրջափակ տեղ» մըն էր, այսինքն՝ ամէն կողմէ ապահով տեղ մը բանակ զնելու համար:

Վարդան ա՛լ չյապաղեցաւ Այրարատի մէջ, իր
բանակը շարժեց դէպի Աւարայր, 451 Մայիս 25,
Ուրբաթ օր, որպէս զի յանկարծակիի բերէ Պարսից բանակը, եւ մօտեցաւ թշնամւոյն դիրքերուն:

Օրը երեկոյացաւ պատերազմական պատրաստութիւններով:

Հո՛ն էր Հայաստանեայց եկեղեցւոյն պաշտօ-

նէութիւնը, գլխաւարութեամբ Յովսէփ Կաթողիկոսին:

Գիշերն ալ անցաւ հոգեւոր պատրաստութիւններով:

Բովանդակ բանակն աղօթեց զուարթօրէն եւ հաղորդուեցաւ:

Անկնունքներ մկրտուեցան եւ կնքուեցան:

Հեւոնդ Երէց, այդ զարմանալի եկեղեցականը, իր մաքուր ներջնչումներով գոտեալով աղատութեան զինուորները:

Քաջն Վարդան նահատակի մը պայծառաաեսութեամբ խանդավառեց իր զինակիցները եւ իր արիական ոգւով զրահաւորեց զանոնք, յիշեցնելով քաջերու կեանքը եւ իր քաջութիւնները: Բացատրեց անոնց անդամ մըն ալ այս պատերազմին նշանակութիւնը, որ բոլորովին տարրեր է մինչեւ այդ վայրկեան իրենց մզած պատերազմներու նշանակութենէն: Առաջին պատերազմը Հայաստանի խղճմտանքին աղատութեան համար:

Գիշեր կը լուսնայ յուշիկ յուշիկ:

Արեւծագի պահն է, որ կը կարմրի վարդագոյն, 451 Մայիս 26, Շաբաթ օրուան խորհրդով:

Վարդան արդէն կազմած կերտած է իր բանակին ճակատը: Ուխտապահներու ամէնէն քաջ եւ կարող զօրականներ, պատրաստ իրենց գունդերու գլխին, կ'սպասեն յարձակման նշանին:

Եւ կը յարձակի՞ն . . . :

Սաստիկ է բախումը:

Վարդան, որ ըստ Փարպեցւոյ, կը հրամայէր Հայ բանակին ճախ թեւին, ինկաւ Պարսից Մատեան գնդին վրայ. որովհետեւ այդ գունդին հետ էին

նաեւ Վասակ եւ իրեն կուսակից ուխտագրուժներ:

Պարսից սարսափելի եւ անհամեմատօրէն ըստուար բանակին առջեւ տկարացաւ Հայ բանակը: Բայց Հայոց տուած հարուածը շատ սաստիկ եղաւ:

Տղմուտի ափերուն վրայ ինկաւ Քաջն Վարդան:

Վարդանանց ընդհանուր կորուստն եղաւ 1036 հոդի:

Իսկ Պարսից կողմէն ինկած էին 3544 հոդի, որոնց մէջ անշուշտ բազմութիւն մը Վասակեաններէն:

Եւ այս թիւերը ցոյց կուտան, թէ Վարդանանք կուտած են դիւցազնօրէն: Եւ Քաջն Վարդան, Զօրագլուխը այդ առաքինեաց, նախճիրներու սարսափելին գործեց Մատեան գունդին մէջ:

ՎԱՐԴԱՆԻՆ ԱՐԺԱՆԻՔԸ

ՎԱՐԴԱՆԻՆ արժանիքը շատ բարձր է ըստ ինքեան, ինչպէս նաեւ համեմատելով զայն Վասակի հետ:

Վասակ շատ կարող անձնաւորութիւն մըն էր: Վասակ օժտուած էր մտքի մեծ մեծ կարողութիւններով: Պատանութենէն ցոյց տուաւ անկախ, վառասէր, յանդուցն իշխանի մը բոլոր յատկութիւնները:

Երիտասարդութեան ատեն մեծապէս օժանդակէց Ս. Մեսրոպի գրական եւ առաքելական գործունէութեան:

Իր վարած բարձր պաշտօններն ալ ցոյց կուտան, թէ Վասակ թանկագին կարողութիւններով օժտուած Հայ մըն էր: Վասակ ո'չ միայն Միւնեաց

Նախարարութեան Տանուտէր եւ Խշան եղաւ, այլ
եւ Մարդկան եղաւ նախ Վրաստանի, եւ յետոյ Հա-
յաստանի:

Բայց . . . Վասակ Տանուտէր եղաւ Արմեաց Նա-
խարարութեան՝ սպաննել տալով իր հօրեղբայր Վա-
ղենակ Խշանը, որպէս զի օր առաջ յադուրդ տայ իր
փառասիրական ձգումներուն :

Իսկ Վարդանանց շարժման մէջ նենդեց եւ գա-
ւեց Ազգային Դատին, որովհետեւ կ'ուղէր Պարսից
հաճելի ըլլաւ, ամէն զնով, Հայաստանի թագին ի
տենչ . . . :

Ինչպէս կ'երեւի, Վասակ քանի՛ յաջողեցաւ իր
ասպարէզներուն եւ ձեռնարկներուն մէջ, այնքան
շփացաւ, եւ ա՛լ վարպետ Փօլիթքոս մը եղաւ, ո-
րուն համար այլ եւս նշանակութիւն չունէին բա-
րոյական արժէքներ :

Իր նկարագիրը բացարձակապէս անվստահելի
էր: Եւ ասիկայ ցոյց տուաւ ամէն անդամ, որ երկ-
դիմի ընթացքի մը հետեւեցաւ եւ վերջապէս, ա՛լ
ճարահատ, անցաւ Պարսից կողմը, դաւաճանելով
Ազգային կամքին դէմ, իր ուխտին դէմ, եւ մտնե-
լով բազմաթիւ քաջերու եւ ամեղներու արեան:

Վասն զի, եթէ Վասակ հաւատարիմ մնար իր
ուխտին, եւ իր բոլոր ոյժերը եւ կարողութիւննե-
րը Վարդանի պէս նուիրէր Ազգային Դատին, վրս-
տահ եմ որ Աւարայրի պատերազմը կատարեալ
յաղթանակ մը պիտի ըլլար: Եւ ի՞նչ որ Վահան Մա-
միկոնեան տարիներ ետքը յաջողեցաւ ձեռք բերել,
իբրեւ պսակ Վարդանանց դատին, Հայաստան պի-
տի վայելէր նոյն ազատութիւնը, եւ թերեւս աւե-
լին ալ, Աւարայրի պատերազմէն անմիջապէս ետքը:

Այս կէտը շատ կարեւոր է, եւ պէտք է մտա-
հան չընել զայն՝ Վարդանի եւ Վասակի վրայ խօ-
սելու ատեն:

Քաջն Վարդանի արժանիքը քանիցս չեշտուե-
ցաւ Տիզրոնի դատավարութեան մէջ:

Յազկերտ եւ իր աւագանին խորապէս զգացին
Քաջն Վարդանին ի զո՞ւր կորուստը:

Միհրներսէհ, իր բոլոր դառնութիւնը թափեց
Հայ եկեղեցականութեան վրայ, յայտարելով.

— Սպաննեցիք մոգերը, ձեր կախարդութեամբ
կորուսիք Վարդանի պէս քաջ մարդ մը, որ օգտա-
կար էր Շահին. եւ շատ Պարսիկներ եւ զօրագլուխ-
ներ կը յիշեն անոր մէծ մէծ գործերը եւ ծառա-
յութիւնները, զորս նա ըրաւ Պարսկաստանի. անոր
քաջասրտութիւնը նոյն ինքն Շահն անձամբ աեսաւ
ի Մարզիոսոտ: Շատ քիչ մարդիկ կան Պարսկաս-
տանի մէջ, որ կրնան անոր անձին եւ գործին ար-
ժանիքը ի վեր հանել, եւ զուք պատճառ եղաք այն-
պիսի մարդու մը կորստեան:

Իսկ Յազկերտ զայրոյթով կշումբեց Վասակը,
ըսելով անոր երեսն ի վեր.

— Դուն երգումներով խարեցիր մեր այնպիսի
պիտանի, վաստակաւորը, զբացն Վարդան, Կայ-
սեր եւ անոր Սպարապետին նամակներ գրեցիր,
զայն նենգով զրկեցիր Ազգուանից երկիրը Պարսիկ
զօրքերու վրայ, եւ պատճառ եղար իմ Պարսիկ եւ
ոչ-Պարսիկ մարդոց կոտորածին: Որովհետեւ այդ
մեր Վարդանը, եթէ Յունաց Կայսը կամ Հոնաց
թագաւորը բռնութեամբ ուղէին առնել իմ ձեռքէս,
Պարսկաստանի բոլոր ուժով կը կոռէի եւ հանդիսա-
չէի թողուր, մինչեւ որ նորէն ձեռք չբերէի զայն:

Եւ դուն այսպիսի ծառայ մը քու ձեռքովկը սպաննեցիր եւ Հայաստանի պէս պիտանի աշխարհի մը կորստեան պատճառ եղար, եւ հիմայ ալ լրբարար յանդզներ ես գալ մեղ տեսնելու, իբրեւ թէ չենք գիտեր նենգաւոր գործերդ:

Բայց պէտք է գիտնաս, որ այլ եւս Սիւնեաց Տէր չես գուն, եւ այն բոլոր չարիքները, զոր մը-տածեցիր եւ գործադրեցիր, պիտի կուտուին քու չար գլխուդ վրայ: (Ղ. Փարպ. Էջ 260-61. Եւ 280-82):

Այս գնահատումները պաշտօնական են, եւ պաշտօնական ըլլալով հանդերձ բոլորովին կը հա-մապատասխանեն այն իրական եւ արիական յայ-տարարութիւններուն, զորս Քաջն Վարդան անձամբ ըրած էր Յազկերտի առջեւ, երբ բոնադատուեցաւ կեղծուրացութեան:

ԶՈՒԳԱԿՇԻՐ ՔԱԶՆ ՎԱՐԴԱՆԻ ԵՒ ՎԱՏՆ ՎԱՍԱԿԻ

ՎԱՐԴԱՆ բաց ճակատով գործեց: Վասակ նեն-գամտութեամբ սոլոսկեցաւ: Վարդան հա-ւատարիմ էր առաջադրուած դատին, Վասակ իր փառքին իրականացուամը կ'երազէր հոն: Վարդան հասկցուած էր ուխտապահներէն, Վասակ իր դար-ձուածներուն մէջ կը Ակուէր: Վարդան Աւետարա-նի հանդէպ կը պատկառէր, Վասակ ատրուշան կը բոցավառէր: Վարդան կ'անսար հանրութեան ձայ-նին, Վասակ իր տենչին միայն կը ձգտէր: Վար-դան Հայոց աշխարհին փառքը կը տենչար, Վասակ անոր թագին սեւեռուած էր: Վարդան կը յարդէր Մարզպանին առաջարկները, իբրեւ երկրի մեծին,

իսկ սա կը դաւէր Սպարապետին: Վարդան ողջա-խորհուրդ մըն է, Վասակ չարախորհուրդ: Վար-դան կը քաջալերէ, Վասակ վարանքով կը միսայ: Վարդան Արտազի մէջ կը շահատակէ, Վասակ Ար-տաշիրի փիղերուն ետեւ կը խորասուզի: Վարդան բանակ կը շարժէ, Վասակ հրամանի տակ կը Խը-լըրտի: Վարդան կը հահատակուի հանրութեան համար, Վասակ իր փառաաենչիկ պատրանքը կը լուծէ: Վարդան կարմրած է պատերազմի դաշտին մէջ, ժողովրդեան սրտին մէջ. Վասակ Տիգրոնի զըն-դանին մէջ գառն արցունք կը թափէ. Վասակ արիա-ցած է իր տիկրացումէն. Վասակ ուրացած կը մեռ-նի: Վարդան յարացոյց եղած է զգացումի, քաջու-թեան, Վասակի բարձր կարողութիւնները մթազ-նած են արհամարհանքի տարափին տակ: Վարդան ամէն սրտի մէջ դրոցմուած է, Վասակի գերեզմա-նին տեղն իսկ չերեւցաւ: Վարդան «նորահրաշ պը-սակաւոր» մըն է, սուրբ մըն է, Վասակի յիշատա-կըն իսկ չեղաւ «առաջի սուրբ սեղանոյն»: Վար-դան անմահ է, Վասակը կը կշտամբուի:

Վարդանէն յետոյ Վահան մը, Վասակէն յետոյ Գդիհոն մը: Եկեղեցին է յաղթապանծը, իսկ քան-դումը՝ մոխրանոցներուն: Աղդն տեսակ մը ինքնու-թիւն կը չնչէ: սիլիքոր մողացածներ սմքած են ինք-նին:

ՔԱԶՆ գծեց յաղթանակի այս հիմը իր «Վար-դապոյն արեամբ»:

Արշակունեաց ծիրանիին տեղ իր կեանքի ծիրա-նին ծաւալէց:

Գարունը նախանձեցաւ իր երանգներով՝ այդ Կարմիրին:

Դարեր կը պանծան ՚ի Կարմիրն Վարդան» (Եղի՛՛ն, Քննկն. Ռւսմն. Էջ 392-94):

ՎԱՐԴԱՆԱՆՑ ՊԱՏԵՐԱԶՄԸ ԸՍՏ ԵՂԻՇՔԻ

(«Ազգ», 1917 Փետր. 22-Մարտ 29)

ՆԱԽԵՐԳԱՆՔ

Ա. Ր Դ Ա. Ն Ա. Ն Ց պատերազմին պատմական
աղքիւրներն են ԵՂԻՇՔ եւ ՂԱԶԱՐ ՓԱՐ-
ՊԵՅՑԻ:

Եղիշէ, գրած է միայն Վարդանանց Պատերազ-
մին պատմութիւնը, վերածելով զայն դիւցազներ-
գութեան մը, որպէս զի ընթերցումն ըլլայ հաճելի,
ազդու եւ հետեւաբար խանդավառող: Եղիշէ այն-
քան յաջողած է դրելու այս ոճին մէջ, որ մեղրա-
ծորան կոչուած է: Եւ ստուգիւ Եղիշէի պատմու-
թիւնը՝ Հայ ազգին մէջ կարդացուած է անյագա-
բար, եւ այս պատճառաւ արժանացած է բազմա-
թիւ տպագրութիւններու: Սուրբ Գիրքին ետքը ա-
մէնէն շատ եւ զանազան ձեւով հրատարակեալ գիր-
քերէն է Եղիշէ, որ օտար լեզուներու ալ թարգ-
մանուած է:

Իսկ Ղ. Փարապեցի՝ զուտ պատմական ոճով գը-
րած է իր պատմութիւնը, որ կը բովանդակէ Արշա-
կունեաց թագաւորութեան անկումը, Հայերէն գի-
րերու գիւտը, Վարդանանց եւ Վահանեանց պատե-
րազմներուն նկարագրութիւնները: Ղ. Փարապեցին
ոճով դիւրահասկնալի, խիտ եւ այնքան գեղեցիկ է,
որ հեղինակը այս պատճառաւ կոչուած է նարտա-
սան: Ճաշակի տէր հայ մը՝ պիտի չուգէր ձեռքէ
ձգել նախնեաց մատենագրութեան այս գոհարը:

Հայ պատմութեանց շարքին մէջ՝ Ղ. Փարապե-
ցի իրմէ յառաջ երկու պատմագիր միայն կը ճանչ-
նայ, Ազարանգեղոս եւ Փ. Բիւզանդ, ինչպէս նաև
Ս. Մեսրոպին կենսագրութիւնը՝ Մբանչելի Կորիւ-
նի գրչէն:

Քննադատութեան առջեւ խնդիր է, թէ Եղիշէ
եւ թէ Ղ. Փարապեցի ի՞նչ յարաբերութիւն ունին
իրարու հետ. այսինքն՝ Վարդանանց Պատերազմին
վրայ գրող այս երկու հեղինակներ տեսա՞ծ են ի-
րարու գործերը, օգտուա՞ծ են իրարմէ, թէ անկա-
խարար գրած են: Դարձեալ, աւելի վերջին ժամա-
նակներու պատմագիրները (Թովմաս Արծրունի եւ
Յովհոն Կթղու) այնպիսի տեղեկութիւններ կուտան
Վարդանանց Պատերազմին վերաբերութեամբ, որ
չեն գտնուելու ո՛չ Եղիշէի եւ ո՛չ ալ Փարապեցիի գիր-
քերուն մէջ: Ո՞վ է ասոնց ազրիւրը: Մելլրածորա-
ննեն եւ ձարտասաննեն յառաջ կորսուած ուրիշ պատ-
մութի՞ւն մըն է, եթէ ոչ ժողովրդեան մէջ պահ-
ուած աւանդութիւն մը:

Եթէ Արծրունեանց պատմիչ Թովմային հաւա-
տանք, պէտք է ընդունիլ՝ որ Եղիշէի Պատմութիւ-
նը պակասաւոր է. որովհետեւ Բարձումա անուն
ասորի մը՝ նենդով ձեռք բերած է Եղիշէի գիրքը,
եւ ասոր մէջէն կտրեր հաներ է Արծրունեանց վե-
րաբերեալ մասերը: Այս տեղեկութիւնը վստահելի
չէ. բայց ստոյդ է, որ Եղիշէին գրած պատմու-
թիւնը, որ եօթը գլուխներէ (յեղանակ) պիտի բաղ-
կանար, եւ ասոնցմէ դուրս (արտաքոյ) Ութերորդ
մըն ալ ունի, այլ նաև պատմագիրը այդ Ութերորդ
գլուխն վերջերը եւ Հայոց աշխարհի փափկասուն
տիկնանց մասին գրուած հիանալի դրուագէն յա-

ուաշ՝ կ'ըսէ, «Բայց ի տեղի այսր ինձ դարձեալ գալ պիտի»: Այս խոսուումը կամ առաջադրութիւնը սակայն չէր գործադրուած:

Չենք գիտեր թէ ապագայ հետազօտութիւններ ի՞նչ լոյսեր պիտի կրնան սփուել Վարդանանց Պատերազմին պատմական աղբիւրներուն վրայ, բայց գիտենք թէ Վարդանանց Պատերազմին չափ հետաքրքրական են նաեւ Եղիշէի պատմութեան շուրջ յուզուած բանասիրական եւ քննադատական կրթիչ խնդիրներ:

Այս չափ արագ արկնարկով մը հետաքրքրելէ ետքը ընթերցողներս, Վարդանանց պատմութեան մասին, կը խնդրեմ, որ մաքուր հայու սրտով ու սիրով հետեւին ինձ, որպէսզի շուտ անցնինք միամին Եղիշէի եւ Փարավեցիի պատկերացուցած տեսարաններու առջեւէն, դիտելով միայն խոշոր եւ ընդհանուր գիծերը Շաւարշանի Մեծ Պատերազմին, զոր Վարդանանք սկսան եւ Վահանեանք վերջացուցին, 451էն մինչեւ 485ի սկիզբները:

ԱՐՄ.ԶԻՒՆ ՅԵՂԱՆԱԿ

Արշակունեաց փառաւոր թագաւորութիւնը վերջացած, սուգ է պահեր հայ արքունիքը: Հայ նախարարներ, ժամանակին այդ «գործիչները», յանդողեր էին իրենց ներքին կոփւներով դիւրացընել Հայաստանի բաժանման ծրագիրը Պարսից եւ Յունաց միջեւ: Բայց Հայ Ազգը ներքին ոյժ մը ստեղծած էր Ս. Սահակի եւ Ս. Մեսրոպի անհամեմատելի ազգասիրութեան չնորհիւ: Հայաստանեայց Եկեղեցին իրօք հայացած, զօրացած, ամրոց մը եղած էր թագակորոյս եւ բաժանեալ Հայութեան հա-

մար: Շահնշահերու կառավարութիւնը քաջալերած էր այդ հոյակապ երեւոյթը. այս է պատճառը «աստուածպաշտութիւնն բարձրագուլի կամակարութեամբ երեւելի լինելը յաշխարհին Հայոց»:

Յաղկերտ Բ.ի ատեն քաղաքականութիւնը կը փոխուի: Բուն Պարսկաստանի մէջ եւ դուրսը՝ քրիստոնէութեան ծաւալումն ու պայծառացումը անհանգիստ կ'ընէին մոգերը: Հեռաւոր մարգերու մէջ քաղաքական խլրտումներ վտանգ կ'սպառնան: Յաղկերտ կը չարժի: «Ալքֆ օրհասականք ընդ վախնանել շնչոյն հզօրագոյնս կոռուին»: Բոլոր հպատակ աղգեր ու ցեղեր, ամէնքն ալ «հաւատացեալք ի մի կարգիկէ առաքելական եկեղեցի», կը կոչուին զէնքի տակ: Ամէնքն ալ անմեղութեամբ կը վազեն կատարել իրենց հաւատարիմ քաղաքացիի պարտականութիւնները: Յաղկերտին առաջին յարձակումը Քուշանաց վրայ, յանդողութեամբ պսակուեցաւ երկարամեայ կոփւէ մը ետքը: Այս յանդողութիւնը հըսպարտացուց զՅաղկերտ: Ուզեց նախատել Քրիստոսը՝ ծաղրելով Աւետարանի պատմութիւնը Փրկչին Հրաշալի կեանքի մասին:

Եռանդուն, երիտասարդ նախարար մը, Գարեգին, համարձակեցաւ դիտել տալ Յաղկերտին իր տղիտութիւնը: Շահնշահը բռնկեցաւ Բաբելոնի հնոցին պէս եւ իր բոլոր թոյնը թափեց յանդուգն հաւատացեալին վրայ: Երկու տարի բանտի մատնուեցաւ, չնորհազուրկ եւ տանջանքներու մէջ նահատակուեցաւ արի նախարարը:

Արիւնոտ նշանը տրուած էր:

ԵՐԿՐՈՐԴ ՅԵՂԱՆԱԿ

Եւ տրուած նշանին նշաւակ եղած էր հայ բանակը մասնաւորապէս։ որովհետեւ բոլոր ազգերէն աւելի Հայեր եւ այն ալ նախարարազունք կը զայլացնէին Բոնակալը իրենց ջերմագոյն աստուածաշտութեամբ։ Պատիւ, գահ, կահ՝ չկըցան հրապուրել Հայ-քրիստոնեայն։ Զթուլցան երկնաւոր առաքինութեան մէջ։ Գիտէին եւ կը նախատեսէին ապագան։ Մահէն չէին վախնար։ որովհետեւ դիտէին մեռնիլ։ Կոյլեր չէին, որոնք զուրկ են արեւի ճառագայթներէն։ ուսեր էին կատարեալ կեանքի գիտութիւնը։ Հոգեկան, գաղափարային արժէքներ ամէն ինչ էր այս պատուական Հայոց համար։ Աշխարհի հարստութենէն չէին հրապուրուեր, Բոնապէտի սպառնալիքներէն չէին սասաներ։

Ցաղկերտ մերթ կը շանթէր, կը գալարէր թունաւոր օձի պէս, մերթ կատղած առիւծի պէս կը գոռար, հոգիի եւ մտքի տաղնապներու մէջ, վերջապէս երբեմն անուշութեամբ եւ երբեմն խստութեամբ՝ պաշտօնական կոչն ուղղուեցաւ Քրիստոնեաներուն։ Բանակի ծառայութեան մէջ անտանելի եղաւ ասոնց ինկած բաժինը։ ոսճիկներ ու թոշակներ կրծառուեցան։ Երկար չտեւեց, Հայ զինուորութեան գեղեցկութիւնը անչքացաւ։ «Այնակի պատուական զինուորութիւն հասեալ էր ի չարաշուք անարգութիւն, եւ հայրենի ազատութիւնն չարաշար կայր ի ծառայութեան մարդախոշոշ բոնաւորին»։ Վաստակ, ծառայութիւն, կաթնեղբայրութիւն, եւ ո՛չ մէկ նիւթական եւ բարոյական կապ եւ յարգ ա՛լ չէր յիշուեր։ Երբ բանակի մէջ Հայ զօրութիւնը

այսպէս կը ճգմուէր, անդին Դենչապուհ Հայաստան կը հասնէր եւ հարկի ու պարտքի տակ կը ճմէէր երկիրը, նոյն իսկ կը բոնաբարէր եկեղեցւոյ ազատութիւնը՝ հարկատու ընելով զայն, որպէս զի Հայեր՝ ստիպուին իրենց հաւատքի գնով ստանալ իրենց ազատութիւնը։ — «Ոչ ըստ արքունի արժանաւորութեանն առնուին, այլ իինաբար յափշտակելով, մինչեւ ինձեանք իսկ մեծապէս զարմանային, թէ ուստի այս ամենայն գանձ ելանէ, զիա՞րդ շէն կայցէ աշխարհն»։

Այսպիսի բոնի միջոցներ ապարդիւն կը մնան։ Պաշտօնական հրովարտակ կը գրուի Յազկերտի անունով, Միհրներսեհի կողմէն, որ շատ խելացի եպարքոս մըն էր եւ հրամանատար Յազկերտի բանակին։

Հրովարտակը կը պարզէ Դենիմազգէզի գաւանանքը, որ հին Զրադաշտութեան խաթարուած մէկ նոր գրութիւնն էր, կը վերջանար մեղադրանքով մը ընդդէմ Քրիստոնէութեան։

Հայաստանի երկու մեծ ջահերը հազիւ տաս տարիներէ ի վեր շինած էին յանձին Մեծացն Սահակայ եւ Մեսրոպայ։ Հայաստանի քաջ զաւակները օտարութեան մէջ, բանակի գժուարին գործերու մէջ քամուած էին։ Բայց կենդանի՛ էր մեծ թարգմանիչներուն հիմնած ու հաստատած գործը։ Անոնց հաւատարիմ եւ ուշիմ աշակերտները՝ Յովսէփի Կաթողիկոսի գլխաւորութեամբ, կազմեցին Արտաշտուպամական ժողովը։ Գիտութեամբ, քրիստոնէական խորին հաւատքով, պաշտօնական հիանալի պաղարիւնով եւ վճռականութեամբ պատասխանեցին Միհրներսեհի։

Ուշադրութիւն։ Երկրպագելի է այս պատկերը։ Բնաշխարհի մնացած ոյժը համախմբուած է հաղիւ յիսուն տարիէ ի վեր հայացած, ազգայնացած Մայրենի Եկեղեցւոյ հովանոյն տակ։ Հայը իր ամրոցին մէջ ապահով, կարգապահ, լուրջ, կը խորհի, կը դործէ, կը վճռէ, կը պատասխանէ, եւ պատրաստ է վաղուան համար . . . :

Կազմ ու պատրաստ են ամէն պատահականութեան առջեւ. — «Ի ֆէն տանջանիք, եւ ի մէնջ յանձնառութիւնն. սուր քո եւ պարանոցք մեր։ Զեմք ինչ լաւ մեք քան զառաջինսն, որ յայսր վկայութեան վերայ եղին զինչս եւ զստացուածս եւ զմարմինս իւրեանց»

Այս քաջ եւ կտրուկ խօսքեր զայրոյթ կը գրգռեն Տիղբոնի մէջ։ Հայաստանի մէջ մնացած նախարարներուն նշանաւորներն ալ կը կանչուին դուռը, անարդ ընդունելութիւն կ'ըլլայ ասոնց, վաղեմի սովորութիւններ եւ պաշտօնական արարողութիւններ չեն կատարուիր։ Արդար բողոքը կը բարձրացնեն Հայեր, ցոյց տալով իրենց հաւատարմութիւնը, ծառայութիւնը Շապհոյ ժամանակներէն ի վեր։ Աւելի եւս կը բորբոքի Յագկերտ, չուզեր լսել հաւատարմութեան ձայնը, վնաս կը համարի Հայոց վաստակներն ու ծառայութիւնները. կը բոնադատէ կրօնափոխ ըլլալու։

Շահնշահի ներքին խորհրդակիցներէն մէկին թելադրութեամբ Հայեր կը հաւանին առ երեսս։ Փառքեր պատիւներ կը շուայլուին, Դուռը ցնծութեան մէջ է. եօթը հարիւր մոգեր հրահանդ կ'ստանան ճամբորդելու դէպի Հայաստան՝ առ երես ուրացեալնե-

րուն հետ։ Դենեմազդեղի ուսուցիչները ուրախ են այս նոր դամբուն վրայ, իրենց մէջ բայ բաժին կ'ընեն Հայոց աշխարհը։

ԵՐՐՈՐԴ ՅԵՂԱՆԱԿ

Հայաստանի Հայերը չեն կրնար ըմբռնել թէ ի՞նչ պատահեր է, որ իրենց մեծերն ու առաջնորդները բռնադատուեր են համակերպիլ ուրացման։ Խորին է յուզումը, սաստի՛կ՝ մեղադրանքը։ Կարծես յուսահատեր են բոլորովին։ Գաղանիքը չէին ուզեր յայտնել, բայց անհնար էր լուելն ալ։ Հեղձամղձուկ եղած արցունք կը թափեն։

Այս վիճակը անտանելի էր, չէր կրնար տեսել. զօրքին մէջ գտնուող քահանաներ անմիջապէս կը վազեն կը ցըուին Հայ ժողովուրդին մէջ, խելամուտ կ'ընեն իրողութեան։ Բոլոր հաւատարիմներ ոտքի կ'ենեն։ Ուրացութեան նախատինքը պէտք էր սըրբուիլ. որո՞նք ալ ըլլային ուրացողները, պէտք էին մեռնիլ։ Աստուածային օրէնքը հոչակուեցաւ տիրող։ Ամէն յանցաւոր անով պիտի գտնէր իր պատիժը։

Այս միջոցին Հայոց գունդը եւ մոգեր եկած հասած են Անդղ գիւղաքաղաքը։ Մոգեր ամէն կերպով պատրաստուած են գործի։ Սուրբն Ղեւոնդ, այդ հիւանդոս, բայց սրտոտ երէցը, հմտութեան եւ մտքուր հայրենասիրութեան այդ մարմնացումը, անգործ չէր կեցած։ Կիրակի օր մըն էր։ Հայոց եկեղեցւոյն դոները պիտի խորտակէին մոգեր։ Ղեւոնդ երէց իր խորհրդակիցներով ու ժողովուրդով դիմագրաւեց այդ խոչոր եւ բիրտ ոյժը. քարերով մի-

այն կը վոնտեն թշնամին եւ կը բանան եկեղեցին աստուածային պաշտամունքը կատարելու համար :

Այս հարուածը այնքան սաստիկ եղաւ եւ այնքան անակնակալ, որ մոդակետն յայտարարեց. Եթէ նոյն ինքն աստուածներ օգնութեան հասնին, կարելի չէ որ մոգութիւնը Հայոց մէջ հաստատուի : Այս Հայերը ո՞չ շղբայէն կը վախճան, ո՞չ ալ տանջանէին : Ո՞վ կրնայ դէմ դիմլ ասոնց :

Մարզպանն Վասակ կը ջանայ հանդարտեցնել մոդակետին յուղումը եւ կազդուրել անոր յուսահատութիւնը : Այնքան ճարպիկ էր Վասակ, որ «յիմարեցոյց եւ ափշեցոյց զմիտս մոդակետին» :

Ճար մը պէտք էր գտնել: Բոլոր Եպիսկոպոսներ կը դիմն Սպարապետին, Վարդան Մամիկոննեանի ասպարանքը, եւ կը ստիպէն գործի գլուխ անցնիլ: Վարդան կը հաւանի, եւ առաջին գործը կ'ըլլայ Վասակին կալանաւորումը, որ ազատելու համար մահուանէ, զրաւոր եւ բերանացի երդումներ կ'ընէ: Գիտնալով հանդերձ անոր կեղծաւորութիւնը՝ թող կուտան զայն:

Նոր ուխտով եւ սիրով կը միանան իրարու. — «Քանզի Հայր մեր՝ զՍուրբ Աւետարանն զիտեմք եւ Մայր՝ զԱռաքելական եկեղեցի Կաքողիկէ. մի՛ ոք չար անջրպետ ի մէջ անկեալ՝ զմեզ քակեսցէ ի ոըմանէ» :

Այս ուխտն ու սէրը կը հաւասարեցնէ հաւատարիմները. ծառայ եւ տէր, փափկացեալ ազատն ու վշտացեալ գեղջուկը, այր ու կին, ծեր եւ տղայ, ամէնքն ալ մէկ սիրտ էին, մէկ զինուորութիւն դիտէին: Անոնց միակ նպատակն էր «Քաջութեամբ միայն մեռանիլ»: Ամէն Հայ՝ զինուոր կտրած էր:

Ամէն կողմ յաջողութիւն կը գտնէին թէ՛ կանոնաւոր Հայ զունդեր եւ թէ՛ անկանոն Հայ զօրքեր կը կըռուէին: Կարծես հրաշքով կ'իյնային բերդեր: Բըռնութիւնն իսկ կարծես սքանչելի ժպիտ մը կ'արտայայտէր այս յաջողութիւններուն հանդէպ: «Սոյնապէս եւ աստեղք ի յերկինս երեւէին յոյժ լուսալիք պայծառացեալ, զոր ոչ ունէին յառաջին բնութեանն»:

Այս միջոցին Ազուանք օգնութիւն կը խնդրէին Հայոցմէ. Քաջն Վարդան հոն կը վագէ: Վասակ կ'օգտուի սպարապետին բացակայութենէն, իր կողմը կ'առնէ թուլահաւատ նախարարները. շուտով լուր կը դրէի Պարսից բանակին, որպէս զի դիմաւորեն Վարդանը: Սերուխտ իր մեծ բանակով կը հանդիպի Վարդանին՝ Վրաց սահմաններուն վրայ: Մամիկոննեան զօրավարը եւ Արշաւիր Արշարունի յանհարծակիի կը բերեն Սերուխտը եւ մեծ մեծ յաջողութիւններ կ'ունենան:

Վարդանի բացակայութեան միջոցին Վասակ հանդարտ չէր նստած: Շարք մը նշանաւոր բերդեր գրաւած էր, եկեղեցիները կողովտած եւ տուներ քանդած: Վարդան շուտով վերադարձաւ Հայատանան՝ այս գոյժն առնելէ ետքը: Վասակ գիշերանց խոյս կուտայ, երբ կը լուէ Վարդանին վերադարձը եւ կ'երթայ Սիւնեաց բերդերուն մէջ ապաստան գտնելու: Վարդան կը յարձակի Սիւնեաց գաւառին վըրայ, սաստիկ կը նեղէ զայն եւ կ'աւերէ ու կ'աւարէ: Արսափելի՛ հարուած:

Յաղկերտ լսելով Հայատանի ներքին քայլքայումը, մեղմացաւ, եւ պահ մը թուլցուց հալածանքը եւ ազատ թողուց քրիստոնէութիւնը: Յաղկեր-

տին ընթացքը վստահութիւն չներչնչեց Վարդանանց,
եւ հետեւաբար ասոնք չփոխեցին իրենց դիրքը:

Եւ Միհրներսէն ստիպուեցաւ զօրաւոր բանակով
մը գալ Փայտակարան՝ Հայոց սահմանները:

ԶՈՐՈՌԴ ՅԵՂԱՆԱԿ

Ա՛լ Վարդանանք եւ Վասակեանք դէմ դիմաց են:
Քօղը պատուած է: Ուխտադըուժ Վասակ իր գերին
մէջ է, վստահէլով իր ոյժերուն, իր պաշտօնական
բարձր դիրքերուն եւ ազդեցութեան: — «Արդ յայս
հետէ եւ անդր, ուր սպադեալ անկանի երկպառակու-
թին ի ներքս, ընդ քակել միաբանութեանն՝ եւ երկ-
նաւոր առաքինութիւնն հեռանայ, եւ անձնընտիրք
լինելով՝ յոյժ բազմանայ լալումն ողբոյս»:

Վասակ կը փութայ Փայտակարան երթալ, ամ-
բաստանել Միհրներսէնի առջեւ Վարդանանց կող-
մը՝ իբրեւ պատճառ երկրի աւելուման: Միհրներսէն
խորագէտ էր. ներքնասպէս կը զսրովէր Վասակը,
բայց կ'ուղէ օպտուիլ անկէ, նոյն իսկ Հայոց թագը
խոտանալով, հերիք էր որ ապատամբութիւնը զըս-
պուէր, ձեռնտուութեամբ ներքին թշնամիին (—Վա-
սակին): Եւ ստուգիւ Վասակ յաջողեցաւ եւ ամբովը
Սիւնիքը «ատոտամբեցոյց յուրացութիւն»: Վիրք,
Աղուանք, եւ Աղձնիք, որ Վարդանի գաշնակիցներն
էին, զատուեցան Վասակի ազդեցութեամբ: Վասակ
իր այս բոլոր յաջողութիւնները ո՛չ միայն տեղե-
կագրեց Միհրներսէնին, այլ նաև Բիւզանդիոն, յու-
նաքամբին Հայաստանի սպարապէտ Մամիկոննեան ոմն
Վասակի միջոցաւ: — «Եգիտ այս Վասակ զայն Վա-

սակն իւր զործակից ի մեծամեծ չարիսն, զոր միա-
բանեցին երկոքեանն»:

Վասակ իր զործունէութեան եւ յաջողութեան
զաղաթնակիցն է հասեր: Վարդանանց կողմը նուա-
ճելու, ճղմելու համար ամէն միջոցի կը դիմէ, ամէն
միջոց կ'արդարացնէ: Շարժեց, չիոթեց Հայոց աշ-
խարհը ներսէն ու գուրսէն: Հարազատ եղբայրները
զատեց իրարմէ: Հայրն ու որդին իրարու դէմ հա-
նեց, «Եւ ի մէջ խաղաղութեան, արար խոռվութիւն»:
Նոյն իսկ իր հարազատ երկու եղբօրորդիները, որոնք
հաւատարիմ էին առաքինութեան սուրբ ուխտին,
ամբաստանեց, եւ արքունի հրամանաւ դուրս հանեց
Սիւնեաց աշխարհէն, անգամ մըն ալ չվերադառնալու
պայմանաւ: Բոլոր վանականներն ալ հալածեց եւ
փախցուց անկէց, եւ Պարսիկներուն սորվեցուց ի՞նչ
որ չէին դիտեր Հայոց կրօնական ներքին կեանքի
մասին: Այդ բոլորին նպատակն էր Քրիստոնէու-
թիւնը վերցնել Հայաստանէն:

Բայց Միհրներսէն շատ աւելի հետաքրքրուած
է Վարդանի շարժումներով քան թէ Վասակի դաւա-
ճանութիւններով: Երբ ճիշդ զաղափար մը կազմէց
Վարդանանց պատրաստութեան եւ դիտաւորութեան
մասին, Փայտակարանի բանակը յանձնեց Մուշ-
կան նիւսալաւուրտին, եւ ինքն վերադարձաւ Տիգ-
րոն, իրաց վիճակը պարզելու համար Յաղկերտին:

Յաղկերտ գառնացաւ՝ երբ տեղեկացաւ Վասա-
կի երկրիմի, կործանարար քաղաքականութեան, եւ
սպառնաց,

— «Եթէ ապրեսցի անօրէնն այն ի մեծ պատե-
րազմէն, մեծաւ անարգանօֆ տամ ըմպել նմա զրա-
ծակն դառնութեան մահու»:

ՀԻՆԳԵՐՈՐԴԻ ՅԵՂԱՆԱԿ

Վարդանանք, թէեւ սակաւաթիւ, բայց աստուածային սիրով զրահաւորուած են։ Գաղափարի կոիւն է որ պիտի մղեն. ասիկա գերբնական է իրենց համար, ասուածային է։ Ամէն գժրախտութիւն եւ գէշ հետեւանք նախատեսած են։ Վախկոտ ու անարի չեն։ Ամէնէն աւելի տկար կարծուածներն ալ այդ սիրով զինուած, զօրացած են։ Մարդիկ որ չեն վախնար մահէ, կարեւորութիւն չեն տար ընչից յափշտակութեան, չեն ուզեր զգածութիւ իրենց սիրելիներուն խողխողումէն եւ իրենց ընտանեաց գերելարութենչն, չեն տկարանար հայրենազրկութեան եւ օսարութեան մէջ սորկութեան սարսափէն։ «առ ոչինչ համարեցան զայս ամենայն անցս չարչարանցն. այլ միայն միաբան կալ ընդ Աստուծոյ, զի՞ նմանէ միայն մի՛ զերի ելցեն», որովհետեւ «Մեծ է սէրն Աստուծոյ քան զամենայն մեծութիւն երկրաւոր»։

Քաջն Վարդան, որ շարժումին դլուխը անցած էր, անվհատութեան եւ արագութեան հիանալի օրինակը կուտայ։ Կ'զգայ Վասակին տուած հարուածին ամրողջ ծանրութիւնը իր բացակայութեան միջոցին, գիտէ թէ իրեն յարողներուն եւ հետեւողներուն մէջ ալ կային երկմիտներ ու երկերներ։ Իր եղբայրները, զաւակները, եղբօրորդիները կը դնէ պակսողներուն տեղ, Արտաշատի մէջ կը ժողվէ իր զինուորները եւ կը պատրաստուի անցնիլ Երասխը երթալու համար զէպի պատերազմի դաշտն Արտազ։ Արտազ։ Վաթսուն հազար Հայ քաջերով, հեծ-

եալ թէ հետեւակ, կ'եռայ ու կը զեռայ դաշտը. հո՞ն եկեր հաւաքուեր են իրենց ուազմական բոլոր պատրաստութեամբ,

Ներշապուհ Արծրունի, Խորէն Խորխոռունի, Արտակ Պալունի, Վահան Ամասունի եւ գունդն Վահեւունեանց, Թարուլ Դիմաքսեան, Արշաւիր Արշարունի, Շմաւոն Անձաւացի, Տահատ Գնքունի, Ասում Գնունի, Խոսրով Գաբեղեան, Կարէն Սահառունի, Հմայեակ Դիմաքսեան, Ներսէ Քաջքերունի, Փարսման Մանդակունի, Արսէն Ընձայեցի, Այրուկ Սլկունի, Վրէն Տաշրացի, Ապրամ Արծրունեացն, Շահ Խոնապետն Արքունի, Խուրս Սրուանձտեաց, Քօղեանին, Ակէացին, Տպրատունիք, Զօրքն Ռշտունեաց, եւ ըուլոր արքունի գործակալներ, իրենց զօրքերով, եւ ամէնուն գլուխը ինքն Սպարապետն Հայոց, Վարդան Մամիկոնեան։ Հոն եւ «Սուրբքն Յովսէփի եւ Ղետնիդ Երէց, քազում եւ այլ քահանայք, եւ եւս

բազմագոյն պաշտօնեայք»։ Հայ եկեղեցականը հայ զինուորին քով։ Գաղափարի կոխւ է, հոգեւոր պատերազմ մըն է, անոնք չէին կրնար չնետուիլ պատերազմի դաշտը, անոնք ալ «կը ցանկային մահակից լինել քաջ նահատակացն»։

Սպարապետն կը խօսի իր մարտական ճառը։ Ո՞րչափ համեստ, այնքան արթ' է վարդան իր խօսքերուն մէջ։ Դատը քաջ ըմբռոնած է. գիտէ հայ զինուորին հոգերանութիւնը։ Իր ճառին գլխաւոր գիծելն էն։

— Շատ մը կոխւներու մաեր ելեր ենք, երբեմն յաղթուած ենք, բայց ընդհանրապէս յաղթող ելած ենք։ Այդ կոխւներու մէջ քաղաքացիական պարտք մը կը կատարէինք եւ մեր նպատակն էր գոհ թողուը մեր վրայ իշխողը, եւ վարձատրուիլ։ Այս կը-սիւը բոլորովին տարբեր է նախկիններէն։ Ասիկա գաղափարի, որատուի կոխւ է։ «Մահանացու հը-րամանատու»ին չէ որ հաճելի պիտի ըլլանք, այլ «անմահ թագաւորին»։ Զենէ շատեր քան զիս լա-ւագոյն էք քաջութեամբ եւ հայրենի պատուով։ Բայց զիս դուք հրաւերեցիք առաջնորդել ձեզի։ Մեր նպատակն է մեռնելու չափ կոռուիլ, եւ ուշագրու-թիւն ընել, որ «յարութիւնս ֆաջութեան՝ վատու-թիւն մի՛ խանինեցուվ»։ Արդէն մէկ երկու կոռու մէջ յաջողեցանք։ Թո՞ղ գիտնայ թշնամին, որ քը-րիստոնէութիւնը հագուստ մը չէ մեր վրայ, որ փոխենք. մեր մարմնի դոյնին պէս է այդ, որ չփոխ-ուիր։ Մեր առ երեսս «ամմպարշտութիւն»ը ցաւալի էր. բայց Աստուած գիտէ, եւ դուք ալ գիտէք որ ասիկա մեր ւիրելեաց համար էք. հիմայ կրկին

պարտք կը ծանրանայ մեր վրայ, այս կեղան ալ պէտք է սրբել մեր վրայէն։ «Երկիւլ՝ թերահաւա-տութեան է նշաւակ»։ Արդէն թերահաւատութիւնը շատոնց մերժեցինք, թող վախն ալ փարատի մեր մաքէն ու խորհուրդէն»։

Վարդան իր հաւուն, Մեծն Սահակայ թարգ-մանած Սուլը Գիրքը ձեռք առած, Մակարայեցուոց քաջազործութիւնները կը կարգայ, մեծ նմանու-թիւն կը գտնէ անոնց եւ իրենց վիճակին մէջ։ Եւ կը սրտապնդէ հաւատարիմները քաջերու օրինակնե-րով։

Առանձար Ամատունի, քաջ եւ իմաստուն Սե-պուհ մը, երկու հազար հայորդիներով անգամ մը յանկարծակիի կը ըերէ Պարսից բանակը՝ Հէր եւ Զարեւանդ զաւառին մէջ։ Վասակ նոր հնարքներու կը գիտէ Վարդանանց կողմը տկարացնելու համար, բայց յաջողիր։ Սուլըն Ղեւոնդ քրիստոնէական եւ հայրենայրական հարուստ եւ տաք չնչով մը կը խրախուսէ հայոց բանակը. — «Մեր յոյսն մեզ կը-կին երեւի. երէ մեռամիմք՝ կեամք, եւ երէ մե-ռուցանեմք՝ մեզ նոյն կեամք առաջի կան»։ Հայրե-նասէր եւ քաջ քրիստոնեայ երէցն իրենց ներկայու-թիւնը բանակին մէջ մասնաւոր խնամքով դիտել կուտայ, աւելի եւս արծարծելու համար հայ զին-ուորին կոռուելու եռանդը. — Դուք ամէնքդ ալ, կ'ը-սէ, գիտէք, որ պատերզամի ատեն սովորութիւն ունէինք բանակի մէջ քահանաներ ունենալ, բայց հակատի ատեն անոնց աղօթքին յանձնուելով՝ զա-նոնք կը թողէիք ամուր տեղեր. բայց այսօր եպիս-կոպոսներ ու երէցներ, սարկաւագներ, սաղմոսներ-

գուներ, գրակարդացներ, ամէնքն ալ զինուորներուն նման պատրաստ են կռուի, եւ կ'ուզեն ձեր հետ յարձակիլ զարնել ճշմարտութեան թշնամին։ Ասոնք մեռնելի ալ չեն զանդիաներ. որովհետեւ աւելի կ'ուզեն մեռնիլ քան թէ մեռցնել։

Մեծ պատերազմին գիշերը՝ այս ողիով կը խօսի Սուրբն Ղեւոնդ։ Այդ հիւանդոս, բայց գիտուն, հայրենասէր, քրիստոնեայ եկեղեցականը, մոռցերէր իր հիւանդութիւնը, կրակուրոց կտրած է Վարդանի բանակին մէջ, կը հրահրէ, կը խանդավառէ, ամէն զինուոր իր հոգեւոր պարտքն ալ կը կատարէ. գիշերն ի բուն անկնունքներ կը մկրտուին, կը կնքուին, առտուն Ս. Պատարագ՝ կը մատուցուի, հաւանաբար ամէն զունդի մէջ զատ զատ, եւ անշուշտ առաջին Պատարագիչն է նոյն ինքն Սուրբն Յովսէփ. բոլոր բանակը կը հաղորդուի, կարծես Զատկի տօն մըն. էր։ Ամենքն ալ լուսազգեստ են հիմայ, եւ ցնծութեան աղաղակներով կը հրճուին. — «Հաւասարեսցէ մահ մեր ընդ մահ արդարոցն, եւ հեղումն արեան մերոյ ընդ արիւն սուրբ մարտիրոսացն. եւ հանեսցի Աստուած կամաւոր պատարագաւ, եւ մի՛ տացէ գելեղեցի իւր ի ձեռս հեթանոսաց»։

ՎԵՑԵՐՈՐԴԻ ՅԵՂԱՆԱԿ

Պարսից բանակին հրամանատարը, Մուշկան Նիւսարաւուրտ, յուսահատ՝ Հայերը սուտով ու խոստումներով նուանելի, կը շարժի իւր կողմէն։ Վասակեաններէն ստուզած է արդէն Վարդանանց վի-

ձակը, անոր նշանաւոր ասպետներուն քաջութիւնը, եւ ըստ այնմ կը կազմէ ու կը պատրաստէ Մատեան գունդը։ Այս գունդը կը կազմուէր փիզերէ, իւրաքանչիւր փիզին աջէն ու ձափէն երեք հազար ասպազէններ. ասոնք բռնեցին իրենց դիրքը մեծ դաշտի երկայնքին, այսինքն Տղմուտ գետի մէկ կողմը. «իբրև զաշտարակ մի հզօր եւ կամ իբրեւ զբերդ մի անմատոյց»։ Ապարհայից գունդը, Կաշտաց, Հոնաց, Գեղաց եւ ուրիշ ազգերու ընտիր զօրքերն ալ Մ. Նիւսարաւուրտ կ'առնէր իր աջ կողմը՝ Վարդանի դէմ ելնելու համար։

Իսկ Վարդան Տղմուտ գետին աջ կողմը՝ այսպէս կը շակէր իր բանակին ճակատը։ Առաջին գունդը Արծրունեաց իշխանին (Ներշապուհի) ձեռքին տակ, նիզակակից ունենալով Մոկաց մեծ իշխանը։ Երկրորդ գունդը Խորէն Խորխոսունիի ձեռքին տակ, նիզակակից ունենալով Արսէն Ընձայեցին ու Ներսէհ Քաջրերունին։ Երրորդ գունդը Թաթուլ Վանանդեցիի ձեռքին տակ՝ նիզակակից ունենալով Տաճատ Գնթունին։ Իսկ չորրորդ գունդը՝ Վարդան Մամիկոնեան կ'առնէ իր ձեռքին տակ՝ նիզակակից ունենալով Արշաւրի Արշարունին եւ իր հարազատ եղրայրն Համազապեանը, եւ չորս գունդերուն ալ թեւերը կը կազմէ ու կը զօրացնէ նախարարեան եւ ժողովրդեան քաջերէ։

Երկու կողմերն ալ պատրաստ էին։ Հնչեց յարձակման փողը։ Սոսկալի՛ եղաւ ընդհարումը։ Նիզակի, նետի, սուրի բազմախուռն կռիւ մըն էր, որ կը մղուէր։ Պահ մը Վարդանանք Տղմուտի մէջ ձգեցին Պարսից գունդը. պարսիկը ծանօթ չէր գե-

ախ հուներուն եւ նեղը ինկան, «զտեղեաւն զեռալ սկսան»: Հայ ձիաւորներ յարձակեցան անոնց վըրայ: Հայոց ձախակողմը տկարացաւ. Վարդան մեծ ոյժով մը ատոր օգնութեան դիմեց, զարկաւ Պարսից աջ թեւը, կրցաւ ցրուել Մատեան մեծամուր գունդը, եւ բաժնուածներ սկսան «քաջ քաջ ի փախուստ դառնալ»: Մուշկան Նիւսալաւուրտ չվատեցաւ այս հարուածէն. ուզեց հայ գունդին վերջապահներուն վրայ յարձակիլ «ի հովիսս լերանցըն»: Փողից իր զօրքերը եւ զիւք բռնեց Վարդանի գունդին գէմ: Երկու բանակներ կը զարնուին իրարու. դիակները դերուակներու պէս կը դիզուին, եւ պամիչին խօսքով՝ Երկու կողմերն ալ «զպարութիւն խոստովանէին»:

Մուշկան Նիւսալաւուրտ սակայն չուտով կը լցոնէ իր վիզերէն եւ զինուորներէն ինկածներուն տեղերը եւ կը յաջողի պաշարել զկորովին Վարդան: Այս կոիւին մէջ է, որ կ'իյնայ Վարդան, նախճիրի հաւասար կոտորած մը ընելով թշնամի գունդին մէջ, իւր քաջ նիզակակիցներուն հետ:

Գարնան օրեր էին. կոիւներով օրը երեկոյացաւ. ծաղկալից դաշոը կարմրեցաւ արիւններով. խոցեալներու դիակներուն կոյտերուն մնչիւնը, բեկեալներու մոնչիւնը, վիրաւորեալներուն թաւագըրոր սոզալը, վատերուն փախուստը, լքեալներուն թագուստը, անարի մարդոց սրտաթափումը, կանացիներուն ճշիւնը, սիրելիներուն ողբերը, մերձաւորներուն աշխարումը, բարեկամներուն վայելն ու աւաղները՝ մարդուն սիրալ կտոր կտոր կ'ընէին եւ աղիքները կը դալարէին: Յայտնի չէր թէ ո՞ր

կողմ յաղթեց կամ ո՞ր կողմ պարտուեցաւ. վասնզի «քաջ ընդ քաջ ելեալ՝ երկոքին կողմանքն ի պարտութիւն մատնեցան»:

Եթէ «զօրավարն հայոց» ինկած չըլլար, Արտազի պատերազմը կտրուկ ելք մը ունենար թերեւս: Բայց Անոր մահը եւ մահը նշանաւոր քաջերուն՝ սպատճառ եղաւ, որ հայ բանակը ցիրուցան ըլլայ՝ Պարսից հզօր գունդին առջեւ: Բայց ցրուողներ կ'երթան անառիկ ամրոցներու մէջ կ'սպասեն իրաց ելքին:

Տղմուտի եղերքն ինկած էին,

ՔԱԶՆ Վարդան Մամիկոնեան՝ 133 ընկերներով. ԿՈՐՈՎԻԻՆ Խորէն Խորլիսուուին՝ 19 ընկերներով.

ԱՐԻՆ Արտակ Պալունի՝ 57 ընկերներով.

ԶԱՐՄԱՆԱԼԻԻՆ Տանատ Գնբունի՝ 19 ընկերներով. ԻՄԱՍՏՈՒԻՆ Հմայեակ Դիմաքսեան՝ 22 ընկերներով.

ՀՐԱՇԱԿԵՐՑՆ Ներսէ Քաջբերունի՝ 7 ընկերներով.

ՄԱՆՈՒԿԻՆ Վահան Գնունի՝ 3 ընկերներով.

ԱՐԴԱՐՆ Արսէն Ընածայեցի՝ 7 ընկերներով.

ՅԱՌԱԶԱԴԱԴՄՆ Գարեգին Սրուանձտեան՝ իր երկու հարազատներով եւ 18 ընկերներով:

Այս մեծամեծ ինը նախարարներուն հետ նահատակուողներուն թիւն է 296 հոգի: 740 հոգի ալ կը նահատակուին Արծրունեաց եւ այլ նախարարութեանց կտրիձներէն, «որք զանուանս իրաքանչիւր ի դպրութիւն կենաց զրեցին ի նմին աւուր ի մեծի պատերազմին: Եւ միահամուռ լինի ամենայն՝ հազար եւ երեսուն եւ վեց այր»:

Իսկ Մ. Նիւսալաւուրտ՝ կը կորսնցնէ իր քաջամարտիկներէն Յ544 հոդի, որոնց իննը «ի մեծ պատուաւորացն էր»։ Պարսից կրած հարուածը եռապատիկն աւելի է, բայց անոր ազգեցութիւնը «եօթընպատիկ» եղաւ Եղիշէի բացատրութեամբ։

Անհնարին է Պարսիկ Զօրավարին վիշտը, իր անդարմանելի կորուստներուն համար։ Բայց Վասակ, որ այս պատերազմի մէջ փիզերուն ետեւ ապաստանած էր, դարձեալ երեւան կուզայ եւ կը ջանայ միխթարել Մ. Նիւսալաւուրտը եւ հնար մը դանել՝ նոււաճելու համար Հայոց ամրոցները, ուր քաշուած էին պատերազմէն ազատող նախարարներ եւ զինուորներ։

Մ. Նիւսալաւուրտ տեղեկագրած է Դրան պատերազմին եւը։ Երկու կողմին կորուստներն ալ սաստիկ ցաւ պատճառած են Յաղկերտի կառավարութեան։ Եւ ներում չնորհուած էր Հայոց։ Վասակ այս ներման պարագան կ'ուզէ շահագործել դարձեալ։ Վարդանանք թէեւ կը հաւատան, որ «իրաման թագաւորին հաստատութեամբ էր տրեալ», բայց չէին կրնար վստահիլ Վասակին «վասն նենգութեանն»։

ԵՕԹՆԵՐՈՒՐԴԻ ՅԵՂԱՆԱԿ

Վասակ չուզեր յուսահատիլ։ Իր խորհրդովն է, որ Մուշկան Նիւսալաւուրտ կը յարձակի այն ամրոցին վրայ, ուր ինկած էր հայ զօրագունդ մը, եկեղեցական դասուն հետ։ Պարսիկներ շատ կոռւեցան, բայց չկրցան ազգել։ Աւետարանի վրայ երդումներ

ըրին, որ անձնատուր ըլլան։ Եկեղեցականութիւնը, որոնց գլուխը Յովսէփի եւ Ղեւոնդ կը գտնուէին, կը հաւանէր, բայց զօրականներուն մեծ մասը չէին ուզեր վստահիլ Վասակին։

Այդ քաջ զօրականներէն մէկը, ԲԱԿ, բերդի պարսպին վրայ կանգնած խստիւ կը թշնամանէ Վասակը, եւ Մուշկան Նիւսալաւուրտի կը պատմէ Հայոց աշխարհին կրած վնասները անոր երեսէն։ Թէ՛ Հայեր եւ թէ՛ մանաւանդ Պարսիկներ իրաւունք կուտան քաջն Բակին, որ գիշերանց վար կ'իջնէ բերդէն, իր եօրը հարիւր կտրիճներով, կը ճեղքէ Պարսից բանակը եւ կ'անցնի կ'երթայ անլնաս։

Պաշարումը կը սաստիկանայ ներսը մնացողներուն վրայ։ ուտելիք չմնար. թէեւ չեն ուզեր անձնատուր ըլլալ, բայց կ'ստիպուին ակամայ իջնել վար, որոնցմէ 213 հոդի անմիջապէս սրախողիսող կ'ըլլան։ Յովսէփի եւ Ղեւոնդ կը բողոքեն Դուռը՝ ամբաստանելով Վասակը։ Հայ եկեղեցականութեան այս երկու գլխաւորները վար կը դրուին, միւսները ազատ կ'արձակուին, հրաման ստանալով «Վասն շինութեան եւ Խաղաղութեան աշխարհին»։

Եւ սակայն մարդիկն հայոց քաջ գիտեն, թէ Դուռը յեղյեղուկ է, եւ Վասակ՝ անվստահելի։ Չեն ուզեր այդ պայմաններու մէջ ապրիլ. ի՞նչ կ'արժէ կեանքը՝ երբ մեռած են իրենց սիրելիները. ի՞նչու հաւատ ընծայեն սուտ թողութեան՝ քաջ նահատակներու մահէն ետքը, պատուական նախարարութեան անարդ թշուառութենէն ետքը, Հայաստանի փափկութեան վտանգուելէն ետքը։ Ուրեմն կ'որոշեն քաշուիլ լեռնոտ ամրոցները, եւ դիմադրութիւնը

շարունակել: «Լաւ համարէին զգազանաբար քընակութիւնն աստուծպաշտութեամբ ի քարանձաւ կելոյ, քան ուրացութեամբ փափկանալ յիւրաքանչիւր շինուածս» :

Հոդեկան արխութիւնը կը խանդավառէ զիրենք. այլեւս կորսնցնելիք մը չունէին. ազատութեան հաւատքը կը զօրացնէ զիրենք. յուսահատութեան տեղ պաղարիւնը կը տիրէ. սպանուողներուն համար այլ եւս չկայ ողբ կամ հեծեծանք: «Խնդութեամբ ընկալան զյափշտակութիւն ընչից բազմաց, եւ ոչ յիշէին ամենելին՝ եթէ եղեալ իցեն նոցա ստացուածք» :

Ասոնք հասարակ մահկանացուներ չէին. մեծ նախարարական ցեղէ մարդիկ էին. «Եղբարք եւ որդիիք եւ դստերք, հանդերձ ամենայն սիրելիօֆ իւրեանց». ոմանք Խաղտեաց անլոյս երկրին ամրոցներուն մէջ, շատեր հարաւային կողմը, Տմորեաց անմատչելի ամուրներուն մէջ, ուրիշներ Արձախի թանձրախիտ անտառներուն մէջ, ոմանք ալ նոյն խսկէի միջոց աշխարիին բռնացան ի վերայ բազում ամրոցացն» : Ամէնքը միայն մէկ փափաք ունէին. չըտեսնել «զաւեր սուրբ եկեղեցեաց» :

Վասակ կը կատղէր, երբ կը տեսնէր թէ իր բոլոր հնարքներն ի գերեւ կ'ելնէին: Բայց յուսահատիլ չգիտեր Սիւնեաց Իշխանը. իր խորհրդով օդնական գունդեր եկան եւ Պարսից բանակէն ինկածներուն տեղը լեցուցին, եւ բանակը վերակաղմբւեցաւ եւ զօրացաւ առաջուանին պէս:

Առաջին յարձակումը կրեց կապոյտ լեռան մեծ ամրոցը: Բերդայիները լաւ դիմադրեցին, սպան-

նելով յարձակողներէն շատերը: Դարձեալ ողոքանք, դարձեալ խարէութիւն՝ Պարսից կողմէն՝ Վասակի թելադրութեամբ: Ոչ ոք չէր վստահեր. բայց այնքան սրատուու երդումներ եղան, որ Արշէն երէց ստիպուեցաւ վար իջնել բերդէն քանի մը ընկերներով եւ խօսիլ Վասակին հետ, որ չուզեց լսել երշէն երեցը եւ կապել տուաւ ամէնքն ալ: Միւս կողմէն ասպատակաւորներ զրկեց ամրոցներէն դուրս գտնուած տեղերու վրայ եւ գերի վարել տուաւ անպաշտապան Հայերը եւ հրդեհել տուաւ անոնց տուներն ու տեղերը:

Տմորիքի ամրոցին մէջ ամրացողներ զայրացան Վասակի այս նոր նոր շահատակութիւններուն դէմ եւ փոխադարձարար ասպատակեցին Պարսից մօտիկ սահմանադրուխներէն ներս, սովաննեցին, գերեցին գերփեցին, հրդեհեցին եւ վերադարձան իրենց տեղերը:

Խաղտեաց լեռներուն մէջ ամրացողներ ալ դուրս եկան, յարձակեցան Տայոց ձորագաւառը, ուր բազում Պարսիկ գունդեր հաւաքուած էին եւ սաստիկ կը նեղէին երկիրը, կարծելով որ նախարարներու դանձը հոն պահուած է, եւ երկու գիւղերու ալ եկեղեցիները այրած էին:

Այս յարձակման գլուխ եւ առաջնորդ էր Երանելին Հմայեակ, Քաջն Վարդանին եղբայրը: Սոսկայի կոտորած մը տուին Պարսիդ գունդերուն, մնացածը փախցուցին, բայց ինքն Հմայեակն ալ ինկաւ այս կուիին մէջ «յանլինայ քաջութեամբ մարտուցեալ»: Այս հարուածը այնքան սուղի նստաւ Պարսից վրայ, որ այլեւս չյանդգնեցան ամէն տեղ ասպատակել,

մանաւանդ զգուշացան Եկեղեցիներու վնասելէ : Իսկ Արձախի անտառներուն մէջ ամրացողներ չեն մնար անտարբեր : Անոնք ալ մարդ կը զրկեն Հոնաց աշխարհ, կը յիշեցնեն իրենց դաշինքը, նոյն իսկ կը մեղադրեն, որ չեն եկած կոռուի : Վերջապէս բանագլնացութիւնք յաջող ելք մը կ'ունենան . Հոնք կը յարձակին Պարսից սահմաններուն վրայ, կը զարնեն, կը գերեն, կը գերփեն, մանաւանդ կը խրամատեն Ճորայ նշանաւոր Պահակը, և կը վերապառնան իրենց երկիրը, եւ այսպէս ցոյց կուտան Յազկերտի Կառավարութեան, թէ իրենք դաշնակից են Հայոց :

Մուշկան Նիւսալաւուրտ կը շուտրի Հայոց այս յաջողութիւններէն, եւ բոլոր վնասները կը վերագրէ Վասակին, եւ անձամք Տիգրոն երթալով՝ կ'ամբաստան զայն՝ իրեւ պատճառ գործուած բոլոր չարփներուն :

Յազկերտ կը խոռվի. կ'ուզէ ստուգել իրողութիւնը. իմաստունն Միհրներէն խորհուրդ կուտայ Յազկերտին . «Եթէ կամիս ստուգութեամբ լսել զարդարն, որք գլխաւորք Քրիստոնէիցն են ի Հայս, տուր կոչել, եւ զան յօժարութեամբ եւ ասեն ֆեզ զամենայն արդարութեամբ» :

Այս նպաստակաւ Ատրորմիզդ, աւագ նախարարներէն մին, Հայաստան կը զրկուի Մարզպանութեան պաշտօնով, որ արդէն ծանօթ էր Հայոց եւ պատերազմի մէջ ալ գործակիցն էր Մ. Նիւսալաւուրտին :

Իսկ Մ. Նիւսալաւուրտ իր մնացած զօրքերով դրկուեցաւ Աղուանից Լինաց, Ճեճատակաց, Թաւասպարաց երկիրները եւ ի Խիբիովան եւ այն բերդերը, զորս Հոնք քակեր եւ քանդեր էին ի հաշիւ Հայոց : Որովհետեւ Յազկերտ սաստիկ

ցաւ կ'զգար ոչ միայն աւրուած բերդերուն եւ երկիրներուն համար, այլ մանաւանդ Ճորայ Պահակին քանդուելուն համար, որ տարիներու ընթացքին մեծաշխատութեամբ հազիւ շինուած եւ ի գլուխ ելած էր եւ դժուարաւ կրնար վերաշինուիլ :

Ատրորմիզդ Մարզպան Հայաստան մտաւ «սիրով խաղաղութեամբ» : Մէկ կողմէն Վասակ եւ քրիստոնէից գլխաւուները Դուռը կը կոչուին, իսկ միւս կողմէն Ատրորմիզդ ներքին քննութեան կը ճեռնարկէ : Ռշտունեաց Եպիսկոպոս Սահակ, Արծրունեաց Առաջնորդ Մուշէ երէց, որոնք ատրուչաններ քանդած եւ մոգերը հալածած էին, հրաւիրուեցան Ատրորմիզդին քով . նոյնպէս Սամուէլ Քահանայ եւ Արքամ Սարկաւագ, որոնք կապուած էին Վասակի հրամանաւ, Արտաշատի ատրուչանները քանդելու յանցանքով . ինչպէս նաև Մեծն Յովսէփ, Ղեւոնդ, Քաջազ, Արշէն, ասոնք Ատրորմիզդին պատմեցին բոլոր անցուգարձերը, որ ամէն բան ստուգելէ ետք «զրեաց եւ եցոյց յարքունիս զամենայն նշանարտութեամբ, որպէս զիարդ լուաւ ի բերանոյ նոցա» :

Ատրորմիզդ իր տեղեկագրին հետ այս սուրբ Քահանաներն ալ «կապանօք» ճամբայ հանեց դէպի Տիզբոն :

Երկու ամիս եւ քսան օրուան ճամբորդութենէ մը ետքը կը հասնին «ի ձմեռոցն արքունի» :

Վասակ թէեւ շատ աւելի կանուխ հասած է Դուռը, եւ կ'աշխատի համոզել Յազկերտը եւ անոր կառակարութիւնը, թէ ինքն յանցաւոր չէ, բայց Յազկերտի մաքին մէջ չկրնար արդարացնել ինքզինքը : Յազկերտ կ'ուզէ հակառակ կողմն ալ լսել հրապարակերտ կ'ուզէ հակառակ կողմն ալ լսել հրապա-

բակաւ, եւ ըստ այնմ դատել. «Յորժամ քրիստոնեայքն եւս եկեցին, հասարակ լուայց յատենի»:

Ասրորմիզդ հրաման կ'ստանայ «սիրով նուածել» Հայոց աշխարհը: Այս էր պատճառը, որ եպիսկոպոսներ արտօնութեան «ըստ առաջին սովորութեան» վարել իշխանութիւնը, յայտնի եւ համարձակ. հարկերը կը չնորհուէին. առ ժամանակ մի այրուծին ալ կը թեթևնայ. նոյն իսկ միայնակեացներ, որոնք ցիրուցան էին եղած, կ'արտօնուին գալ բըռնել իրենց առաջուան տեղերը: Աստուածալաշտութեան կարգը, ինչպէս որ էր նախնեաց ատեն, նոյն կերպով կը թոյլատրուի. վերջապէս՝ ազատ թէ շինական, եկեղեցական թէ աշխարհական, ազատ էին գալ եւ տիրանալ իրենց ստացուածքներուն եւ կալուածներուն: Ակամայ եւ բոնի կրօնափոխ եղողներ, ազատ էին պաշտել իրենց քրիստոնէութիւնը: Ասրորմիզդ, յանուն Յազկերտի, այս բոլոր գիւրութիւնները պաշտօնապէս յայտարարեց, մշակեց: Բոլոր Հայեր, որ ցրուած էին ասդին անդին, կամ ամրացած էին անմատչելի բերդերու մէջ, կուգանու կ'սկին վերաշինութեան գործին: Ամրացեալ նախարարներ անձնատուր կ'ըլլան եւ իրենց ընտանիքն ու ստացուածքները Ասրորմիզդին վստահելով, առանց կապանքի կ'երթան Տիգրոն, ներկայանալու կառավարութեան:

Այսպէս երբ Հայոց բոլոր երեւելիներն ու գըլխաւորները կը հաւաքուին Դուռը՝ հարցափորձը կ'սկի Միջըներսէի նախազահութեան ներքեւ:

Օրեր կը տեւէ ամբաստանութիւնը. Վասակին հնարքներն ու նենդութիւնները մի առ մի, փաստերով, պաշտօնագիրներով յերեւան կը բերուին. մէջ-

տեղ կը դրուին Վրաց, Աղուանից, Աղձնեաց, Յունաց, եւ Յոյն սպարապետ Անտիոքոսին գրուած պաշտօնագիրները, ամէնքն ալ Հայոց մարզպան Վասակին կնիքովը կնքուած: Ատոմ Գնունի, որ Վասակի կողմէն, Բիւղանդիոն զրկուած էր, կ'ամբաստանէր Վասակը. նոյն ինքն Մ. Նիւսալաւուրտ, կը հաստատէր, թէ Վասակ պատերազմէն ետքն ալ շատ արիւն թափել տուաւ, իր սուտ երգումներով: Այս բոլորին վրայ՝ կը հաստատուի Վասակին անհաւատարմութիւնն ալ արքունի զանձին. — «Եւ ի վերայ այսր ամենայնի վնասու, եւ գող եւս գտաներ հարկի աշխարհին, որ յարքունիսն երթայր»:

Վասակին ուրացեալ ընկերներն իսկ կ'ամբաստաննեն զինքն. նոյն իսկ հալածեալ մոգերուն եւ փըշտիպաններուն մնացորդները՝ Վասակը կ'ամբաստանէն իրբեւ վնասակար: Իր ազգականներն ալ, որ արդէն յառաջազոյն ամբաստանած էին զինքն, հրապարակ կուգան, թէ Վասակ, իրբեւ Մարզպան Հայոց, ինչպէս բարեկամացած էր Պարսից թշնամիներուն հետ (Հոն Հեռանի եւ Բաղասական արքայի հետ), որոնք մեծ վնասներ պատճառած էին ասպատակելով եւ աւարելով Հայքը, Վիրքը, Աղուանքը եւայն: Ամբաստանութիւններու ոգին կը շեշտուի սակերպով, թէ Վասակ «ոչ երբեք արդարութեամբ վաստակեալ էր ի մանկութենէ»:

Սահակ Եպիսկոպոս Ռշտունեաց, կը ծանրանայ Վասակի նկարագրին վրայ, իրբեւ ուրացողի, եւ այդ անվատահելի նկարագրին կը վերագրէ անոր բոլոր գէշութիւնները: Դուք, կ'ըսէ, իր արժանիքէն աւելի մեծարեցիք զինքն: Վրաց Մարզպան ըրիք, կ'ըսէ, հարցուցէք թէ դո՞ւ են անկէ: Միւնեաց Տէ-

բութիւնը (Տանուտէրութիւն) տուիք իրեն, հարցուցէք իրեն, թէ ազգականներուն, թէ ինչեր կը պատմեն իր մասին։ Հայոց մարզպան ըրիք զինքն, «զոր նախնեացն ձերոց մեծաւ աշխատութեամբ գտնալ էր, դա ի միում ամի կորոյս գերկիրն ամենայն»։

Սուրբ Յովսէփ եւ Ղեւոնդ Երէց, որ Սահակ Եպիսկոպոսի հետ ներկայ էին ամբաստանութեան, համամատիս էին։ Սահակ եպիսկոպոս իրրեւ քաջ պարսկապէտ կը խօսէր ամէնուն կողմէն։

Միհրներսէն, որ արդէն չէր սիրեր Վասակը, անոր գատապարտութեան կողմը բոնեց եւ գատավարութեան եզրակացութիւնը ըստ այնմ հազրոգեց Յաղկերտին, որ «բարկացաւ յոյժ եւ ի խորս խոցեցաւ»։ բայց, կ'ըսէ Եղիշէ, չուզեց շուտով պատժել, այլ՝ համբերեց տասներկու օր, մինչեւ որ գլխեցաւ փուրսիւը։

Նշանաւոր օր մը՝ արքունական սեղան մը սարքուած էր Շահնշահներու պալատին մէջ։ Բոլոր պատուականներ եւ երեւելիներ հրաւիրուած էին սեղանի։ Վասակն ալ անոնց մէջ կը ճոխանար՝ իր չքեղ համազգեստով, որ շատ ուշագրութիւն կը գրաւէր։

Մեծամեծներու յատուկ գահլիճին մէջ բազմած էր Վասակ, երբ սենեկապան մը եկաւ Յաղկերտի կողմէն եւ ըստաւ։ «Արքայ յղեաց առ քեզ։ յորմէ՞ գտնալ է քո զայդ ամենայն պատուական պատիւր, ասա՛ ինձ վաղվաղակի, վասն որո՞յ արդար վաստակոց»։

Սենեկապանը կը յիշեցնէ Վասակին վատութիւնն ու իր գատապարտութիւնը։ Նոյն իսկ հոն չըսուած գէպք մըն ալ կը յիշեցնէ։ այսինքն՝ իր հօրեղոր Վաղենակ Միւնիին սպանութիւնը։ «Զի ոչ ըստ կար-

զի ունէր նա զտէրութիւնն Սիւնեաց աշխարհին, այլ նենգութեամբ եւ բութեամբ ետ սպանանել զիօրեղբայր իւր զվադենակ, եւ յինքն տարաւ զտէրութիւնն իբրեւ քրտիկար յարքունիս»։

Դատապարտութիւնը ամէն կողմէն կը ծանրանայ։ բոլոր աւագանին կը վկայէ անոր յանցապարտութեան եւ վերջապէտ կը տրուի մահուան վճիռը։

Դահճապէտը կուգայ գտապարտեալ Վասակին մօտ, կ'առնէ անոր վրայէն բոլոր արքունական պատիւները, անոնց տեղ կ'զգեցնէ իրեն մահապարտի հանդերձը եւ կը նետէ մահապարտից զնտանը։

Նախարարներ, եպիսկոպոսներ եւ Երէցներ, թէեւ կապանքի եւ նեղութեան մէջ են, բայց կը մը-խիթարուին տեսնելով, որ Ուրացեալը դտաւ իր պատիժը։

Վասակ, իր անարգութեան մէջ, կը տեսնէր հաւատացեաներուն եւ հաւատարիմներուն միաբանութիւնը։ Անոնց զուարթ եւ սպայծառ դէմքէն կարծես խղճատանջ կ'ըլլար։

Վասակ օր ըստ օրէ հրապարակ կը հանուի, հաշիւ եւ համար կը պահանջուի իրմէ։ կը հասնի յետին խեղճութեան։ որովհետեւ ինչ որ ունէր առին, յափրչառակեցին։ «Եւ այնպէս սաստիկ արկին զպարտերս հարկաց աշխարհին ի վերայ տան նորա, որ մինչեւ զիարց եւ զիաւուց զիւր արարս եւ զզարդս կանանց եւս եղ ի վերայ եւ ետ եւ տուժեցաւ, և ոչ կարաց հատուցանել զպարտսն արքունի։ Եւ յայն տեղի հասուցին, մինչեւ հարցանել նման եթէ կայցէ՞ ինչ զանձ ի գերեզման նախնեացն մերոց։ Եւ եթէ զտեալ էր նորա, հանէր և տայր ընդ իւր և ընդ ընտանեացն տուգա նըս։ որպէս զի բազում մարդիկ իսկ չոգան ի տուժի»։

Երկար ատեն կը մնայ Վասակ բանտի մէջ, հիւծած մաշած, անարգուած: Եղիշէ՝ շատ սոսկալի կը նկարագրէ Վասակին վախճանը: Փարպեցին առելի մեղմ է եւ աւելի պատմական է այս նկարագրութեան մէջ ալ:

Վասակ կը մեռնի վերջապէս բանտի մէջ, առանց զղումի. իր սիրելիներն ու ծառաներն իսկ խոյս կուտան իրմէ իր վերջին օրերուն: Անոր, որ կ'ուզէր Հայոց թագաւոր ըլլալ, գերեզմանին տեղն անդամ յայտնի չըլլար. «Ոչ յիշեցաւ անուն նորա ի մէջ սըրբոց, եւ ոչ մատեաւ յիշատակ նորա առաջի սուրբ սեղանոյն յեկեղեցւոզն»:

ՈՒԹԵՐՈՐԴԻ ՅԵՂԱՆԱԿ

Վասակին չնորհազրկութեամբ եւ բանտարկութեամբ խնդիրը չվերջացաւ. ոչ ալ Հայաստանի մէջ տիրեց կատարեալ խաղաղութիւն: Դուռը կոչուած նախարարներ եւ մա՛նաւանդ եկեղեցականք կապանքի մէջ էին:

Քուշանքնորէն ոտքի ելած էին: Յազկերտ խաղաց գէպի հոն. հայ բանտարկեալները տարուեցան ու պահուեցան նիւշապուհ քաղաքի գղեկին մէջ: Իսկ Յազկերտ իր անցած բոլոր տեղերուն մէջ կ'ահարեկէր քրիստոնեայ ժողովուրդները:

Բել անուն Հոն մը, թագաւորական ցեղէ, գաղտնապէս քրիստոնէացած, սաստիկ կը ցաւէր կապանքի մէջ գտնուած Հայոց վրայ. այս մարդը կ'երթայ Քուշանաց թագաւորին եւ շատ կարեւոր տեղեկութիւններ կը հազորդէ Հայաստանի հալածանքին, ձո՞րայ Պահակին խրամատութեան, Յազկերտի բանակին

մէջ տիրող երկպառակութեան եւ ուրիշ կարեւոր խնդիրներու մասին: Քուշանաց թագաւորը, թէեւ չուզեր պատերազմիլ, բայց կ'օգտուի առիթէն, կ'իյնայ Յազկերտի բանակին վերջին թեւին վրայ, կ'աւրէ զայն, կ'ասպատակէ արքունի գաւառներ եւ կը վերագառնայ իր տեղը:

Այս ձախողութիւնը քիչ մը կը թուլցնէ Յազկերտին հպարտութիւնը: Մոգեր գարձեալ առիթ կը դանեն ամբաստանելու կապուած քրիստոնեաները: Այս ձախողութիւնը, կ'ըսեն, արդիւնք է մեր աստուածներու բարկութեան, որ ողջ պահեցիր Քրիստոնեաները: Նոյն իսկ կը ստեն եւ կ'ըսեն թէ Քրիստոնեայք բանտի մէջ կ'անփեն քեզ:

Դենչապուհին կը յանձնուի հայ բանտարկեալներուն հարցուփորձի խնդիրը: Դենչապուհ արդէն ծանօթ է Հայաստանի, Վարդանանց Պատերազմէն յառաջ, ուր զրկուած էր խիստ հրահանդներով, հիմայ բաւական զիւրութիւն եւ պատրաստութիւն ունի Հայոց հետ խօսելու, վիճելու, մա՛նաւանդ որ ծանօթներ ալ ունի անոնց մէջ, ինչպէս Սուրբն Յովկուսի, Ղեւոնդ Երէց, Սահակ Եպս. Մշտունեաց:

Առաջին հրամանը կը տրուի Սամուէլ Քէյ.ի եւ Աբրահամ Սարկաւագի համար, որ կարաւանի մէջ էին, որպէս զի զաղունապէս սպաննուին. իսկ նիւշապուհի բերդին մէջ կապուածները տասնը հինգ օթ (գօնադ) հեռի էին արդէն կարաւանէն: Ասոնց չարչարանքին գործը յանձնուած էր Ապար աշխարհի Դենչապուհին, որ «Քան զբաղում զիտունսն եւս տեղեակ էր զրադաշտական օրինացն»: Քառասուն օր տանջնքներուն եւ զրկանքներուն ամէնքն ծանրին կ'ենթարկէ եկեղեցականները՝ զատելով նախարարներէն,

կարծելով թէ այդ կերպով կամ պիտի մեռնէին կամ պիտի ընդունէին մոգութիւնը։ Հակառակ իր ջանքերուն, բանտարկեալները աւելի զուարթութեամբ եւ գիտակցութեամբ կը համբերէն։ Գիտուն Դենպեալ անձամբ կը հսկէ անոնց վրայ եւ վերջապէս հիացումով ու համոզումով ինքն ալ քրիստոնեայ կ'ըլլայ բան տի մէջ եւ Վարդանանց յիշատակներով այնքան կը առզորուի, որ հաւատքի աղատութեան համար նահատակուղ քաջերուն երանելի խումբերը կը տեսնէ տեսիլքով։ Նոյն իսկ կը ճանչնայ Վարդանը, Արտակը, Խորէնը։

Դենչապուհ կ'ապշահարի, երբ կ'ստուդէ Դենպետին քրիստոնէանալը, եւ կը տեղեկագրէ Յազկերտին։ Այդպիսի գիտուն եւ երեւելի անձնաւորութեան մը քրիստոնէացումը ինքնին մեծ հարուած մը կը նկատուի մոգութեան, եւ կ'աքսորուի երկրին հեռաւոր մարգերը։ Այս դէմքէն ետքը՝ Դենչապուհ բոլորովին լիազօրութիւն կ'ստանայ Յազկերտէն՝ կապեալներու կեանքին եւ մահուան վրայ։

Դենչապուհ իրեն օգնականներ կ'առնէ երկու մեծ պաշտօնակալներ եւս, Զնիկանն Մարզպետը եւ Մովան Հանդերձապետը, եւ զիշերանց աւելի հեռի, եւ գէշ տեղ մը փոխազըել կուտայ կապեալները։ Բացի դահիճներէն ոչ ոք չարտօնուիր անոնց մօտենալու։ Բարերախտաբար Խուժիկ անուն ասորի մը, արքունի զօրքերէն, «որ ի ծածուկ ունէր զքրիստոնէութիւնն», դահիճի պաշտօնով կը գտնուէր դահիճներու խումբին մէջ, որուն վիճակեցաւ հսկողութեան գործը նախարարաց վրայ։

Այս դժնզակ, ասլառաժուտ, անբոյս տեղին վըրայ երկայն պարաններով երկու երկու իրարու կա-

պուեցան եկեղեցականներ եւ քարչ տրուեցան։ Այս չարչարանքը չահարեկեց եւ չկակղեցուց զանոնք։

Նոր խոստումներ, նոր սարսափներ, նոյն իսկ կրօնական երկար վիճարանութիւններ անօգուտ կը մնան։ Դենչապուհ թէ՛ կը կատղի եւ թէ՛ կը հիանայ։ Այնքան պաղարիւն եւ զուարթուն կը մնան անոնք։

Առաջին նահատակը կ'ըլլայ Արշէն Երէց, որ պրկոցներու մէջ չարչարուելէ ետքը կը գլխատուի։

Դենչապուհ ողոքիչ խօսքերով կ'ուզէ սիրաշահիւ թշունեաց Սահակ Եսպուշ եւ Յովսէփի Կաթողիկոսը, եւ կ'ըսէ. «Մէկ ու կէս տարի մնացի Հայոց աշխարհին մէջ, եւ չեմ յիշեր որ քու մասին դանդաս մը լսած ըլլամ. մանաւանդ Յովսէփի մասին. «զի դա իսկ էր իշխան ամենայն քրիստոնեից, եւ հաւատարիմ յամենայն իրս արքունի»։ Ինչ յառաջ եղող Մարգարան ալ զոհ էր այս մարդէն, եւ ես աչքովս տեսայ, «զի որպէս հայր հաստատուն համարեալ էր ամենայն աշխարհին, եւ անաշառութեամբ սիրէր զմեծամենան եւ զինքունս»։

Դենչապուհ, Դեւոնդ Երէցին շատ կը նեղուի, եւ կ'ուզէ այդպիսի շատ հրամաւուրիչ խօսքերով զատել անկէ Սահակն ու Յովսէփիւ։ Արդէն, կ'ըսէ, ան հիւանդուտ է, բժիշկներէն օգուտ մը չէ տեսեր. «իիւանդուտ կենօք ճանձրացեալ է, եւ փափաքի ի մահ քանի ի կեան»։ Վերջապէս կը յիշեցնէ՛ թէ ես ձեր հետ երկար խօսիլ, վիճել չեմ ուզեր. բայց որովհետեւ ձեղ կը սիրեմ, ձեր աշխարհին աղն ու հացը կերած եմ, «գուք եւ սէր ունիմ ընդ աշխարհին ձեր», այս պատճառաւ կ'ուզեմ որ ապրիք։

Դիպուկ եւ արխական պատասխաններով՝ անյա-

ջողութեան կը մատնուի Դենշապուհ։ Անյողդողդ
են ամէնքն ալ։ Փորձ մըն ալ կ'ուզէ ընել, եւ զատե-
լով իրարմէ զանոնք, առանձինն կը խօսի Ռշտունեաց
Սահակ Եպիսկոպոսին հետ, կ'ուզէ անոր ձեռքով։
Քանդուած ատրուշաններուն խնդիրը ստուզել իրմէ։
Դենշապուհին եւ Սահակ Եպս.ին վիճաբանութիւնը
շատ հետաքրքրական է։ Դենշապուհ այնքան կը
զայրանայ եւ կը կատղի, որ յանկարծ կը քաշէ իր
սուսերը եւ հարուած մը կ'իջեցնէ Եպիսկոպոսին աջ
ուսին վրայ եւ թիկունքին հետ աջ ձեռքը վար կը
ձգէ։

Այլ եւս վերջ գտած է հարցուփորձը։ Ղեւոնդ
առաջին տեղը կուտայ Յովսէփին, իր աստիճանին
կարգով, եւ այդպէս քով քովի կը շարուեն եւ կը
դիմատուին միեւնոյն տեղը։ Կարգով նահատա-
կուողներն են

Սահակ Եպիսկոպոս Ռշտունեաց։

Սուրբն Յովսէփ, Վայոց Զորի Հողոցմանց
գիւղէն։

Ղեւոնդ Երեց, Վանամիդի Խցեւանից գիւղէն։
Մուշէ Երեց՝ Աղքակին։

Արշէն Երեց՝ Բագրեւանդի Եղեգիկ գիւղէն։
Քաջաջ Սարկաւագ՝ Ռշտունիքին։

Ասոնց հետ պէտք է յիշել Նիւշապուհ քաղա-
քի զիտուն Մովսէտը կամ Դենակետը, որ աքսո-
րուած էր։ Նոյնպէս,

Թաքիկ Եպս., որ Ասորեստանի մէջ նահա-
տակուեցաւ։

Սամուել Երեց, Այրարատի Արածոյ գիւղէն։
Աբրահամ Սարկաւագ, նոյն գիւղէն։

Ինչպէս նաեւ Երկու հոգի, որ Վատկետքի մէջ նա-
հատակուած էն։

Առաջին վեցերուն նահատակութեան վայրն է
Նիւշապուհ քաղաքի սահմաններուն մէջ Ապար աշ-
խարհին անապատը, Հրոտից ամսու 25-ին։

Հայ եկեղեցականներուն արիութիւնը տանջանք-
ներու մէջ եւ մահուան առջեւ, բոլորովին կը խոռվէ
Դենշապուհը եւ իր Երկու գործակիցները։ — «Զի՞նչ
զործեսցուք, զի՞նչ արացուք վասն անքնին աղան-
դոյն քրիստոնէից։ Էանզի մինչդեռ կենդանի էին,
զարմանալի էր կեանի նոցա. ընչատեացք էին իբրեւ
զանկարօսու, սրբաւերք էին իբրեւ զանմարմինս, ա-
նաշառք էին իբրեւ զարդարադատս, աներկիւլք էին
իբրեւ զանմահս»։

Դահիճներու գլխաւոր ջանքն եղաւ նահատակ-
ներուն ոսկերքը Հասացնել քրիստոնէից ձեռքը, որոնց
քով այնքան յարգի պիտի ըլլային։ Այս էր պատ-
ճառը, որ անապատ տեղ կատարեցին նահատակու-
թիւնը։ Եւ սակայն Խուժէիը, որ գահիճներու մէջ
էր, նահատակութենէն վերջը, երբ աղաճով եղաւ,
որ այլ եւս ոսկերաց մասին հոգ ընող չկայ, իրեն
նման տասը գաղտնի հաւատացեալներ կ'առնէ. վեց
սուրբերուն մարմինները Երկու վարսախ աւելի հե-
ռի տեղ մը կը փոխադրէ նահատակութեան վայրէն,
եւ հոն կը մաքրեն, կը կազմէն «զոսկերս Երանել-
եացն», եւ գաղտուկ մասունքներ կը բերեն կարա-
ւանը. եւ ետքը կամաց կամաց կը յայտնեն նախ Հայ
զօրսկանին եւ ետքը շատ մը քրիստոնեաններուն, որ
բանակի մէջ էին։ Եւ առաջին ընծան կը նուիրեն
կաղեալ նախարարներուն, որոնց աղատութեան հրո-
վարտակը տրուած էր արդէն։

Եղիշէ գիտել կուտայ, թէ այս նահատակութեան բոլոր մանրամասնութիւնները ինքն լսած է Ասորի Խուժիկէն:

Այս Խուժիկը, վեց սուրբերուն ոսկերքը կը հանդէցնէ զատ զատ տասլաններու մէջ եւ տասլանադիր ալ կը գրէ անոնց վրայ:

ԴԱՐՁԵՑԼ ՎԱՍՆ ԽՈՍՏՈՎԱՆՈՂ ԱՇԱԿԵՐՏԱՅ ՆՈՑՈՒՆՑ

Կարգը և կած էր նահատակեալ Ղեւոնդեանց աշակերտաներուն: Ասոնք ալ միասին կապանքի մէջ էին իրենց վարդապետներուն հետ: Ասոնց հետ էին նաեւ ուրիշ հինգ ասորի քրիստոնեաներ: Ամէնքն ալ չհաւանեցան ուրանալ իրենց հաւատքը դահիճներ ծեծով չարչարեցին զանոնք եւ կարելով անոնց քիթերն ու ականջները աքսորեցին Ասորեստանի խորերը:

Ասոնց մէջ, Խորէն եւ Աբրահամ, ամէնէն համեստները, դահճապետին ուշադրութիւնը կը գրաւեն, կ'ենթարկուին հարցուվորձի մը: Խորէն հիանալի համարձակութեամբ կը պաշտպանէ նահատակեալ վարդապետները, յայտնելով, թէ «զի ոչ դուզնափեայք ոք էին նոքա, այլ ունիին ստացուածս հայրենիս ըստ արժան բաւականին, ըստ նմին եւ սպասաւորս, էր որ իբրեւ զմեզ, եւ էր որ լաւագոյն քան զմեզ, որոց սնուցեալ եւ ուսուցեալն էր»:

Դահճապետն սաստիկ կը զայրանայ այս համեստ եւ հաւատարիմ սպասաւորներու աներկիւղ պատասխաններէն եւ քարշել կուտայ զանոնք այնքան անադորոյն կերպով, որ շատեր կը կարծէին, թէ մեռան:

Երեք ժամ ետքը՝ կ'արթննան, դարձեալ կը խօսին, եւ առ ոչինչ կը համարին գործադրուած չարչարանքը: Իւրաքանչիւրը վեց դահիճներու անդուլ ծեծին տակ կիսամեռ կը մնան, եւ այսչափն ալ չբաւեր, երկութին ալ ականջները կը կարեն, եւ այնպէս մը կը բրեն, «որպէս քէ չիցէ լեալ ի տեղուցն»: Ասոնք կը բրեն, եւ կ'ուղեն մեռնիլ իրենց Վարդապետներուն պէս: Դահճապետը, փոխանակ զայրանալու, այս անգամ կը մեղմանայ եւ կը յայտարարէ, որ եթէ շատ մնայ անոնց մօտ, զինքն ալ հաւատքի պիտի բերեն: Զեր պատիժը, կ'ըսէ, այսչափ է, պիտի աքսորութիք Ասորեստան եւ այս վիճակին մէջ եւ պիտի ըլլաք «մշակ յարքունիս», որպէս զի քրիստոնեաներ ձեր վրայ նայելով չյամառին իրենց հաւատքին մէջ:

Խորէն եւ Աբրահամ կը պատասխանեն, թէ «Դուզ զմեր երկիրս կիսազործ քողեր, մեք յարքունի երկիրն կէս մարմնով մերով ոչ վաստակեմք»:

Դահճապետը, կարծես խզահար, կ'ըսէ. Հերիք է որ այս տեղէն երթաք Ասորեստան, ուր ազատ էք ըմֆի ձեր ուղած կերպով:

Ասոնք են ՀԱՅՈՅ ԽՈՍՏՈՎԱՆՈՂԻ, որոնք խինդով չարչարուեցան եւ խեղանդամ եղան: Եւ որովհետեւ վրիպեցան սուրբ մահէն (նահատակութենէն), սղով եւ տրտմութեամբ կ'երթան իրենց երկա՞ր ճամբան: Զեռքի եւ ոտքի կապանքը ծանր չէ իրենց համար. իրենց ցաւը սա է, որ արժանի չեղան «հաւասարել ընդ քաջ նահատակսն»:

Խոստովանողներն կը հասնին Ասորեստանի Շահուղ գաւառը, եւ «քէպէտ եւ էին յարքունի պատուհասին», սակայն յայտ եւ գաղա մեծ ընդունելութիւն կը գտնեն տեղւոյն քրիստոնէից կողմէն, եւ

օգտուելով առիթէն՝ Ապար աշխարհի կազեալ նախարարներուն նպաստներ կը հաւաքեն ու կը զրկեն, հաւանութեամբ քրիստոնեայ հարուստներուն:

Տասը տարի կը մնան աքսորի մէջ, միշտ հեռուէն ծառայելով Հայ կազեալներուն։ Կը շրջին ամբողջ Ասորեստանն ու Խուժաստանը, յաճախ ճամբորդելով Շահուղէն, Մեշովն եւ Քաջկար քաղաքները։ Սուրբն Խորէն չկրնար դիմանալ խիստ եւ ջերմ կիմային եւ տաժանելի ճարմորդութեան, կը վախճանի ու պատուվ կը թաղուի «ընդ սուրբ վկայսն»։

Արքահամ Խոստովանող «կայր ի նմին առաքինութեան անդադար» երբ լրացան աքսորի տասներկու տարիները։

Երկրին քրիստոնեաներուն թախանձանքով Արքահամ կը հաւանի վերադառնալ «յաշխարին Հայոց» որպէս զի Հայեր անոր վրայ մարմնացած տեսնեն սրամահ եղած քաջ նահատակներն ու չարչարանքի սուրբ կապանքը։

Արքահամ խոստովանողին մուտքն ի Հայաստան օրհնութիւն մըն է ամէն կերպով։ Հրաշալի է Եղիշէին այն էջը, որ Արքահամի վերադարձին նուրիրուած է։ Եւ սասուզիւ Հայոց հրաշալի խոստովանողը այնքան առաքինի եւ շինարար կեանք մը անցուց իր բնաշխարհին մէջ, որ «Յոյնի երանի ետուն վասն նորա աշխարհիս Հայոց, եւ բազում բարբարոս փութացան տեսանել զնա մարմնով»։ Եւ իսղաղ ու սուրբ մարմնով մը ծառայութեան մէջ վախճանեցաւ, կամ Եղիշէի բացատրութեամբ՝ «փոխադրեալ եղեւ յերկրէ յերկինս»։

Արքահամ Խոստովանողին պատմութիւնը վկայաբանական յօրինուածք մը ունի՝ Եղիշէի գրչին

տակ : Խոկ Ղ. Փարզեցի, աւելի ամփոփ և պատմական է այս մասին։ Փարզեցին կ'աւանդէ, թէ Արքահամ Խոստովանող, Սուրբն Խորէնի վախճանումէն ետքը, Ասորեստանի քրիստոնէից երաշխաւորութեամբ ազատ արձակուեցաւ, եկաւ Հայաստան։ Հրեշտականման անձ մըն է Խոստովանողն, որ եպիսկոպոս կը ձեռնադրուի Բգնունեաց աշխարհին վրայ եւ կ'ըլլայ արդիւնաւոր առաջնորդ եւ ուսուցիչ մը (*)։

(*) Պէտք է դիտել տամ ընթերցողներուս նաեւ, թէ Արքահամ Խոստովանող եղած է քանիկազին մատենագիր մը, Ուկեդարեան Դպրոցէն։ Ինչն է քարգմանիչը, Մարութաս Եպիսկոպոսի ԱՐԵՒՆԵԼԵԱՅ կամ ԱՐԵՒՆԵԼԵԱՅ ՎԿԱՅԻՑ Պատմութեան, ասորեքէնէ, որ իրատարակուած է մեծ մասամբ ՍՈՓԵՐՔ ՀԱՅԱԿԱՆՍԻԲԻ շարքին, եւ որու առանձին եւ լման մէկ իրատարակութիւնը պատրաստ է շնորհիւ Ս. Էջմիածնի Միարան Հայր Գալուստի (որ վախճանեցաւ՝ 1918 Յունիս 13)։

Ուշադրութիւն կը իրաւիրեմ այս ոսկեղենիկ քարգմանութեան վրայ, այն պատճառաւ, որ Եղիշէի Վարդանանց Պատմութեան գրական յօրինուածքին եւ այս քարգմանութեան մէջ հետաքրքրական նոյնութիւն կայ։ Իրողութիւն մը, որ շատ կ'օգնէ Եղիշէի Վարդանանց Պատմութեան գրութեան ժամանակը ճշտիլու։

Շատ հաւանական է, որ Արքահամ Խոստովանող իր ախորի երկոտասնամեայ ընթացքին՝ միայն Ապար աշխարհի մէջ քանտարկուած Հայ նախարարներուն եւ կապեալներուն նպաստ հասցնելով չբաւականացաւ։ այլ նաեւ ասորեքէն սորվեցաւ եւ Նիքիերտի Մարութաս Եպս. ին այդ շատ գեղեցիկ գործն ալ քարգմանեց ոսկի հայերէնի, անշուշտ շատ մեծ նմանութիւն գտնելով Ասորեստանի քրիստոնեաներուն եւ Հայաստանի քրիստոնեաներուն նահատակութեանց մէջ։

Եղիշէին՝ Արքահամ Խոստովանողի նուիրեալ հոյակապ դըրուազք ուղղակի հետեւողուրիւն է նոյն ինչն Արեւելեայց Պատմութեան։

ԱՆՈՒԱՆԻ ՆԱԽԱՐԱՐԱՑՆ, ՈՐԲ ԿԱՄՈՔ ԵՒ
ՅՈԺԱՐՈՒԹԵԱՄԲ, ՎԱՍՆ ՍԻՐՈՅՆ ՔՐԻՍՏՈՍԻ,
ԵՑՈՒՆ ԶԱՆՁԻՆՍ Ի ԿԱՊԱՆՍ ԱՐՔՈՒՆԻ

Եղիչ իր Պատմութեան Ուքերորդ Յեղանակին
մէջ կարգ մը մանրամասնութիւններ կուտայ, որոնք
հետաքրքրական են: Այդ մանրամասնութեանց գըլ-
խաւորներն են կապանքի եւ աքսորի մատնուած հայ
նախարարներու անուններն ու անոնց պատագրու-
թեան պատմութիւնը եւ Հայոց Տիկիններուն համա-
կերպութեան եւ կորովին նկարագրութիւնը, որով
կը վերջանայ Վարդանանց Պատմութիւնը:

Նախարարաց անունները.

Բարգէն եւ Բակուր, Երկու եղբայրներ յազդէն
Սիւնեաց :

Ներշապուհ, Շաւասպ, Շնգին, Մեհրուժան,
Փարգեւ, Տանատ, յազդէն Արծրունեաց :

Համազապիան, Համազասպ, Արտաւագդ, Մու-
շեղ, յազդէն Մամիկոնէից :

Արշաւիր, Թաքուլ, Վարձ, Ներսէհ, Աշոտ,
յազդէն Կամսարականաց :

Վահան, Առանձար, Առնակ, յազդէն Ամատուն-
եաց :

Ասոմ, յազդէն Գնունեաց :

Թաքուլ, Սատոյ եւ Երկու ուրիշ ընկերներ, յազ-
դէն Դիմաքսենից :

Շմաւոն, Զուարէն, Առաւան, յազդէն Անձա-
ւացեաց :

Փապակ, Վարագդէն, Դաղ (Դատ), յազդէն Ա-
ռաւեղենից :

Ապրսամ, յԱրծրունեաց տոհմէն :

Սահակ, Փարսման, ի տոհմէն Մանդակունեաց :
Վրէն, յազդէն Տաշրացեաց :
Բաբիկ, Յուխնան, յՄափսոնեան տանէն :
«Այս երեսուն եւ հինգ արք, են որ յաւագ նախա-
րարացն, եւ են որ ի կրտսերագունիցն»: Բայց ա-
մէնքն ալ մարմնով նախարարագն են, իսկ Հոգեկան
առաքինութեամբ՝ երկնաւոր քաղաքացի: Ուրիշ շատ
մը մարդիկ ալ կային ասոնց հետ, արքունական տու-
նէ կամ նախարարական տունէ, որք քաջ նահատակ-
ներուն մարտակից եւ նիզակից եղան:

Բայց մենք, կ'ըսէ պատմիչը, միայն գարմացած
չենք որ այս մարդիկ իրենց կամքով մտան փորձու-
թեան մէջ, այլ մանաւանդ սքանչացած ենք սա' ի-
րողութեան, որ այսպիսի վասկուլ մարդիկ, որ ձիւ-
նեղէն լեռներու ընդարձակասուն բնակիչներն էին,
բնակիչը եղան խորչակարեր զաշտերուն: Անոնք որ
ազատ երէներու պէս կը չըջին ծաղկաբեր լեռներու
մէջ, արեւելքի բոցակէզ աշխարհը նետուեցան կա-
պեալ ոտքերով: Նեղութեան հացը կերան եւ կարօ-
տի ջուրը խմեցին ցորեկին մութի մէջ արգիլուե-
ցան, իսկ գիշերը մնացին անլոյս, առանց ծածկոցի,
առանց անկողնի, կենդանիներու պէս գետնախչար
եղան ինը տարի եւ վեց ամիս: Եւ այնպիսի մեծ ու-
րախութեամբ կրեցին այդ նեղութիւնները, որ ամե-
նեւին տրտունջի խօսք մը չլսուեցաւ անոնց բերնէն,
այլ բարեկեցիկ մարդոց նման, որ աստուածպաշ-
տութեամբ կ'ապրին, յորպառատ գոհութիւններ կու
տային:

Եւ երբ այսպիսի նեղութիւններու մէջ էին, Յազ-
դէրտ կարծեց, որ այս սաստիկ վիշտերուն պատճա-
ռաւ ձանձրացած պիտի ըլլան իրենց դառն կեանքէն,

մեծ հազարասպետը (Միհրներսեհ) ղրկեց անոնց քով եւ յորդորեց, որ արեւին երկրագեն եւ աղատ արձակուին, եւ տիրանան իրենց հայրենի հարստութեան:

Բուռն եղաւ տրուած պատասխանը. «Մենք, ըսին, չգիտանալով չյամառեցանք, որ այս նեղութիւնները մեղ իմաստացնէին: Մենք կը ցաւինք, որ առաջին նահատակներուն հետ չինկանք: Այս մասին այլ եւս բան չհարցնէք, ինչ որ որոշած էք ընել մեղ համար, ըրէք լմնցուցէք:»

Միհրներսեհ, մտովի շատ գովեց անոնց հաստատամութիւնն ու տոկունութիւնը, եւ սկսաւ շատ մեղմութեամբ վարուիլ անոնց հետ: Եւ վերջապէս հաճեցուց Յաղկերտը որպէս զի զանոնք աղատ արձակէ կապանքներէն: Որովհետեւ Միհրներսեհ, թէ եւ պաշտօնանկ եղաւ, եւ շատ մը բաներու մէջ վնասակար գտնուեցաւ, նոյն իսկ Հայոց Աշխարհին աւերման պատճառ կը նկատէր ինքովնքը, եւ ասոր համար ալ «անարդանօք յուղարկեցաւ ի տուն իւր,» բայց մինչեւ իր կեանքին վերջը դէշ չխօսեցաւ Հայ կապեալներու նկատմամբ:

Աւելի զարմանալի բաներ պատահեցան: Կապեալներուն երիտասարդները իրենց կապանքին մէջ Հայերէն գրել կարդալ սորվեցան, ասիկա հոգեւոր սնունդ եղաւ անոնց, որով քաջալերեցին իրենք զիրենք եւ միսիթարեցին իրենց ընկերները: Եւ այնքան «զմայլեցան ի միտս եւ յոգիս իւրեանց», որ ծերերն իսկ փափկացան, մատղաշ մանուկի պէս եղան: Որովհետեւ թէ եւ գրել կարդալու ատենը անցուցերէին, բայց շատ մը սաղմոսներ բերնուց դիտէին եւ

երդակից կ'ըլլային «մատաղերամ բազմութեան մանկըտոյն»:

Այս արի եւ հոգեւոր կեանքը նոյն իսկ պահապան դահճներուն վրայ կ'ազդէր. անոնք հաճոյքով կը լոէին քրիստոնէից երգերը, եւ հակառակ իրենց տըրուած խիստ հրամաններուն, շատ մը դիւրութիւններ կ'ընծայէին անոնց, սէր եւ խնամք ցոյց կուտային, եւ շատ անգամ անոնց կ'օգնէին նիւթապէս:

Նոյն իսկ այդ աշխարհին իշխանը, Հարեւզոմ Շապուհ, որուն յանձնուած էին պատժաւորներ, մեծապէս զթով եւ սիրով վարուեցաւ անոնց հետ: Այնպէս որ անոնց մեծերը կը յարգէր իրբեւ հայր, իսկ երիտասարդները իրբեւ զաւակ կը զգուէր: Շատ անգամ զրեց Արքունիքին կապեալներուն համար, վերջապէս իր բոլոր միջոցներն ու հնարքները գործածեց եւ հաւաննեցուց Յաղկերտը, որ հրամայեց քակել անոնց կապանքը, հանել անոնց վրայէն պատժաւորի զգեստը եւ հագցնել նախարարական հանդերձը, եւ ոռձիկ կապեց անոնց եւ հրամայեց որ Արքունիքին տրուի անոնց սպառազինութեան պէտքերը, որպէս զի արքունի զօրքերու հետ պատերազմի երթան (ընդգէմ Քուշանաց):

Այս պատերազմին մէջ շատ քաջագործութիւններ ըրին Հայեր, ուր որ գացին, եւ ցոյց տուին որ իրենք կապանքի արժանի զինուորներ չէին: Իրենց զօրավարները գովութեան վկայականներ գրեցին Դուռը այս քաջերուն մասին, որոնք երբ պատերազմէն ետքը Տիգրոն վերազարձան, ներկայացան Յաղկերտին, որ անուշութեամբ եւ խաղաղութեամբ խօսեցաւ անոնց հետ, խոստացաւ անոնց վերահաստատել զիրենք իրենց հայրենի իշխանութեան (նախա-

բարութեան) մէջ եւ վերադարձնել զանոնք իրենց բնաշխարհը «օրինօֆ քրիստոնէութեան, յորոյ վերայ եւ մեծապէս չարչարեալ էին» :

Ուրախ զուարթ, բարձր ճակատով կը շրջէին անոնք «ի կարաւանին, առաջի թագաւորին» երբ որ Յաղկերտ մեռաւ իր թագաւորութեան տասնեւիններորդ տարին։ Եւ իր երկու զաւակները գահը խլելու համար իրարու ձեռքէն՝ պատերազմի ելան, որ տեսեց երկու տարի։

Առիթէն կ'օգտուի Աղուանից թագաւորը եւ կ'ապօսամբի Պարսից դէմ, որ թէեւ քեռորդի էր Յաղկերտի կոուող զաւակներուն, բայց քրիստոնեայ էր հայրէնի հաւատքով, եւ Յաղկերտի հրամանով բռնի ուրացած էր, եւ հիմայ կ'ուզէր ուրացութեան կեղտը մաքրել իր վրայէն։

Յաղկերտի պզտիկ որդույն Դայեակը, Մեհրանեան Ռահամ, տեսնելով երկպառակութիւնը Պարսից բանակին մէջ, կը յարձակի Յաղկերտի երէց զաւկին վրայ, կ'սպաննէ զայն եւ իր սանիկը, Պերոզը, կը թագաւորեցնէ։

Պերոզի իշխանութիւնը խաղաղ եղաւ. բայց ըստանդարտեալ Աղուանից աշխարհը, որուն ապօսամբ թագաւորը իրամատեց ձորայ Պահակը, Մասքութ զօրքերը ներս առաւ, իրեն միաբանեցուց «զմետասան թագաւորս զինութեայս», եւ երկար ատեն դիմագրեց Պարսից դնդին եւ շատ վնասներ հասցուց անոր։ Երկու երեք անգամ հաշութեան դիր դրուեցաւ Պերոզի կողմէն, բայց անսասան մնաց Աղուանից թագաւորը եւ մեղագրեց Դուռը՝ Հայ նախարարներու կրած նեղութեան եւ տարապարտ մահերու համար։

Դուռը ստիպուեցաւ Հոները ոտքի հանել «սաստիկ գանձել» տալով անոնց։ Աղուանք մեծապէս վնասուեցան այս անգամ. պաշարումը սաստկացաւ, զօրքերը դասալիք եղան, որովհետեւ վարակիչ ախտ մը ինկաւ բանակին մէջ եւ գրեթէ երկրին կէսը կործանեցաւ։

Պերոզ նեղելու համար Աղուանից թագաւորը կը պահանջէ իր քոյլը եւ քեռորդին, որովհետեւ քըրիստոնեայ եղեր էին։ Իսկ «սքանչելի այրն», որ իշխանութենէն աւելի իր հաւատքին եւ գաղափարին համար կը կոռէր, կը համակերպի, եւ թագն ալ կ'ուզէ թողուկ։

Պերոզ կը զղջայ, եւ կ'ուզէ որ Աղուանից թագաւորը մնայ իր գահուն վրայ, բայց նա կը հրաժարի, եւ միայն իր մանկութեան ատեն իր հօրմէն իր չնորհած հազար երդ սեփականութիւնը կ'առնէ եւ քաշուելով ապարէզէն՝ կը բնակի հոն միայնակեացներու հետ։

Այս բոլոր երկար խոռվութիւններ պատճառ կ'ըլլան, որ Հայոց նախարարներ մինչեւ Պերոզի հինգերորդ տարին չկարենան արձակուիլ, բայց պատուով կը մնան արքունեաց մէջ. եւ իր հինգերորդ ու վեցերորդ տարիններուն՝ բոլորն ալ ազատ կ'արձակուին։



ՏԻԿՆԱՅՔ ՓԱՓԿԱՍՈՒԻՆՔ ՀԱՅՈՑ ԱՇԽԱՐՀԻՆ

Եղիշէ կը փութայ յայտնել, թէ ինքն չկրնար համբել թիւը բոլոր Հայոց աշխարհի այն կիներուն, որոնց այրերը կապանքի ենթարկուեցան կամ մեռան պատերազմի մէջ։ Զգիտցածուաւելի չատ է, կ'ըսէ, քան թէ զիտցածներս որովհետեւ, կ'ըսէ, իինգ հարիւրի չափ յականէ յանուանէ կը ճանչնամ, ոչ միայն աւազազոյններէն, այլ նաև կրտսերագոյններէն։

Այս կանայք կարծես թէ տարբերութիւն չունէին անոնցմէ, «որ ոչ նաշակեցին զաշխարի»։ Աւագ թէ Կրտսեր՝ հաւատքի միեւնոյն առաքինութիւնը հագուեցան։ Ամենեւին չյիշեցին իրենց մայրենի ազատութեան փափուկ կեանքը. գեղջուկի պէս վըշտամբեր կեանքի համբերեցին։ Թէեւ ունէին իրենց ձեռնասուն սպասաւորները, բայց յայտնի չէր, թէ իրենցմէ ո՞րը Տիկին էր եւ ո՞րը նաժիշտ։ ամէնուն հադուսոը միաձեւ էր, երկուքն ալ գետնախշտի էին։

Չեմ ուզեր այս հոյակապ հասուածը ամփոփել աշխարհաբար. այնքան խիս եւ գեղեցիկ, այնքան նկարագեղ եւ գրական բարձր ճաշակով պատկերացած է հայ տիկիններու սուզն ու տոկունութիւնը, որ կ'արժէ զայն կարդալ բնագրին մէջ։

— «Ոչ գոյր նոցա համեմ խահամոնք անուշարար առանձինն, եւ ոչ հացարարք որոշեալ ի պէտս սպասու ըստ ազատաց կարգի, այլ հասարակաց էր։ Շաբարամուտն ըստ կարգի միայնակեցաց, որ յանապատս բնակեալ են։ Ոչ ոք ումենք զուր ի ձեռս արկանէր, եւ ոչ կրտսերք աւագաց դաստառական մա-

տուցանեին. չամկաւ օշնան ի ձեռս փափկասուն կանանց, եւ ոչ մատուցաւ իւղ ի գուարբութիւն խրախութեան։ Զեղան առաջի սուրբ սկսեղք, եւ ոչ անկան բաժակակալք յուրախութիւն։ չեկաց ուրուք նոցա նուիրակ առ դուրս, եւ ոչ կրչեցան պատուականք յարանց ի տանարս նոցա. չյիշեցան նոցա, թէ գուցէ ոք ամենեւին ի բնակասնունդ դայեկաց եւ կամ քնաւ ի սիրելի հարազատաց։

Փոշոտեցան եւ ծխոտեցան սրահակք եւ սրսկապանք նորեկ հարսանց, եւ սարդի ոստայնք ձգեցան ի սենեակս առագաստաց նոցա. կործանեցան բարձրագահք տանարաց նոցա, եւ խանգարեցան սպասք երախանաց նոցա. անկան կործանեցան ապարանք նոցա, եւ տապալեալ աւերեցան ամուրք ապաստանի նոցա։ Զորացան ազագեցան բուրաստանք ծաղկոցաց նոցա, եւ տաշտախիլ եղեն որք-ք գիներերք այգեաց նոցա։ Աչօֆ իւրեանց տեսին զյափշտակութիւն արարոց իւրեանց, եւ ականջօֆ իւրեանց լուան զվիշտս չարչարանաց սիրելեաց իւրեանց. առան զանձի իւրեանց յարքութիւն, եւ ոչ մեացին ամենեւին զարդք երեսաց իւրեանց։

Տիկնայք փափկասունք Հայոց աշխարհին, որ գրգեալք եւ գգուեալք էին յիւրաքանչիւր պաստեռունս եւ ի գահաւորակս, հանապազ բոկ եւ հեսի երբային ի տունս աղօթից, անձանձրոյք խնդրեալ ովստիւք՝ զի համբերել կարացեն մեծի նեղութեանն։ Որ ի մանկութենէ իւրեանց սնեալ էին ուղղովք գուարակաց եւ ամենովք էրէոց, խոտառուտ կենօք իրբեւ զվայրենիս ընդունեին զկերակուրն մեծա խնդրութեամբ, եւ ոչ յիշէին ամենեւին զսովորական փափկութիւնն։ Սեւացեալ ներկան մորք-ք մարմնոց

նոցա . վասն զի ցերեկ արեւակէզք էին եւ զամենայն գիշերսն գետնաբեկք : Սաղմոսի էին մշտնշենաւորք՝ մրմունջք ի թերանս նոցա, եւ մխիթարութիւնք կատարեալք՝ ընթերցուածք մարգարէիցն : Միաբանեցին երկու երկու իրբեւ ամոլք հաւանք եւ հաւասարք՝ ուղիղ տանելով զակոսն արքայութեանն, զի առանց վրիպելոյ հասցեն ի նաւահանգիստն լսադադութեան :

Մոռացան զկանացի տկարութիւն, եւ եղեն արուք առաքինիք ի հոգեւոր պատերազմի . մարտ եղեալ կոռուցան ընդ մեղսն կարեւորս, հատին կտրեցին եւ ընկեցին զմահարեր արմատս նորա : Միամըտութեամբ յաղթեցին խորամանկութեանն, եւ սուրբ սիրով լուացին զկապուտակ ներկուածս նախանձուն . հատին զարմատս ազահութեան, եւ չորացան մահարեր պտուղք ոստոց նոցա : Խոնարհութեամբ կոփեցին զամբարտաւանութիւն, եւ նովին խոնարհութեամբ հասին երկնաւոր բարձրութեանն : Ալօրիք բացին զփակեալ դրունս երկնից, եւ սուրբ խնդրուածովք իջուցին զիրեշտակս ի փրկութիւն . լուան աւետիս ի հեռաստանէ, եւ փառաւորեցին զԱստուած ի բարձունս :

Այրիք որ ի նոսա էին՝ եղեն վերստին հարսունք առաքինութեան, եւ բարձին յանձանց զնախատինս այրութեանն : Խոկ կանայք կապելոցն կամօք կապեցին զմարմնաւոր ցանկութիւնս, եւ եղեն կցորդ չարչարանաց սուրբ կապելոցն . ի կեանս իւրեանց նմանեցին քաջ նահատակացն մահուամբ, եւ ի հեռաստանէ եղեն վարդապետք մխիթարիչք քանդարգելեացն : Մատումք իւրեանց վաստակեցին եւ կերակրեցան, եւ զկարգեալ ոռնիկ նոցա յարքունուսո՞ ամ յամէ

քոշակ առնեկին եւ տային տանել նոցա ի մխիթարութիւն : Անարիւն նիպուանց նմանեցին, որ երգոյն ժաղցրութեամբ առանց կերակրանաց կեան, եւ կենդանին են միայն զօդն ծծելով, զանմարմնոցն թերեն զնմանութիւն :

Բազում մմերաց հալեցան սառնամանիք, եհաս գարուն եւ եկին նորեկ ծիծեռունք, տեսին եւ լունդացին կենցաղասէր մարդիկ, եւ նոքա ոչ երբեք կարացին տեսանել զանձկալիսն իւրեանց : Ծաղիկք գարնանայինք յիշատակեցին զպսակասէր ամուսինս նոցա, եւ աչք իւրեանց կարօտացան տեսանել զցանկալի զեղ երեսաց նոցա : Սպառեցան բարակք որսականիք, եւ լսցեալ կուրացան արշաւանք որսորդաց :

Բնազրօք(*) յիշատակեցան նոքա, եւ ոչ մի տօնիք տարեկանաց ոչ ածին զնոսա ի հեռաստանէ . ի նաշա-

(*) ԲՆԱԶՐՈՔ ըստածք (յունարէն՝ Σήκυονηκον), որ նոյնպէս գործածուած է նախնեաց մատենագրութեան մէջ) ցանկ մըն է անուններու կամ յիշատակարան մը երկու թերթով, որոնց մէկ կողմին վրայ կ'արձանագրուէր վախճանած, խոչ միւս կողմին վրայ կենդանի հաւատացեալներու անունները : Այս անունները կը յիշատակուէին նկեցեցոյ մէջ, Սուրբ Պատարագի միջոցին :

Եղիշէ երբ կը գրէ վասակի մասին, թէ «Ո՛չ յիշեցաւ անուն նորա ի մէջ սրբոց, եւ ոչ մատեաւ յիշատակ նորա առաջի սուրբ սեղանոյն յեկեղեցւոշն» (տե՛ս վերագոյն, Էջ 88), կ'ակնարկէ այդ Բնազրին :

Մինչեւ հիմայ, Հայաստանեայց նկեցեցոյ մէջ պահուած է քրիստոնէական եկեղեցւոյ այդ վաղնշենի սովորութիւնը այլեւայլ ձեւով . եւ Սուրբ Պատարագի միջոցին թէ՝ ննջեցելոց եւ թէ՝ կենդանեաց յիշատակութիւնները՝ Պատարագի եւ Սարկագաց կողմէն, Բնագրին կիրարկութեան, բարեփոխեալ կերպեն են :

տեղս նոցա հայեցան եւ արտասուեցին, եւ յամենայն յստեամս յիշեցին զանուան նոցա: Բազում արձանիք կանգնեալ էին յանուն նոցա, եւ անուանիք իւրաքանչիւր նշանակեալ ի նոսա:

Եւ իբրեւ այնպէս յամենայն կողմանց ալէկոծ լինէին միտք նոցա, ոչ ինչ կասեալ թուլացան յերկնաւոր առաքինութենին: Արտաքնոցն երեւէին իբրեւ այրիք սգաւորք եւ չարչարեալք, եւ յոգիս իւրեանց զարդարեալք եւ մխիքարեալք երկնաւոր սիրովնի: Ոչ եւս սովորեցին հարցանել զեկեալ ոք ի հեռաստանէ, երէ ե՞ր լինիցի մեզ տեսանել զսիրելիսն մերայլ այն էին իդաք աղօքից նոցա առ Աստուած, երէ որպէս սկսանն՝ քաջութեամբ ի նմին կատարեսցին լի՛ երկնաւոր սիրովն»:

Այս պատկերը հրաշալի է, եւ ցոյց կուտայ, թէ Վարդանանց Պատերազմին ատեն եւ ետքը՝ Հայոց Տիկինները ի՞նչպէս ըմբռնած էին Ազգին դատը եւ ի՞նչ զգացումներով եւ գիտակցութեամբ կրեցին իրենց ինկած բաժինը:

Եղիշէ շատ նկարագեղ է փափկասուն Տիկնանց պատմութեան մէջ. սակայն Ղ. Փարպեցին ալ կուտայ մեզ աւելի ամփոփ, բայց նոյնքան ճշգրիտ գիծերը Հայոց փափկասուն Տիկիններուն:

Եղիշէի ճոխ նկարագրութեան մէջ շատ ուշադրուած են իր տուած ազգագրական տեղեկութիւններն ու սովորութիւնները հայ նախարարական տուններուն էրքին կեանքին նկատմամբ:

ԴԱՍԵՐ

ՎԱՐԴԱՆԱՆՑ ԵՒ ՎԱՀԱՆԵԱՆՑ

ՊԱՏԵՐԱԶՄՆԵՐԻՆ

(ԱԶԳ, 1916, Մարտ 13 եւ շաբ.)

Ա.

ՎԱՐԴԱՆԱՆՑ պատերազմը մեր ազգային-կրօնական կեանքին թէրեւս միակ դրուագն է, որ քիչ թէ շատ ծանօթ է բոլոր Հայերուն: Կրնայ ըսուիլ, որ Հայեր շատ աւելի բան կ'զգան Աւարայրի պատերազմէն, քան այն անցքերէն, որոնք երէկ անցան Հայութեան գլխէն եւ կ'անցնին այսօր, այս պահուն:

Հայոց համար Վարդանանց պատերազմը այնքան դիւցազնական է, որչափ Տրովաղայինը Յունաց համար: Արդէն, տեղ տեղ, Հոմերոս եւ Եղիշէ, կարծես նման պատկերներ կուտան ընթերցողին:

Վարդանանց դատին ու գործին համար եթէ աղդային դնահատումն այնքան անկաշկանդ կերպով բարձր մնաց եւ խանդավառումն՝ անզուսպ, բայց մեր մտաւորական դասակարգին մէջ բարձրագոյն քննադատութեան ենթարկուեցաւ Վարդանանց Պատերազմին պատմութիւնը, եւ գէթ իմ ծանօթութեան սահմանին մէջ, Մ. Գարագաշեանէն սկսեալ երբ Վասակի մասին նպաստաւոր կարծիքներ յայտնուեցան, զուտ քննադատական այս շարժումը ասպարէզ տուաւթեթեւսովիկ միտքերու, որպէս զի դատապարտեն Վարդանի քաջագործութիւնը, իբրեւ «կղերամիտ»

մարդու մը գործերը, եւ Վասակը գովարանեն, իբրեւ միակ անձնաւորութիւնը այդ շրջանին, որ իբրեւ թէ զուտ ազգայնական ոգիով աշխատած ըլլայ: Գարագաշ, երբ Վասակի մասին կը խօսի, այնքան յառաջ չերթար, որ Վարդանի արժանիքին ստուեր ածուի:

Օտարաձայնութեան եւ նորաբանութեան ախտը վտանդաւոր է, մանաւանդ այն ատեն, երբ վարկպարագի' են ատոնք եւ արդիւնք խակամիտներու գրական շոշոկանքին: Վարդանանց Պատերազմին նշանակութիւնը պէտք է պահել իր իրական եւ աւանդական վիճակին մէջ. որովհետեւ Հայ ժողովուրդի ազգայնութեան առաջին հրաշակերտ ասլացոյցն է այդ, եւ Հայութիւնը, նոյն իսկ իւր զգացողական խանդավառութեամբ տեսած է Աւարայրի քաջադործութեան մէջ իւր ապրելու իրաւոնքին, իր ազգային գոյութեան պաշտպանութեան դինը: Այս իսկ պատճառաւ կ'ուզեմ քանի մը պատմական իրողութիւններու վրայ ուշադրութիւն հրաւիրել, որոնք պիտի դիւրացնէին Վարդանանց Պատերազմին շիտակ ըմբռնումը:

Սուաջին իրողութիւնը սա է, որ Յազկերտ Բ. ինքն չստեղծեց Վարդանանց պատերազմին պատճառները: Յազկերտ Բ. հակառակ մեր ազգային պատմիչներու տուած նկարագրին, Սասանեան հարստութեան խելացի Շահերէն մէկն էր, որ Միհր Ներսէհի պէս յոյժ իմաստուն Վզրուկի մը հետ արժանապէս վարեց իւր իշխանութիւնը: Թէ՛ Յազկերտ Բ. իւր թէ՛ Միհրներսէհի իմաստութիւնն ու բարեցակամութիւնը դէպի Հայեր, կը յայտնուի եւ կը չեշտուի Վարդանանց պատերազմէն ետքն իսկ,

երբ փուրսիւը (հարցուփորձը կամ դատավարութիւնը) կ'աւարտի, նահատակեալ Վարդանի եւ իրեններուն արժանիքը կը գնահատուի պաշտօնապէս եւ Վասակ կը դատապարտուի չնորհազրկութեան եւ բանտի:

Պէտք է գիտնալ, որ Քրիստոնէութիւնը սքանչելապէս զարդացած էր բազմակրօն Պարսկաստանի ընդարձակածաւալ պետութեան մէջ, եւ այս զարդացումը երկիւղ կ'ազգէր պետական կրօննին—մազգէականութեան—, այնպէս որ Սասանեան Շահներ որոշեցին կասեցնել Քրիստոնէութեան աճումը Պարսկաստանի մէջ, որպէսզի պետական կրօնքը միայն ծաւալի եւ տիրէ եւ միւս բոլոր կրօններ, որոնց նորագոյնը եւ հօրագոյնը, Քրիստոնէութիւն, վերջանան եւ այլակրօն ազգութիւններ եւ ցեղեր միանան կրօնքով ալ միապետական մականի մը ներքեւ: Ասիկա պատմական այն սխալներէն էր, զոր Սուլթան Համիտ Բ. եւ արդի ծէօն-Թիւրք կառավարութիւնը ուզեցին գործադրել Թուրքիոյ մէջ, և աւելի հեռաւոր ինքնախարէութեամբ, բովանդակ իսլամական աշխարհի մէջ: Իբրեւ թէ՛ երբ այլազան ազգեր եւ լեզուներ՝ կրօնական միակ եւ պաշտօնական կապով միանան, այդպիսի միաձեւութիւն մը, պիտի կրնար դիւրացնել ազգային կամ արիւնային համաձայնութեամբ, որ պիտի ըլլար՝ Թուրքերու խելքով համախամութիւն եւ Սասանեանց խելքով՝ համամազգէականութիւն: Բան մը որ չյաջողեցաւ եւ պիտի չյաջողի:

Արդ՝ Պարսկաստանի մէջ, Որմզդեանն Շապուհ Ա., Երկայնակեաց, որ 40 տարի իշխեց (232—272), ամէնէն յայտնի հալածիչը եղաւ Պարսիկ Քրիստո-

նէութեան, որու բազմաթիւ եկեղեցիները կը պայծառանային, նախանձելի բարեկարգութեամբ եւ ճոխութեամբ: Անգութ եղաւ Շապուհի հալածանքը, Քրիստոնէութիւնը տկարացաւ, բայց չընկճեցաւ:

Սասանեան այդ քաղաքականութեան շարունակութիւնն էր, որ հաշտ աչքով չէր դիտեր Հայոց, Վրաց, Աղուանից, եւ Կովկասեան ուրիշ ժողովուրդներու քրիստոնէական աճումն ու բարգաւաճումը այն մարդերու մէջ Պարսկաստանին, ուր քրիստոնէութիւնը պաշտօնական խստութեամբ հալածուած էր անգթօրէն:

Կովկաս սահմանակից ըլլալով քրիստոնեայ Բիւզանդիոնի կայսերական երկիրներուն, Հոռոմներու ազգեցութիւնը, չնորհիւ կրօնակցութեան, հետրապեսէ զգալի կը դառնար հոն: Սասանեան տիրապետներու քաղաքականութեան տեսակէտէն ամենեւին հաճելի չէր այդ ազգեցութեան աճեցումը, եւ Յազկերտ Բ. ի առաջին գործը եղաւ ծառանալ Բիւզանդիոնի ազգեցութեան դէմ: Հպարտ Հոռոմները զիջան դիւրութեամբ, յոգնած ըլլալով Ատափասի յարձակումներէն: Յազկերտ Բ.՝ ետքը դարձուց իւր ոյժերը Հոնաց եւ Քուչանաց դէմ, եւ եօթը տարի վատնեց այս վերջինները զսպելու համար: այս յաջողութիւններու շարքին՝ Յազկերտ ուղեց պետական լուծին տակ նուաճել Հայերը, Վիրքը եւ Աղուանքը: Եւ ասոնց ամէնէն դժուարինը Հայերն էին: Միհր Ներսէհ համոզուած էր, երբ կ'ըսէր Յազկերտին, թէ «յորժամ Հայք սերտիւ մեր լինին, Վիրք եւ Աղուանք այնուհետեւ մեր իսկ են»: Այս նպատակին յաջողութեան վստահ էին, քանի որ Վասակեանք, չնորհիւ Վասակի հնարագիտու-

թեան, խոստացեր էին իրենց հաւատարիմ գործակցութիւնը:

Ահա՝ այս է պատմական իրողութիւնը, որու մէջ պայմեցաւ Վարդանանց պատերազմը: Թշնամին ներսէն էր, քան դուրսէն: Եթէ Վասակ, իւր հզօր ազգեցութիւնը եւ սատանայի խելքը գործածէր հայ-ազգային կեանքը պահելու այն ձեւի տակ, որով հայկական միահեծան թագաւորութեան բարձումէն, այսինքն՝ ՅԱԷՆ ի վեր կը կառավարուէր, հաւանաբար տեղի պիտի չունենար Վարդանանց պատերազմը: Վասնզի, ինչպէս, որ դիտել կուտայ Միքայէլ Փորթուգալ, Եղիշէի ձեռնհաս ուսումնասիրզներէն մէկը, Պարսից իշխանութեան ներքեւ գտնուող հայերը, թէեւ անկախ չէին, բայց երկար ատեն պահեցին Արշակունի թագաւորները. «Պարսիկը ոչ միայն կրօնից կատարեալ ազատութիւն տը-ուած էին, այլ մասնաւոր վոյլթ ունէին Հայոց ազգութիւնը ամբողջ եւ յունականութենէ անխառն պահելու, քաջալերելով եւ պահանջելով Հայերէն լեզուին գործածութիւնը: Արդարեւ՝ Սասանեանց վարչութեան կերպը աւելի կերպնացեալ էր քան զՊարթեւացն, որք տէրութեան իւրաքանչիւր նահանդը յորդուց յորդիս յաջորդող մէկ մէկ թագակապ-կապ-կուտակալի յանձներ էին: Այդպիսի ինքնուրոյնութիւնք ուրիշ ամէն կողմերէ վերցուեր էին. բայց Հայք, Վիրք, Աղուանք եւ Լինիք տարբեր բարուց եւ քաղաքականութեան տէր՝ եւ զօրաւոր եւ թշնամի ազգի մը (ՅՈՒՆԱՑ— ՀՈՌՈՄՈՑ) մերձակից գտնուելուն համար, գեռ կը վայելէին իւրենց բնիկ իշխանները. եւ Արտաշէս Գ.՝ Արշակունեաց վերջինը չէր ըլլար, եթէ անխաղաղասէր եւ

անիմաստ նախարարաց թախանձանքը չհրաւիրէր զմարզպանութիւնը։ Զմոռնանք սակայն՝ թէ ինչ պակասութիւն որ ըրած ըլլան մեր նախնիք յառնչութիւնսն զոր ունէին դրացի ազգաց հետ, ասոնք բաւական չէին արդարացընելու Յազկերտի յարուցած հալածանքը. որովհետեւ Արտաշէս Երրորդի թագաւորելէն ի վեր, այս է դրեա թէ երեսուն տարի, առանց ապստամբութեան եւ խլրտման հըպատակեր էին Պարսից (*): Զմոռնանք որ Սասանեան կառավարութեան հիմունքը հաստատեալ էին կրակապաշտ մլոեռանդութեան վրայ, որ հետզետէ կը սաստկանայր քանի որ Քրիստոնէութիւնը կը ծաւալէր տէրութեան ամէն կողմը։ Դրովենք այն կուրութիւնը, որ զկրօնական զգացմունս բըռնաբարելով՝ աւելի կը գորացնէ զայն։ (Միք. Փոքր. էջ 34-35)։

Քանի որ Արեւելեան Հայաստանը, Պարսից իշխանութեան տակ, այնքան ուշադրաւ առաւելութիւններ կը վայելէր, քան Արեւմտեան Հայաստանը Յունաց իշխանութեան տակ, եւ քանի որ Հայք Արեւելեան Հայաստանի վայելած այս առանձնաշնորհումները կը վայելէին՝ Յունաց սահմանակից գտնըւելուն համար, որպէս զի Պարսիկ կառավարութիւնը նոր գժուարութիւններ չունենար Արեւելեան Հայոց համակրութենէն ու հաւատակցութենէն, զոր ունէին Յունաց հետ, ուրեմն կը հետեւ որ իրաց վիճա-

(*) Այս հաւատումը կարօ'ւ է ստուգութեան։ — Որովհետեւ Քաջն Վարդանի ատեն Մամիկոնեանց քաջուիլը Մոկաց լեռներուն մէջ, ապացոյց է Հայոց ապստամբութեան եւ Խլրտման։

կը (statu quo) կարելի էր երկար ատեն պահել, հակառակ Հայոց եւ դրկից ազգերու քրիստոնէացման, եթէ երբեք Վասակեանք չքաջալերէին շապուհեան ծրագրին գործադրութիւնը Հայաստանի եւ հետեւաբար Վրաստանի եւ Աղուանիստանի, եւայլն, Երկիրներու մէջ, այնպէս կարծել տալով Տիգրոնի կառավարութեան, թէ Հայաստանը դիւրաւ կրնայ նըւաճութիւն, քանի որ իրեն՝ Վասակի՝ նման հանճարեղ նախարար մը, որ ո՛չ միայն Սիւնեաց Տէրն էր, այլ նաև Մարզպան եղած էր Վրաց աշխարհին, եւ այդ միջոցին Մարզպանն ըլլալով Արեւելեան Հայաստանի, ազգեցիկ դիրք մը ունէր Պարսիկ բարձր պաշտօնատարներու շարքին, առանց այլեւայլի կը վստահեցնէր Մէկը Ներսէնը, թէ կրօնական ձուլման գործը շատ դիւրին էր . . . :

Ահա՛թէ ինչո՞ւ համար կանխեցի դիտել տալ վերեւ այս առաջին իրողութիւնը, թէ ուղղակի Յազկերտ Բ. ինքն չստեղծեց Վարդանանց պատերազմին պատճառները։

Բ.

Երկրորդ իրողութիւնը սա՛ է. Վասակեանք բըռնելով Պարսից կողմը, կ'արհամարհէին ազգային կամքը, ժողովրդական տիրող ոյժը, որ կազմակերպուած էր Հայաստանեաց Եկեղեցիով։

Արշակունեաց թագաւորութեան բարձումէն ետքը Երկրին պաշտօնական վարիչներն էին նախարարներ. բայց իրականութեան մէջ տիրող ոյժը հայ Եկեղեցականութեան ձեռքն էր, որ կ'անձնաւորէր Հայ ժողովութիւնը, իրեւ կրթիչն անոր միաքին եւ ուսուցիչը քրիստոնէական լոյս հաւատքին։ Եկեղեցականութիւնը միացած ու նոյնացած էր ժո-

դովուրդին հետ նաեւ ընդդէմ նախարարական հարստահարութեանց, Հայոց եկեղեցւոյն բարերար, ժողովրդապետական դերը այս շրջանին շատ լաւ արտայայտուած է: Այս գերը կղերապետական կամ եկեղեցապետական բնոյթ չունէր. որովհետեւ կը զերը կամ եկեղեցին իրեն սեփական շահ մը չունէր. անոր սեփական շահը ժողովուրդին շահն էր:

Այս մասին ուշադրաւ է դարձեալ Մ. Փորթուգալի տեսութիւնը.— «Ուեւէ կրօնի պաշտօնեայք ամէն տեղ ժողովրդեան վրայ մեծ ազգեցութիւն ունեցող կարգ մի կը կազմեն: Ուր քաղաքական իշխանութիւնը միահեծան է, թագաւորէն զատ ուրիշները քիչ շատ իրարու հաւասար են. ամենեցուն ոյժը կ'ամփոփի մէկ հոգւոյ ձեռքը եւ քահանայութիւնը անոր օժանդակ եւ հպատակ կ'ըլլայ: Բայց ուր երկրին ձեւակերպութենէն կամ ուրիշ հանգամանաց պատճառաւ աւանդական կամ տանուտէրական դրութիւնը կը տիրէ, անդ ժողովուրդը երկու կարգի կը բաժանի. մին թուով սակաւագոյն, բայց բոնութեամբ տիրապետող, կեղեքիշ եւ այլոց քըլտանց պտուղը վայելող, եւ միւսը շատ աւելի բազմաթիւ, բայց աղքատ, տղէտ եւ ստրուկ: Մինչ Հայոց աղատանին զոտողացեալ զինուրութեամբ՝ որսի արշաւանօք կը զուարձանայր եւ կալուածոց եկամտօք կը ճոխանայր, շինականք կրկին արքունեաց՝ թագաւորին եւ նախարարին՝ գանձը լեցնելու համար կրկնակի հարկաց եւ տրոց ներքեւ կը ճնշուէին. եւ եթէ յանցանք մը գործէին, բայցի բրամական տուգանաց՝ եւ զան ըմպէին յոլով: Քրիստոնէութիւնն ի Հայաստան, ինչպէս եւ Միջին դարուց մէջ յԵւրոպա, անբանական ուժոյ յափշտակու-

թեանց եւ հարստահարութեանց տեղ հաւասարութեան սկզբունքը քարոզելով ու զրկեալ ու խեղձ ժողովրդեան միտքը արթնցնելով ու բարձրացնելով, կը բարձրացնէր նաեւ անոնց նիւթական վիճակը ու ի հիմանց կը քանզէր նախարարաց գօրութիւնը: Միւս կողմանէ՝ այդ նոր վարդապետութիւնը ներկայացնող եկեղեցականք՝ որք ինքինքնին աղատաց կարգը դասեր էին եւ նոցա ամենայն առանձնաշնորհաւթիւնքն ունէին, ժողովրդեան անհամեմատ մեծագոյն բայց զրկեալ մասին պաշտպան եւ աղատարար կանգնելով նախարարաց դէմ, բընականաբար եւ նորա իրական տէրն եւ հրամանատարը կ'ըլլային: Արդար է եւս ասել՝ որ կրօնական մեծարեալ կերպարանքներէն զատ, ուսմամբ, գիտութեամբ, աշխարհաշէն եւ ազգօգուտ ձեռնարկութեամբ, նա մանաւանդ եւ հայրենի աղատութեան սիրովն, մնացեալ ժողովուրդէն եւ նոյն ինքն տանուտեարց խմբէն գեր ի վերոյ գոտանէին: Յայս սակա մէր հայրապետքն քաղաքական իրաց մէջ աւելի կարեւոր մասնակցութիւն ունեցան քան իրենց հաւասար կամ աւելի նշանաւոր եպիսկոպոսունք Հըռովմէական միապետութեան մէջ: Արքայական աթոռոյն առընթեր՝ կանգներ էին կաթողիկոսական աթոռը, որոյ տէրը թագաւորին պէս Արշակունի Պարթեւ իշխանաց ցեղէն կ'իջանէր, եւ անոր նման որդւոց յորդիս կը յաջորդէր: Բարոյական մեծ ազգեցութեամբն զոր ունէին՝ շատ անզամ յաջորդութեամբ կուուր էին քաղաքական իշխանութեան հետ, եւ անոր տկարացած ատենը՝ նմա նեցուկ եւ պաշտպան եղան: Արքունի գահուն խորտակուելէն ետքը ոչ միայն իրենց իշխանութիւնը պահեցին Հայա-

տանի մէջ, այլ եւ կը հրամայէին տակաւին Վրաց
եւ Աղուանից ալ: Նոցա պահանջմամբ կամ խոր-
հըրդով կը կարգուէին շատ անդամ սպարապետք,
տանուտեարք եւ երբեմն ալ թագաւորք: Նոցա թա-
խանձանքը եւ խնդիրքը աւելի ազդու էին դրացի եւ
զօրաւոր արքունեաց առջեւ քան բնիկ թագակապ
իշխանաց: Խնամութեամբ կամ ազգակցութեամբ եւ
կամ հլու հազարնդութեամբ նոցա հաճելի եղող նա-
խարարք նախապատիւ կ'ըլլային քան պատ եւ ան-
տարբեր շարժողները: Այսպէս Մեծն Սահակ որ մաս-
նաւոր փոյթ եւ խնամք կը տանէր իրեն խնամի Մա-
միկոնեան ցեղին որեարը կրթելու եւ լուսաւորելու,
ի թախանձելոյ դստերն՝ Հայոց Սպարապետ անուա-
նել կուտայ զիւր փեսայն զամազասպ Մամիկոն-
եան, հակառակ կամաց աւելի խոհեմ եւ հեռատես
վուամշապուհ արքայի, եւ թշնամի կ'ընէ Բագրա-
տունեաց տանուտէրը զծիրոց, որոյ հայրը կամ նա-
խորդը քաջ ասպետն Սահակ այնքան չքեղ յաղթա-
նակօք եւ ծառայութեամբք պայծառացուցեր էր
զսպարապետութիւնը: Բնական էր որ երեսէ ինկած
նախարարք մասնաւոր ատելութիւն մը զգային ե-
կեղեցականաց դէմ, ինչպէս որ ունեցեր էին այն
թագաւորաց դէմ ալ՝ որք նոցա կոթներ կամ հա-
մամիտ գտնուէր էին: Կարելի է պնդել, թէ ոմանք
ի հայրապետացն մերոց մոռացան, թէ շատ ան-
դամ ինչ որ սովորական անհատի նկատմամբ առա-
քինութիւն կամ բնական պարտք մի կրնայ համար-
ուիլ, իշխանաց համար պակասութիւն կամ յան-
ցանք կ'ըլլայ, թէ իշխեցողք՝ աշխարհիկ ըլլան թէ
քահանայ՝ մահու չափ խորշելու են կուսակցութիւն
յարուցանող առիթներէ, եւ թէ պարտին հասարա-

կաց օդուէն զատ՝ մերձաւոր կամ ազդակից չունե-
նալ» (Անդ. էջ 44-46):

«Նախարարական գրութիւնը սակայն, որ զշայս
աւելի պինդ կազմութիւն ունեցող ազգաց բաղդատ-
մամբ տկար պահեց, նոցա անհատական կորովոյն
աւելի զիմանալու պատճառ եղաւ: Փոխանակ խոտ-
նամբուի քաղաքաց մէջ զիգուելու եւ ապականու-
թեան ենթարկուելու, ժողովրդեան աշխոյժ եւ գոր-
ծունեայ մասը ընդհանրապէս ազարակներու մէջ եւ
նահապետաց դղեկաց եւ աւանից բոլորտիքը սփուած
կը բնակէր. եւ թէպէտ Երասխայ դաշտին մէջ թա-
գաւորաց կառուցած դաստակերտն տակաւին կան-
գուն եւ մարդաշատ էին, Հայաստանի մէջ՝ մանա-
ւանդ թագաւորութեան վերնալին իվեր՝ զիւղերը
համեմատարար աւելի կարեւորութիւն ստացեր,
բազմացեր եւ չենցեր էին: Անդ ազատանին որսոր-
դութեամբ եւ մնացած ժողովուրդը հողագործու-
թեամբ պարապելով՝ մարմինին առողջ եւ սրտեր-
նին առոյդ կը մնար, մինչ նախանձը կամ փառասի-
րութիւնը վառ կը պահէր տանուտեարց պատերազ-
մական ոգին: Թո՛ղ այն երբորդ կամ չորրորդ հա-
րաբութիւնները զոր ունեցան Հայք յետազայ ժա-
մանակաց մէջ, ի՞նչ հետաք մնացեր էր ի հինգերորդ
դարու՝ Ասորեստանեայց, Բաբելացւոց, Մարաց,
Պարթեւաց եւ Խորայելացւոց իշխանութիւններէն,
որք Հայկազանց հետ կամ աւելի ետքը ծներ եւ մեծ-
ցեր էին: Նոյն ինքն Հռովմէական մեծազօր ազդէն
անուն մը կամ ստուեր մը միայն կայր. իտալական
բանակները կազմողներն եւ առաջնորդները վարձ-
կան խուժդուժ զինուորք եւ զօրադրուխք էին. իսկ
արեւելեան կայսրութիւնը ջլատութեան, ապիկա-

բութեան եւ աղքատութեան օրինակ միայն կրնար ըլլալ : Մինչդեռ Մարզպանութեան ներքեւ գտնուող Հայք, որք Յունաց բաժին ընկնող գաւառաց եւ առանձին կառավարուող Կորդուաց, Աղձնեաց, և Արդնարզիւնի բաղդատմամբ Հայաստանի մէկ կէսն անգամ չէին, իննաուն հազար զօրք կարող կը լինէին հանելու ու երեք բանակը կազմելու . Յազկերտի՝ Յունաց եւ Քուշանաց դէմ ըրած պատերազմներէն պարպուած արքունի գանձը կը լեցնէին կրկնապատկեալ տրոց եւ հարկաց կանոնաւոր վըճարմամբ, ի մեծ ապշութիւն Պարսից, որ նոցա կեղեքմանէն աւելի Հայոց իրական հարստութեան ապացոյց էր, եւ Խորազմի անապատին մէջ հայկական այրուձին մեծամեծ ծառայութիւններ կը մատուցանէր ապերախտանն Սասանեանց :

Իսկ եթէ ուկենանք գիտնալ թէ ի՞նչ ազդեցութիւն ունեցաւ քրիստոնէութիւնը Հայոց բարուց վըրայ, բաւական է բաղդատել Բուզանդայ՝ Արշակայ եւ Պապայ դարուն ըրած նկարագիրը Եղիշեայ աքսորեալ նախարարաց Տիկնանց նկարագրին հետ : Վըռամշապհոյ քսանամեայ իմաստուն կառավարութեամբ, ուսեալ եւ եռանդուն հայրապետաց ջանիւքը՝ աւետարանական սկզբունքը Հայոց մտաց եւ սըրտին մէջ տողորուեր էին . հայկական ընտանիքը սըրտուեր էր ի հեթանոսական խառնակութեանց . եւ առտընին կենաց մաքրութեամբը անհատից կորովը եւ կտրճութիւնն ալ աւելցեր էր : Ամէն կողմ գլուզներ, ուսումնարաններ բացուեր էին եւ բեմբասացութիւնք հրապարակային դասախոսութեանց տեղը բռնէր էին . նախարարք ալ ատեն ատեն վէճերնին մոռնալով, ուսմանց եւ ընթերցման կը պարապէին

ու կը յորդորէին զդպրութիւնս . երկրին ընտրելագոյն երիտասարդները ծաղկաքաղ մեղուաց նման, այն ժամանակի քաղաքականութեան գլխաւոր կեղծրոններուն մէջ, հելլէն եւ ասորի գլուզութիւնքը եւ գաղափարները հաւաքելով՝ զարձեր էին ի հայրենիս . եւ թէպէտ դոցա Հայաստան բերած գիտութեանց ծիւերն հնացեալ կամ հիւանդ արմատէ առնուած էին, բայց արգաւանդ հողոյ եւ կազգուրիչ բնութեան մը ազգեցութեամբ՝ զօրաւոր կերպով աճեր եւ գեղեցիկ պտուղներ արտադրելու սկսեր էին : Եթէ Սասանեանք կամ մէր կոուասէր նախարարք միջոց տուած ըլլային, հուժկու քաղաքակըրթիւն մը պիտի գոյանար, յատուկ հայկական կերպարանօք, որոյ նախնծայքը եւ բեկորքը եւեթ մէր այնքան հիացումը եւ օտարաց զարմացումը կը շարժեն այժմ (Անդ. էջ 58—60) :

Հայաստանի այս վիճակը, հինգերորդ գարուն մէջ, անշեղ եւ ճակատագրական հետեւանքն էր Քըրիստոնէութեան, որ իր կարգին ծնունդ տուաւ հայերէն զիրերու զիւտին եւ Ոսկեղարուն, ուր տեղի ունեցաւ Վարդանանց պատերազմը : Այս հսկայ աշխատութեան հեղինակներն ու անխոնջ վաստակաւորներն էին հայ Եկեղեցականներ, որոնք Աւետարանով եւ հայերէն գրականութեամբ լուսաւորեցին տղէտ Հայութիւնը, սորվեցուցին անոր քաղաքացիական ոչստրուկ կեանքը եւ ստեղծեցին հայ Ժողվը ըրդապետութիւնը, այնպէս որ բոլոր հայութիւնը իւր Եկեղեցին կը ճանչնար իրեւ իւր գոյութեան պայմաններուն մարմնացումը :

Այս բացատրութիւններէն ետքը այլեւս շատ

դիւրին է հասկնալ, թէ Վարդանաց պատերազմը բղխած է ոչ թէ կրօնական մոլեռանդութենէ, ոչ թէ կղերական շահերէ, այլ ուղղակի Հայ Ազգին շահերէն, Հայ Ազգին կամքէն: Դարձեալ՝ շատ դիւրին է ըմբռնել, թէ այս կամքին հակառակ ուեւ շարժում վնասակար պիտի ըլլար ազգային դատին, ո՛վ որ ալ եղած ըլլար հակառակ շարժման հեղինակը կամ պաշտպանը: Եւ Վասակի դատապարտութեան պատճառները յառաջ եկան նոյն խոկ այդ հակառակ շարժումէն:

Գ.

Երրորդ իրողութիւնը սա' է. Վասակին ծրագիրը, հայկական գահը վերականգնելու մասին, սխալ էր—վասնզի կարելի չէր:

Եթէ հայ նախարարները կ'ուզէին, որ Հայոց թագաւորական գահը մնար, պէտք չէր որ արշակունի վերջին Սրտաշէսին գահազրկութիւնը պահանջէին, պատճառելով անոր հոյլ մը անարժանութիւնները. վասնզի առհասարակ, նոյն ինքն հայ նախարարներ աւելի արժանաւոր չէին: Սրբունիքին կեանքը ամէն երկրի եւ ամէն իշխանութեան մէջ կ'ընդօրինակուի նախարարական պալատներու մէջ ալ: Մեծն Սահակի պէս կաթողիկոս մը ուզեց որ իր ախտաւոր ոչխարը պահուի, որովհետեւ զայն կը գերազասէր օտար գաղանին: Բայց նախարարներու փառասիրութիւնները եւ իրարու հանդէալ սնուցած ատելութիւնները չէին հանդուրժեր բնիկ թագաւորի մը տկարութիւններուն. ուզեցին ազատ ըլլալ ազգային կապերէ, որպէսզի կարող ըլլան գոհացնել իրենց առանձնական փառասիրութիւնները, եւ հաճելի ըլլալով Պարսիկ Արքունիքին, խլել թագա-

կապ-մարզպանութեան կամ կուսակալութեան դիրքը: Սակայն Արտաշէս Գ.ին գահընկեցութենէն ետքը Տիգրոնի կառավարութիւնը աւելի իմաստուն եւ աւելի խղճամիտ գտնուեցաւ Հայոց հանդէալ քան զիրար բգքառող հայ նախարարները, տարով արեւելեան Հայաստանի կառավարութեան համար հայ կամ պարսիկ մարզպաններ, ամէնքն ալ արժանիքի տէր անձնաւորութիւններ, որոնց մէջ նոյն ինքն Վասակ Սիւնի:

Իրաց այս վիճակին մէջ Վասակի առանձին եւ զաղանամիտ ձեռնարկութիւնը՝ հայ թագաւորութիւնը վերականգնելու համար՝ անխմատ յանդընութիւն մըն էր, չըսելու համար անխելք. որովհետեւ Վասակ շատ խելացի անձնաւորութիւն մըն էր, եւ կարծեց որ իր խելքը բաւական պիտի ըլլայ խարելու Ազգը եւ խաղցնելու Միհըլներսէհի պէս փորձ եւ իրմէ աւելի խելացի եւ խորամանդ քաղաքագէտ մը, որ երկար տարիներէ ի վեր զեկավարն էր Պարսիկ Պետութեան եւ շատ լաւ գիտէր Հայաստանի վիճակը եւ հայ նախարարներու իրագանչիւրին արժանիքը:

Վասակ շացած իր կարողութենէն եւ իրը բարձր պաշտօնատար իր վայելած համարումէն Տիգրոնի Արքունիքին առջեւ, եւ անշուշտ քաջալերուած իրեն համախոհ նախարարութիւններէ, ուզեց վերականգնել Հայուն կործանեալ գահը. բայց իրականին մէջ այդ գահը կ'ուզէր իրեն համար կանդնել, եւ ասոր ամենեւին նպաստաւոր չէին արտաքին ու ներքին պայմաններն: Այնպէս որ Մ. Փորթուգալ շատ իրաւամբ դիտել կուտայ Վասակի նկատմամբ, թէ «պէտք չէ փութալ գովելու զՀայաստան ինքնագլուխ ընելու

կապիաքը. այսպիսի մեծ գործ մը կամ անձնական մեծամեծ շահատակութեամբք եւ կամ այլոց քաջութեանը եւ աշխատութեանցը օգտակար եւ պատշաճ գործածութեամբը կրնար յաջողիլ։ Վասակ որ ի մարտի փղերուն կռնակը պահութառող անձ մի էր, եւ զուրկ ըլլալով ի պատերազմական հանճարոյ, բաւական անձնութացութիւն ալ չունէր այլոց յաղթանակներէն չդչարելու համար, չէր յարմար այդ նպատակը ի դլուխ հանելու (Անդ. էջ 42)։

Կ'արժէ շեշտել անզամ մըն ալ, թէ ազգային դատին մէջ, զուտ նախարարական կամ կուսակցական շահի համար եւ այդ շահը պարտկելով ազգային շահի մը կեղեւով, ազգային կամքի ու դիտակցութեան հակառակ ծրագիրներ գարձնել, պարզապէս դաւաճանութիւն է։ Վասակ այսպիսի ծրագիր մը կը հետապնդէր ամէն զնով. ամէն տեսակ դիմակ գործածեց, թէ իր Ազգին եւ թէ Տիգրոնի Արքունիքին առջեւ, որպէս զի յաջողի. բայց իր բոլոր անուրանալի կարողութիւնները չծառայեցին իր գաղտնի նպատակին գործադրութեան, որովհետեւ նոյն ինքն խորագէտն Միհրներսէհ երեսանց կը մեծարէր Վասակը, բայց ներքնապէս «յոյժ գսրովէր զնա»։ Վասն զի նոյն ինքն Վասակի դէպի Դենիմազգեղ ցոյց տուած իրական հակումը, որ շատ հրապուրիչ պէտք էր ըլլալ Միհրներսէհի աչքին, ամենեւին օգտակար չեղաւ, քանի որ բուն Հայ ժողովուրդը որոշած, վճռած էր քրիստոնեայ մնալ եւ այս մասին շատ ամուր եւ շատ կտրուկ էր իր յայտարարութիւնը — «Յայս հաւատոց զմեզ ո'չ ոք կարէ խախտել, ո'չ հրեշտակք եւ ո'չ մարդիկ, ո'չ սուր, ո'չ հուր, ո'չ ջուր, ո'չ ամենայն զինչ եւ են դառն հարուածք։ Ա-

մենայն ինչ եւ ստացուածք մեր ի ձեռս ғո, եւ մարմինք մեր առաջի ғո կան, ըստ կամաց քոց արա զի՞նչ եւ կամիս։ Եթէ սովին հաւատովք քողուս, ոչ յերկրի ա'յլ տէր փոխանակեմք ընդ ֆեզ, եւ ոչ յերկինս ա'յլ Աստուած փոխանակեմք ընդ Յիսուսի Քրիստոսի, որ չիք ա'յլ Աստուած բաց ի նմանէ» (Եղիշէ)։

Ուստապահները մինչեւ վերջը հաւատարիմ մընացին իրենց այս որոշման վրայ. միայն Վասակն էր որ հազար միջոցներու զիմեց եւ չյաջողեցաւ, եւ Վասակի այս գործին մէջ բոնած ընթացքը խելացի չէր։ «Զի յայլ ժամս իմաստուն էիր, եւ ես զիտէի. զայս՝ գործ իմաստութեան ոչ գործեցեր» (Եղիշէ)։

Դ.

Չորրորդ իրողութիւնը սա՛ է. Վարդանանց Պատերազմը, իրրեւ հայկական շարժում ազգային կարեւորութիւն ունի Հայոց համար եւ այս պատճառաւ ալ մեծ եւ տարածեալ հանդամանք մը առած է մեր ազգային կեանքին եւ պատմութեան մէջ. մինչ Պարսից պատմութեան տեսակէտէն պատմական կարեւոր դէպք մը չէ նկատուած։ Արդի դիւանագիտական բացատրութեամբ պիտի ըսուէր ներքին ապստամբութիւն մին, որ կարգադրուած է։ Այս է պատճառը, որ արտաքին պատմութեան մէջ չէ յիշուած Վարդանանց Պատերազմը։

Իսկ Հայութեան տեսակէտէն վարդանանց Պատերազմին ազգային ստոյդ եւ ծանրակշիռ հանգամանքը լաւ հասկնալու համար, պէտք է շարունակել Քաջն Վարդանի սկսած շարժման պատմութիւնը, եւ Վարդանանց գործունէութենէն ետքը՝ սերտել նաև Վահանեանց գործունէութիւնը։

Վասակին քաղաքականութիւնը վնասակար և-
ղաւ. այսինքն՝ այսինչ կամ այնինչ նախարարին կամ
բարձր ու դիրքի տէր անձերուն ուրացումն ազգային
կրօնը եւ յարումը պարսիկ դենին, այլ եւ այլ շահե-
րուն նկատումներով, սոսկալի վիճակ մը ստեղծեցին
Հայոց ներքին կեանքին մէջ:

Պարսիկ գերիշխանութեան ներքեւ գտնուող հը-
պատակ բոլոր քրիստոնեայ ազգեր գրեթէ ուժաս-
պառ եղեր էին ի հաշիւ Պարսից կոռւելով անապատ-
ներու մէջ եւ հեռաւոր սահմաններու վրայ: Եղիշէ
իր երկրորդ Եղանակին մէջ տխուր պատկերը կը գծէ
Հայոց զինուրութեան: Ասիկա անտանելի էր: Մա-
միկոնեան Նախարարութիւնը, իրը Սպարապետու-
թիւն, երկու հարիւր տարիներէ ի վեր լաւագոյն
վիճակներու հասցուցեր էր Հայոց բանակը: Եւ
Վարդան Մամիկոնեան, որ Մեծն Սահակի ձեռքին
եւ չունչին տակ կրթուած, ուռծացած, եղած էր ի-
րապէս քաջ զինուոր մը, յարդի անձնաւորութիւն մը
թէ՛ Բիւղանդիոնի եւ թէ՛ Տիզբոնի արքունեաց առ-
ջեւ, իրեւ Ստրատելատ կամ Սպարապետ, որ քա-
ռասուն պատերազմներու մտած ելած, եւ իր զինուու-
րի արժանիքը շինած ու փառաւորած էր, կսկիծով
կը տեսնէր թէ «Այնպիսի պատուական զինուորու-
թիւն հասեալ էր ի չարաշուք անարգութիւն, եւ հայ-
րենի աղատութիւնն չարաչար կայր ի ծառայութեան
մարդախոշոչ բռնաւորին, որ եւ ըստ հեթանոսաց
օրէնս անցանէր արիւնհեղութեամբ»: Այս վիճակը
աւելի եւս վատթարացաւ, երբ բարձ ու դիրք ստա-
նալու համար քաջալերուեցաւ հաւատուրացութիւնը
Տիզբոնի կողմէն, եւ անարժաններու հոյլեր սկսան
ճոխանալ Հայոց մէջ: Վարդան իրաւամբ կը մարմ-

նացնէր իր քաջութեան մէջ Հայ Ազգին մաքուր ոյժը
եւ մաքրութեան եւ բարձրութեան մէջ կարմրեցաւ
Տղմուտի ափերուն մօտ:

Բայց Վարդանանց Պատերազմէն ետքը Հայ Զի-
նուորութեան քաջութիւնը անարգէ աւելի վիճակի
մը հասած կը նկատուէր Պարսից աչքին. բոլոր հպա-
տակ ազգերու մէջ յետին եւ անպիտան էր Ասորի
բանակը, բայց Ասորիէն աւելի անպիտան կը հա-
մարուէր Հայ բանակը: Եւ Վահան Մամիկոնեան,
որ այդ անարգանքը կը լսէր չէր կրնար հանդուրժել:

Դ. Փարակեցի շատ տխուր, բայց միանդամայն
կենդանի գոյներով կը պատկերացնէ անարգութեան
այդ վիճակը, ուր կը գտնուէր Հայութիւնը Վար-
դանանց Պատերազմէն ետքը. կեղտոտ նկարագիրնե-
րը այնքան քաջալերուած էին, որ իրենց տուները
իբրեւ անպիտան ամօթէն սպահուըտողներ, անարժա-
նապէս Պարսից Արքունիքէն ուրացութեամբ կը գը-
նէին Տանուտէրութիւնը եւ ո՛չ արժանաւորներու
պէս՝ աստուածպաշտութեամբ կը տիրանային. ան-
միտ, վնասակար, անպիտան, վատ մարդիկ, որոնց-
մէ ոմանք լեռնախոյս աւազակներու նման մէջտեղ
ելած իրենց ուրախութեամբ կը վերտէին, ոմանք
կատակով աստուածներ կը զնէին, եւ այդ կերպով
թէ՛ աստուածները եւ թէ՛ անմիտ վաճառողները
միասին կը թշնամանէին. բոլորն ալ ստոյդ մարդոց-
մէ դուրս եւ անարժան ու անձանօթ՝ ազնուատոհ-
մերու:

Ալ Հայոց աշխարհին մէջ լաւութիւն հեռացած
էր, իմաստութիւնը կորսուած, քաջութիւնը մէ-
ռած, քրիստոնէութիւնը թաքչած, եւ Հայոց զօր-
քերը, որ երբեմն ուրիշ բոլոր զօրքերուն մէջ քաջա-

նուն էին եւ զօրագլուխներն ալ անուանի եւ յաղթող, հիմա ամէնուն ծաղր ու ծանակ եղած էին. այսպէս որ նոյն ինք Պերող, յայտնապէս բոլոր ատեանին առջեւ նախատելով կ'ըսէր, թէ «Այր անպիտան եւ դունդ յետին, որ դամ մի յիմ իշխանութիւնն է՝ Ասորոց է. բայց քան զԱսորի՝ Հայն է այր յետին եւ անպիտան։ Եւ էր լուրն այն արժանի լալոյ եւ ողբաշոյ» (Ղ. Փարպ., Էջ 378–80)։

Վահան Մամիկոնեան, թէեւ պաշտօնապէս Տանուտէր չէր իր նախարարութեան եւ չունէր բանակ, բայց Ազգի աչքին միակ անձն էր որ կ'անձնաւորէր իր հօրեղբայր Վարդանը, չէր կրնար հանդուրժել այդ նախատինքին ու անարգանքին. եւ հետեւաբար, ուղեց հասկցնել Պարսից՝ թէ Հայեր վատ չէին. այլ վատ էին այն Հայեր, որ ազգային կամքին հակառակ եւ ի վիաս կը քաջալերուէին Տիղբոնի արքունիքն՝ իրենց հաւատուրացութեան եւ քսութեան փոխարէն։ Վահան գործի ձեռնարկեց, բայց աւելի դժուարութիւններու բախեցաւ քան իւր հօրեղբայրը։ Վասակ Միւնիի ջերմ կուսակիցներէն Խորխոսունեաց նախարար Գագիշոյ Մախազ եւ ետքը Գդիհոն Միւնի կը շարունակէին Վասակեանց քաղաքականութիւնը։ Վահանին խրոխտ, բայց արդարացի ընթացքը մեղկացած նախարարներու դէմ, ատելի ըրած էին զինքն անոնց։ Բանսարկութիւն եւ մատնութիւն այնքան անտանելի դարձուցին Վահանին վիճակը, որ այսպիսի «մտացի, առողջախորհուրդ եւ քարեսէր» քաջ մը՝ ստիլուեցաւ երթալ Դուռը եւ «ոտկարանալ ի հաւատոս»։ Սակայն ասով ալ չիակուցաւ չարախօսներուն բերանը. վասն զի Վահան կ'ատէր այնպիսիները, որ չէին դիտեր խօսք խօսիլ

«ի հրապարակի առաջի իշխանի,» նոյնպէս անոնք որ որսի կ'երթային կամ նշան կ'առնէին եւ չէին կրնար նետը թիրախին հասցնել՝ կը գատապարտէր զանոնք. կը նստի, կ'ըսէին, եւ ամէնքն ալ քթի տակէն կը ծաղրէ (նստի, ասէին, եւ ամենեցուն ունչս առնէ)։ Բոլոր անձարակ նախարարներ կամ գործականեր, որ արքունի գործերու մէջ իրենց անմտութեան հետեւանքով, ձիրք մը չէին կրնար ցոյց տալ, պատճառը Վահան կը համարուէր։ Հակառակ այս բոլոր ներքին չարիքներու, Վահան կրցաւ իր գիրքը եւ կարողութիւնը բարձր բռնել Տիղբոնի կառավարութեան առջեւ, եւ երեք կոփւներու մէջ ցոյց տուաւ թէ Հայ մարդը վատթար եւ անպիտան չէ. եւ այս մասին Վահանին խօսածները Պարսից Միհրան զօրավարին, զորս Փարպեցին գրեթէ նոյնութեամբ պատմագրած է (Ղ. Փարպ. Էջ 471–481) կ'արժէ, որ լաւ ուսումնասիրեն անոնք, որ Վարդանանց Պատերազմի մասին յստակ գաղափար մը կ'ուզեն ունենալ։

Վահան կը գտնուէր բարոյական անկումի մը անապատին առջեւ. վասն զի ո՛չ միայն Վասակեանք չէին քնած, այլ նաեւ շատեր թուլցան կամ վատ գտնուեցան իր կոփւներուն մէջ եւ թշնամիին կողմն անցան։ Վահան, ատեն եղաւ որ միայն հարիւր եւ նոյն իսկ քառասուն, երեսո՛ւն հոգիով մնաց պատերազմի դաշտին վրայ, բայց չվհատեցաւ եւ ապշեցուցիչ քաջագործութիւններ ըրաւ. եւ վերջապէս հասկցուց Պարսից Կառավարութեան, թէ սխալ էր աղգային զանգուածէն բաժնուելով, ազգային կամքին, աղղային հաւատքին դէմ գործող նախարարները, իրենց ուրացութեան համար քաջալերել, եւ Հայաստանի պէս հաւատարիմ եւ իւր վաստակ-

ներով նշանաւոր երկիր մը փճացնել։ Վերջապէս՝ Վահանի հետ զործ ունեցող երկու զօրապետներ, Միհրան եւ Հազարաւուխտ, կրցան համոզել Վաղարշը, թէ աւելորդ են այս բոնութիւններ Հայոց աշխարհին վրայ. որովհետեւ Վահանի նման քաջ զինուոր մը, իր խելքով ու զինուորի արժանիքով, աւելի օգտակար պիտի ըլլար արքունի ծառայութեան, քան ուխտանենդները։ «Զի յորժամ Հայք այնպիսի որեարով մեր էին, Վիրք եւ Ազուանք չիշխէին բնաւ. թիւրել զանձինս եւ այլազգազոյնս ինչ խորհել» (Անդ. էջ 552)։

Նիսորի պէս հեզ, մտացի եւ աշխարհաշէն բարձր պաշտօնատար մը Հայաստան դրկուեցաւ՝ բանակցելու համար Վահանին հետ, եւ Վահան ուխտապահ եւ հաւատարիմ նախարարներու հետ խորհրդակցելէ ետքը, երեք պայմաններու առաջարկեց նիսորին. այդ երեք պայմաններու մէջ խտացած է Վարդանանց եւ Վահանեանց պատերազմներու ամբողջ պատմութիւնը։

«Առաջին պիտանի եւ կարեւոր խնդիրն է այս, որ մեր հայրենի եւ բնիկ օրէնքը (հաւատքը) մեզի թողուք, եւ ուեէ Հայ մարդ մոդ ըընէք եւ մոգութեան համար զահ ու պատիւ չտաք, եւ կրակատունը (ատրուշան) Հայոց աշխարհէն ի բաց տանիք, եւ մինչեւ հիմայ աղտոտ եւ անպիտան մարդոց ձեռքով մեր եկեղեցւոյն եղած թշնամանքը տեսնել չտաք մեղ, եւ թոյլ տաք՝ որ քրիստոնեայ մարդիկ եւ քահանաներ՝ քրիստոնէութեան կարգն ու պաշտօնը անվախ կերպով պաշտեն ուր որ ուզեն։

«Երկրորդ խնդիրն այս է, որ դուք մարդը չէք ճանչնար իշխողի վայել կերպով (իշխանաբար)։

պէտք է որ իրաւացի կերպով գիտնաք լաւն ու վաստավարը, զատել պիտանին ու անպիտանը, հասկնալ տոհմիկն ու անտոհմիկը, լաւերու տեղ դնել պատուականը, քաջը ու օգտակարը. արհամարհել եւ րանի տեղ չգնել վատն ու անպիտանը. սիրել վաստակաւորները. իմաստունները մօտ պահել եւ անմիտները չմօտեցնել, այլ հրապարակէն (արքունի ատեան) ալ վռնտել։

«Երրորդ խնդիրը այս է. կ'ուզենք, որ Արեաց աշխարհի տէրն ու թագաւորը ինքն անձամբ, իր աչքերով տեսնէ եւ իր ականջներով լսէ, եւ ինքն ուղղակի գիտնայ լաւն ու անլաւը, եւ ո՛չ թէ ուրիշներու բերնով խօսի պէտք եղածը։ Այս է պատճառը, որ չկայ ուղիղ հայեցուած եւ արդար լսողութիւն, այլ յաճախ սուր խօսքեր կը լսուին եւ տրուած հրամաններն ալ ընդունայն են, եւ բոլորովին կ'այլայլէ հասկըցողութիւնը (իմաստ)։ Եւ երբ այսպէս է ամէն բան, բոլոր վաստակողները կը կործանին եւ կը կորսուին իրենց ծառաներով, եւ երկիրը ու անոնց բնակիչները չեն կրնար մնալ անշարժ ու հաստատուն։ Բայց թագաւորը, որ իւր առողջ աչքերով տեսնէ եւ իր աննախանձ ականջով լսէ եւ արդար խօսքերով խօսի իւր ծառաներուն, այն ատեն ծառաները կը կենդանանան, վաստակով չեն կշտանար, այլ աւելցնելով իրենց վաստակը կը ջանան օրէ օր շատցընել բարին, եւ այսպէսով երկիրը կը չէննայ եւ թագաւորն ալ չքեղութեամբ կը պայծառանայ։

Վահան Մամիկոնեան այս պայմանները առաջարկեց Նիսորի պատգամաւորներուն, («Շապուհ Խորհրդեան Դպիկիր»ին եւ «Միհրվաշտասպ Ճուարշացի»ին), Արտազ զաւառի եղինդ գիւղին մէջ, մինչ

Նիխոր Հեր գաւառի Նուարսակ զիւղին մէջ էր, եւ պահանջեց որ Տիզրոնի կառավարութիւնը «գրով եւ կնքով» ընդունի այդ երեք պայմանները, որոնք ընդունուեցան:

Պ. Փարպեցիի պատմութեան ամէնէն թանկագին մասն է այն, ուր կը նկարագրուի Վահանին եւ Նիխորին բանակցութիւնն ու խօսակցութիւնը, նաև պատգամաւորներու միջոցաւ եւ ետքը՝ անձամբ: Վահան Տիզրոն կ'երթայ, կը ներկայանայ Վաղարշին եւ պետութեան աւագանոյն, կը բացատրէ Հայոց ցաւը եւ կորովով կը խնդրէ, որ ընդունուին իւր պայմանները. եւ ատոնք ո՛չ միայն կ'ընդունուին եւ հրավարտակով կը հաստատուին, այլ նաեւ Վաղարշ կը փութայ Վահանը նստեցնել Մամիկոնեան նախարարութեան ղահին վրայ, իրեւ Տանուտէր Մամիկոնեանց եւ կուտայ անոր՝ Հայոց Սպարապետութեան ոլաշտոնն ալ, որ Մամիկոնեան Տան իրաւունքն էր դարերէ ի վեր: Վահան այնքան խիստ էր իր առաջարկած պայմաններուն գործադրութեան, որ երբ եկան աւետել իրեն, թէ «զտէրութիւն Մամիկոնէից եւ զՄապարապետութիւն Հայոց» Շահը իրեն կուտայ, պատասխանեց, թէ ինքը չկընար զէմ կենալ տրուած հրամանին, բայց կ'ուզէի, ըստ, քիչ մը «գործ եւ սոլաս» ցոյց տալ եւ այսպիսի արժանիքով հաճոյ ըլլայի եւ անկէ ետքը «որ ինչ թուէր ձեզ եւ կամէիք առնել՝ առնէիք. բայց առ այս նուագ կամէի թէ ներէիք ինչ» (Պ. Փարպ., Էջ 607): Բայց լոեցուցին Վահանը եւ նստեցուցին զայն «ի գահու Տէրութեան Մամիկոնենից, տուեալ ցնա ըստ օրինի նախնեաց իւրոց եւ զՄապարապետութիւն Հայոց աշխարհին» (Անդ. Էջ 608): Վահանի հետ, աղդային կամքին ու

հաւատքին հաւատարիմ եւ «ուխտապահ» նախարարներն ալ արժանացան չնորհներու իրենց արժանաւորութեան համեմատ:

Վահանին այս յաջողութիւնը ինքնին դատապարտութիւնը եղաւ Վասակի յաջորդներուն եւ հետեւողներուն, եւ փորձառութիւնը ցոյց տուաւ, թէ Վասակի պէս խելացի պետական անձնաւորութեան մը ծրագիրը, Հայոց թագաւորութիւնը վերականդնելու մասին, երազ մըն էր. նոյն իսկ իր անձնական կամ նախարարական փառասիրութեան տեսակէտէն ալ անօգուտ եւ վտանգաւոր քայլ մը, քանի որ աններկի միջոցներով ուզած էր խարել ազգային ամբողջութիւնը եւ նենդել իւր ուխտին կամ պատոյ խօսքին:

Արդէն, երբ Վահան՝ Նիխորին հետ խօսակցեցաւ անձամբ, ուստանենդներուն օրհասը եկած էր. թէ՛ անոնք որ Նիխորին չուրջը կը գտնուէին եւ թէ՛ անոնք որ Տիզրոնի արքունիքին մէջ եւ չուրջը, այնպէս ամօթահար եղան իրենց վարկարեկումէն, որ այլ եւս չէին կրնար երես ելլել, իրեւ մարդ պտտիլ:

Այդպիսիներ, եթէ հնար ըլլար, ամէն գնով պիտի գնէին ապստամբութեան անունը: Բայց հնար չէր այդ: Բոլոր ուրացեալներ վոնտուեցան, եւ անոնք որ Նիխորի վրանէն ներս կ'ուզէին մտնել, կ'ըսէին. «մենք ապստամբներէն ենք», եւ պահաներ թող կուտային այնպիսիներուն որ ներս մտնեն (Պ. Փարպ., Էջ 590):

Վահան այդպիսիներու մասին հետեւեալ կերպով խօսեցաւ Վաղարշի առջեւ, — «Յո՛յց տուէք մարդ մը, որ Պերող արքայից արքայէն պատուած ըլլայ ո՛չ թէ ձեր օրէնքը կատարելուն համար, այլ իր պի-

տանութեան կամ կոռուի մէջ գործ եւ վաստակ ցուցունելուն համար : Վասն զի Արեաց զօրագլուխները շատ տեղեր գտնուած են, թող ըսեն անոնցմէ ոեւէ մէկուն երեւելի մէկ գործը՝ որ անոնք ըրած եւ ձեր զօրագլուխներն ալ տեսած ըլլան, եւ անոնց այսպիսի վաստակին համար հատուցում ըրած ըլլաք անոնց : Սակայն անոնց կեղտոտ գործերը եւ մահապարտութիւնը յայտնապէս գիտեն իրենց դաւառակիցները եւ Հայոց աշխարհին ուրիշ մարդիկը, թէ ի՞նչ տեսակ արարածներ են ատոնք . «լի՛ ամենայն աղտեղութեամբ, սուտք, անպիտանք, աղտեղագործք, գայլտաշուրջք, գողք, լեռնախոյսք, գերեզմանակրկիտք, խարերայք», որոնց հետ Հայոց աշխարհին կրսեր չինականներն իսկ կը գարշէին հաց ուտելէ եւ կամ անոնց մօտ երթալէ, որ ըլլայ թէ պղծուին, մէր օրէնքին համեմատ . ահա՛ այսպիսիններն են, որ կուգային եւ խարէութեամբ ձեր օրէնքները կ'ընդունէին եւ ըստ կամի աղտոտելով կրակը, անմիտներու տեղ կը դնէին ձեղ . (Անդ ., էջ 603) :

Վահանին դիտողութիւնները թէեւ ծանր, բայց իրաւացի էին, եւ Վաղարշ մէծ հաճոյք զգաց ճանչնալով Հայու ճշմարիտ ներկայացուցիչը, ինչպէս որ Նիխոր նոյնքան հաճութեամբ տեսակցած էր անոր հետ Նոււրսակ դիւզի վրանին տակ եւ հրաման տըւած էր նուրիրակներուն, որ ա՛լ ներս չընդունին ուրացեալները, նոյն իսկ դուռը չմօտեցնեն, ըսելով անոնց, թէ «Դործոյ ինչ դուք չէք իմաստուն բանից, եւ լսել իսկ չդիտէք, արդ զտեղի ատենին յարժանաւոր առնէ ընդէ՞ր խափանէք . զի թող նստի անդ մարդայն՝ որ զիօսս աւագացն եւ զբանս իմաստոցն լսել դիտէ եւ օգտել» (Անդ ., էջ 588) :


Վահան մէծ պատուով եւ չքեղութեամբ վերադաւ Հայաստան : Յովհան Մանդակունի, ժամանակին քաջարի Կաթողիկոսը, ազգային ցոյցերով եւ հանդիսաւորութեամբ դիմաւորեց եւ ընդունեցաւ ազգային կամքին մարմնացումը, յանձին Մամիկոննեան գիւցազնին, որ զիտցած էր յարդել տալ այդ կամքը Պարսից Կառավարութեան :

Թիչ մը ետքը Անդեկան, «Խելացի, մտադիր, եւ մաստահայեաց» պաշտօնատար մը՝ Մարզպան զըրկուեցաւ Հայաստան, որ իրաց վիճակին տեղեկանալէ ետքը, համոզեց Տիզրոնի կառավարութիւնը, թէ անդէպ է ուրիշ Մարզպան կարգել Հայոց աշխարհին վրայ, ցորչափ Վահան Մամիկոննեան մը կայ հօն, հեռատես, արդարախոհ, աշխարհահոգ, քաջակիրա, ամէն գործի յարմար եւ յաջողակ եւ ամէն բանի մէջ յառաջադէմ : Եւ այսպէս, Վաղարշ Հայաստանի Մարզպանութեան հրովարտակն ալ դրկեց Վահանին, Դուին Մայրաքաղաքը : Վահան, զիտնալով հանդերձ Հայու «խանտածութիւնը» (չար նախանձ) չկրցաւ մերժել այս պետական վստահութեան նոր հաւաստիքը, համակերպեցաւ եւ սկսաւ իւր գործին՝ Դուինի եկեղեցւոյ մէջ գոհարանական հոգեյոյդ պաշտամունքէ մը ետքը, ուր Մանդակունին սիրով եւ ներողամտութեամբ զեղուն քարոզով մը՝ յորդուրեց ուրացողները, որ ապաշխարեն եւ միանան Եկեղեցւոյն :

Այսպէս փակուեցաւ Վարդանանց Պատերազմով պաշտպանուած ազգային դատը, որու չուրջ մղուած բոլոր կոփեներ եւ եղած զոհողութիւններ հասան իւրենց նպատակին :

Պատմական այս դասերէն բարոյական փորձա-

ոռութիւն մը կը ցայտէ , այն ալ սա՛ է , որ Հայոց ազգային-կրօնական կեանքին մէջ անջատ գործունէութիւն , ոեւէ նախարարութեան կամ կուտակցութեան անունով , ոքչափ ալ բուռն եւ յաջող նկատուի այդ գործունէութիւնը , չկրնար յաջողի , չկրնար ազգային ըստիլ , բանի որ չբղխիր Ազգին կամքէն :



ՎԱՐԴԱՆԱՑ ՊԱՏԵՐԱԶՄԸ

ՆՈՐ ՏԵՍՈՒԹԻՒՆՆԵՐ

(Կոչնակ , 1917 , Փետր . 3 . Թիւ 5)

Պ ՐԻՍՏՈՍԻ չորս հարիւր յիսուն մէկ թուականը Հայոց Պատմութեան ամէնէն կարեւոր դէպքերէն մէկուն թուականն է : Այդ դէպքն է Վարդանանց մեծ պատերազմը : Հայեր կը սկրեն իրենց վերաբերեալ պատմական իրողութիւնները մէծցընել եւ փառաւորել : Ասիկա իրողութիւնները խեղաթիւրելու եւ զանոնք իրենց նպաստաւոր կերպով պատմազրելու թագուն մտքէն չէ որ յառաջ կուգայ , այլ այդ իրողութիւններու ներքին արժէքէն եւ նըշանակութենէն : Այսպէս , Վարդանանց Պատերազմը , արտաքին կերպով՝ իրեւ Ազգերու ընդհանուր պատմութեան վերաբերեալ դէպք եւ իրեւ ուզմագիտական գործողութիւն , ոեւէ ուշագրաւ հանգամանք չունի . բայց ներքնապէս , Հայոց համար , իր ներքին արժէքով եւ նշանակութեամբ , մեծ է Վարդանանց պատերազմը , վասն զի ուղղակի կապ եւ աղերս ունի Հայ Ազգին գոյութեան ապահովութեան ինդրոյն հետ :

Պատմական այս երեւոյթը շիտակ եւ քաջ ըմբռոնելու համար , պէտք է ուշագրութիւն ընել քանի մը խնդիրներու :

Ա. — Ինչո՞ւ համար Վարդանանք գէնիք վերցուցին Պարսից դէմ :

Որովհետեւ Դենիմազդէզը , Պարսից այն ատենուան քէշը (կրօնը) չուզեցին ընդունիլ Հայք : Բայց

այս չեր բոլորը: Եթէ ինդիրը զուտ կրօնական ըլ-լար, թերեւս շատ պիափ դիւրանար ատոր լուծումը: Կրօնքի հետ կապուած էին քաղաքական եւ քա-ղաքադիտական մեծ ինդիրներ: Վասն զի Պարսկաս-տան, պէտք է խոստովանիլ, որ շատ աղատամիտ եւ թոյլատու էր հանդէպ իր պետականէն տարբեր կրօններու եւ դաւանանքներու: Այսպէս որ Պարս-կաստանի մէջ, ի միջի այլոց, Քրիստոնէական ե-կեղեցին (ասորի) շատ տարածուած, շատ պայծառ ու գօրաւոր էր:

Ասիկա գիտենք ո'չ միայն արտաքին պատե-րազմներէ, այլ նաև Եղիշէն, որ մասնաւոր իր-նամքով ի վեր կը հանէ այս պարագան, երբ դիտել կուսայ, թէ Շապուհի ատեն տիրապետող այդ ա-զատութիւնը ի՞նչպէս կը փոխուի — կարծես անհաս-կընալի պատճառներով — Յազկերտ Բ.ի ատեն եւ հալածանքի կը վերածուի ընդէմ Քրիստոնէու-թեան: Հակառակ մոգերու մոլեռանդութեան, ո-րոնք ամենեւին չէին ուզեր հանդուրժել ուրիշ կը-րօններու, Քրիստոնէութիւնը բարգաւած վիճակ մը ունէր թէ Պարսկաստանի եւ թէ Պարսկաստանի գերիշխանութեան ևնթարկեալ երկիրներու մէջ: (*)

(*) «Քանզի յիշեցուցանիմք ֆեզ զժամանակն Շապիոյ ար-քայի, որ էր հայր հաւուն ու Յազկերտի, եւ ետ նմա Աստուած զերկիրն Հայոց, ի ժառանգութիւն սովին օրինօք, որով եւ մեք իսկ վարիմք այժմ, եւ հարքն մեր եւ հաւուն հարցն մերոց, կացին նմա ի ծառայութեան վաստակս. եւ սիրով կատարէին զա-մենայն հրամանն բանի նորա, եւ բազում անգամ ի նմանէ մե-ծապարգել լինէին:

«Եւ յայնց ժամանակաց մինչեւ ի ու հայրենի արռող՝ եւ մեք զնոյն ծառայութիւն ծառայեցաք, բայց թերեւս ֆեզ լա-ւագոյն քան զառաջնոցն» (Եղիշէ, Բ. Յեղ. էջ 34-35):

Արդ, Եթէ զուտ կրօնական լինէր ինդիրը, ինչպէս դիտել առուինք, դիւրին էր ատոր լուծումը. — այսինքն՝ Դենիմազէզը, Զրադաշախն հաստա-տած կրօնը, վաղեմի կրօններուն լաւագոյնն էր: Անոր կրօնական արժէքը ա'յնչափ բարձր էր, ո'ր-չափ իր բարոյակսն եւ վիլխովիայական նշանա-կութիւնը: Եւ մենք գիտենք, որ Վասակեանք շատ խտիր չէին գներ Քրիստոնէութեան եւ Զրադաշ-տականութեան մէջ: Ասկէ զատ, Վարդանանց եւ ետքը Վահանեանց շրջաններուն ալ, ամէնէն ջերմ եւ անկեղծ Հայ-Քրիստոնեանէրէն ոմանք — եւ նոյն ինքն Վարդան — պահ մը կրցաւ կրօնափոխ ըլլալ,

«Լուեալ իսկ իմ էր ի նախնեաց մերոց, երէ յաւուրս Շապ-հոյ արքայից արքայի, իրեւ սկսաւ ուսումնդ այդ անել եւ բազմանալ եւ լնուլ զամենայն երկիրն Պարսից, եւ եւս անդր յԱրեւել հասանել, իսկ որ վարդապետն էին օրինացն մերոց՝ յորդորեցին զրագաւորն, զի մի՛ բնաւ ամենեւին բարձրցին օ-րէնք մոգութեան յաշխարիեն, եւ հրաման սաստիկ, զի լուել դադարեցէ Քրիստոնէութիւնն: Եւ ո'քափ նա կամեցաւ ար-գելուլ, եւս քան գեւս անեցին եւ բազմացն, եւ հասին մինչեւ յաշխարին բուշանաց, եւ անտի ի հարաւակողմն՝ մինչեւ ի Հըն-դիկս տարածեցաւ:

«Եւ այնպէս աներկիւդ եւ համարձակք էին յաշխարին Պարսից, մինչեւ յամենայն բաղաբս աշխարին եկեղեցի շի-նեցին, որ զանցուցանէր պայծառութեամք զրագաւորաբնակ արքունեօքն: Շինէին եւ վկայարան իմն անուանեալս, եւ զնոյն զարդ եկեղեցեաց զարդարէին, եւ յամենայն տեղիս՝ յա-պատս եւ յանապատս միայնանց շինէին: Եւ իրեւ ոչ ինչ երեւէր յայտնի օգնութիւն ուստեք, անելով անէին եւ բազ-մանալ բազմանային, եւ մարմնաւոր մեծութեամք մեծա-նային: Զպատճառս հարսութեան մենք ինչ ոչ գիտէաք. բայց այսափ ինչ նշանարդի իմանայաք, զի տիեզերք ամենայն զկնի ուսմանց նոցա զնային» (Եղիշէ, Գ. Յեղ. էջ 45-46):

գաղտնի եւ ամուր Քրիստոնէութեամբ, որպէս զի կարող ըլլային փրկել Ազգային Դատը:

Խնդրին քաղաքական եւ քաղաքագիտական կողմը Հայ Ազգին տեսակէտէն, Հայութեան եւ այն ալ Քրիստոնեայ-Հայութեան պահպանութիւնն էր եւ ապահովութիւնը:

Քրիստոնէութիւն՝ իր երեք չորս դարու կեանքին մէջ՝ եղած էր Արեւելքի մեծ, աիրապետող եւ կրօնական կապերով բոլոր Քրիստոնեայ ազգերը միացնող կրօնը: Զրադաշտականութիւնը, իր բոլոր հրապոյրներով, չէր կրցած աշխարհակալ կը բօն մը ըլլալ: Նոյն ինքն Պարսկաստանի մէջ բացի ուրիշ աղանդներէ, Քրիստոնէական եկեղեցւոյն այնքան ծաւալումն ու զօրացումը՝ կ'ապացուցանէ, թէ Դենիմազգէզը՝ փոխանակ ծաւալելու՝ կ'ամփոփուէր, եւ օր մը այնչափ պիտի տկարանար եւ անհասկնալի պիտի ըլլար, որ տեղի պիտի տար աւելի զօրաւոր կրօնական նոր հոսանքի մը: Սասանեան Հարատութեան ներկայացուցիչները, Արտաշիր Բարականէն ի վեր, ի զուր աշխատած պիտի ըլլային՝ թեւ թիկունք ըլլալով Դենիմազգէզի վերականգնման եւ ծաւալման:

Ասկէ զատ Հոռմէական եւ Բիւզանդական կայսրութեանց Քրիստոնէացումը՝ աւելցուց իրենց քաղաքական տիրապետութեանց հրապոյրը աշխարհի ծանօթ մասերուն վրայ: Ո՞չ միայն աշխարհի քաղաքական զօրութիւնը կեդրոնացած էր նոր կրօնքի (Քրիստոնէութեան) լուսով լուսաւորուած այդ աշխարհակալ պետութիւններու ձեռքին մէջ, այլ եւ մտաւոր մշակոյթը, քաղաքակրթութեան բոլոր ազ-

դակները կը դտնուէին Հոռմէա-Բիւզանդական կայսրութեան ներքեւ:

Հայերը չէին կրնար ընդունիլ Դենիմազգէզը, քանի որ լուսաւորեալ եւ հզօր ազգերու կրօնական դրութեան մէջ մտած էին, եւ չատ նշանակելի զարդացում, յառաջացում եւ արդիւնք ձեռք բերած էին, մինչեւ Ե. Դարու առաջին կէսը: Հայերը, իրենց թագաւորական իշխանութեան կորուստէն ետքը, Քրիստոնէութեան եւ Ազգային Մատենագրութեան չնորհիւ, այնպիսի ներքին ոյժ մը ձեռք բերած էին՝ իրենց Հայութիւնը պահելու եւ ապահովելու համար, որ զայն պիտի չուղէին որեւէ կերպով ու գընով ձեռքէ հանել: Եւ Ազգային այս նոր ինքնուրոյնութեան պահպանման դիտակցութիւնը այնքան մը շակուեցաւ եւ զօրացաւ Հայ Ազգին մէջ, որ ետքը, դարերու ընթացքին չուղեց տեղի տալ Քրիստոնեայ զօրաւոր ազգերու պահանջումներուն եւ բռնադատութեանց առջեւ: Այս ողիով եւ մեթոսով կրնայ դիւրութեամբ բացատրուիլ նաեւ այն պայքարներուն արժէքը, զորս ունեցաւ Հայաստանեայց Եկեղեցին Յոյն եւ Լատին Եկեղեցիներու հետ, հետագայ դարերու ընթացքին:

Եթէ Սասանեանք բռնացան Հայոց վրայ, պատճառը ներքնապէս քաղաքական էր, թէեւ երեւոյթը կրօնական էր: Անոր համար չատ պայծառ ապացոյց մը ունինք պատմութեան մէջ: Հայերէն դիրերու դիւրէն առաջ, Հայեր քրիստոնեայ էին: Սասանեան կառավարութիւնը հաշտ աչքով չդիւրէց ոչ թէ Քրիստոնեայ-Հայաստանը, այլ Քրիստոնեայ Բիւզանդիոնի հետ կրօնական եւ մտաւորական կապերով կապուած Հայաստանը: Այս էր պատճառը

որ սկահ մը, կրակի մատնուեցան Պարսկահայաստանի մէջ գտնուող բոլոր յունարէն գրեանք եւ ասորերէնը զօրացաւ հոն։ Բայց հայերէն գիրերուն դիւտէն եւաքը, երբ Հայք ունեցան իրենց առանձին Ազգային մատենադրութիւնը, խնդիրը փոխուեցաւ։ Շահնշահներու կառավարութիւնը այլեւս դիտողութիւն չունէր, որովհետեւ Պարսկահայաստանը թէեւ Քրիստոնեայ, բայց Յոյն գրականութիւնը չունէր, դոնէ այն իմաստով, որ Հայաստանի եկեղեցիներուն մէջ Սուրբ Գրոց յունարէն ընթերցումը վերջ գտած էր, իսկ ասորերէնի տեղ հայերէն մտած էր, եւ ասիկա շատ տարբերութիւն չէր ըներ գերիշման կառավարութեան տեսակէտով։

Ուրիշ ապացոյց մը, որուն վրայ գեռ ուշադրութիւն չէ դարձուած, Պարսկահայաստանի եւ Յունահայաստանի առանձին առանձին պահպանութեան խնդիրն է. — այսինքն ո'չ Տիզրոն, ո'չ ալ Բիւզանդիոն չէին ուզեր, որ իրենց գերիշմանութեան տակ երկուքի բաժնուած Հայաստանը վերնայ մէջ-տեղէն, ոչ թէ Հայոց սիրոյն համար, այլ իրենց քաղաքական եւ աշխարհակալական նկատումներուն եւ շահերուն համար։ Քանի որ ո'չ Շահնշահներու կառավարութիւնը, եւ ո'չ ալ Կայսրներու կառավարութիւնը չկրցաւ ամբողջ Հայաստանը-առանց բաժանման—իւրացնել՝ տեղի յարմար գատեցին երկուքի բաժնելով՝ իրեւ պատուար պահել զանոնք իրենց երկրին սահմաններուն վրայ։

Վարդանանց պատերազմը ծագեցաւ այս բաժնեաւ Հայաստանի պարսկային մասին վրայ, եւ Վարդանանք չկրցան զինուորական ոյժ եւ օգնութիւն դանել Բիւզանդիոնէն, հակառակ եղած դիւ-

մումներու եւ տրուած խոստումներու, եւ Հայեր մնացին մինակ, այն ալ պառակտուած վիճակի մէջ, այսինքն՝ Վարդանանք հեռատես եւ աւանդապահ ազգային գոյութեան պահպանման խնդրին մէջ, իսկ Վասակեանք պատեհապաշտ եւ համակերպելու կողմնակից։ Այս ներքին եւ արտաքին դժուարութեանց մէջ է, որ Վարդանանք կը յաջողին Ազգային Դատը պաշտպանել Աւարայրի դաշտին վրայ։ Կը մզեն մնծ պատերազմը, կ'իյնան հազար երեսուն եւ վեց Հայեր, բայց վերջնական յաղթութիւնը եւ ամբողջ խնդրին լուծումը կը մնայ Վահանեանց, որոնք հաւատարիմ Վարդանանց ազգային ուղղութեան, կը կոռուին, կը բանակցին, եւ վերջապէս ձեռք կը բերեն կրօնական ազատութեան եւ ներքին ինքնավարութեան մը իրաւունքներն ու պայմանները՝ Սասանեան գերիշմանութեան նեերքեւ։

Բ. — Հայաստան ի՞նչ կարեւորութիւն ուներ լնդիանուր տեսակէտէն։

Երբ մեր միտքը բերենք Պարսկաստանի նախասասանեան հզօր կառավարութեանց աշխարհակալութեանց ծրագիրը, եւ անոնց ձեռք բերած յաջողութիւնները, մանաւանդ Քսէրքսէսի արշաւանքը դէպի Եւրոպայի մեծ գոները (կ. Պոլսի նեղուցները) բաւական նոր լոյսեր կրնանք սիոնել Սասանեան եւ Բիւզանդական բանակներու ընդհարման պատմական ընդհանուր պատճառներուն վրայ։ Ո՞վ պիտի իշխէր Բիւզանդիոնի (կ. Պոլս), Քսէրքսէսի ձախողուածէն ետքը. — Վերականգնուած եւ սակայն ծերունի Դենեմազգէ՞զը, թէ մատղաշ եւ զօրաւոր Քուրիստոնէութիւնը։ Սասանեանք ո'րչափ ալ փորձեցին իշխել կ. Պոլսին, բայց Բիւզանդիոնի կառավարու-

թիւնը իդերեւ հանեց այդ բոլոր փորձերը, եւ կայսերական բանակները միշտ կարող եղան արշաւել երկու պետութիւններու մէջ տեղ տարածուած երկիրներու վրայ եւ մօտենալ նոյն իսկ Տիգրոնի դռներուն:

Հայաստան դատապարտուած էր ճակատագրորէն՝ ոտնակոխ ըլլալու այս ընդհարումներու ատեն եւ կոռւելու մէկ կամ միւս կողմի գերիշխանութեան դէմ: Հայ Արշակունի հարստութեան կործանումէն ետքը, Հայաստանի բաժանումը աւելի լաւ համարուեցաւ, եւ Հայ ազգը կրցաւ օդտուիլ այն բաժանումէն, եւ ինչպէս որ դիտել տուինք, չնորհիւ իր ներքին նոր ոյժին — Հայ Քրիստոնէութեան եւ Հայ գրականութեան — պահել իր գոյութիւնը:

Բայց ինչ որ անկարելի եղաւ Պարսից, կարելի եղաւ չատ ետքը Թրքաց կամ իսլամ ոյժին: Իսլամութիւնը ո՛չ միայն Պարսկաստանը կուլ տուաւ, այլ նաև Բիւզանդական կայսրութիւնը: Այդ տըխուր չրջանին ալ դարձեալ Հայաստան ոտքի տակ էր, եւ մերթ Պարտատի եւ մերթ Դամասկոսի Խալիֆաներուն կոթնելով, զուրկ քաղաքական միացուցիչ զօրութենէ, կլցաւ պահել իր գոյութիւնը չնորհիւ իր Քրիստոնէութեան, որուն համար շարունակ նահատակուեցաւ: Սելջուքեանց չրջանին եւս նոյն քաղաքական եւ նահատակային կեանքը եղաւ Հայաստանի ճակատագիրը: Իսլամութիւնը իր ծաւալման ուժով, վերջապէս կրցաւ տիրել Բիւզանդիոնին, բայց ատով շփակուեցաւ խնդիրը: Եւ այսուան համեւրոպական պատերազմը ցոյց կուտայ, թէ մինչեւ որ Ֆաթիհի գրաւած կ. Պոլիսը չանցնի Քրիստոնէութեան ձեռքը—հոգ չէ թէ Ռուսիո՞յ

ձեռքին տակ կամ իբրեւ միջազգային մայրաքաղաք առանձին կառավարութեամբ — Հայաստանի ինդիրը, իբրեւ Արեւելեան կոչուած Խնդրին հանգոյցներէն մին՝ պիտի չլուծուի: Եւ անշուշտ Ընդհանուր Պատմութեան տեսակէտէն կարեւորութիւն մը ունէր Հայաստանը, որ Գերմանո—Թիւրք զինակցութեան գլխաւոր զոհն եղան Հայք, զուտ իրենց Քրիստոնէութեան պատճառաւ, ինչպէս նաև զոհունեցան միեւնոյն քաղաքականութեան՝ Ասորի եւ Սիւրիացի Քրիստոնեայ ժողովուրդներ:

Կարելի է ըսել, հին պատմական երեւոյթը ո՛չ թէ կը կրկնուի, այլ կը շարունակուի: Սա՛ տարբերութեամբ միայն, որ պատմութեան այդ հին չրջաններուն, Հայ Ազգը, թէեւ պատերազմներով եւ գաղթականութիւններով տկարացած, բայց իր տիրական մեծամասնութիւնը, մայրենի հողին վըրայ, հնարաւորութիւններ ունէր իր գոյութեան սպառնացող վատանդներուն զիմազրաւելու, հակառակ իր կորուստներուն եւ զոհութիւններուն: Այսօր Հայ Ազգը չունի այդ հին չրջաններու առաւելութիւններ. որովհետեւ անլուր եւ անման քաղաքական բարբարոսութեան մը, բոնի, անպատիւ, եւ ասպետական ողիէ զուրկ, իսկապէս վանտալական հայրենազրկութեան մը ենթարկուեցաւ ան: Եւ մեր ներքին չարիքներուն չնորհիւ, մեծ մեծ համեմատութիւններ առաւ մեր Ազգի գլխուն եկած այդ փորձանքները, որուն պատասխանատու ենք մենք Հայերս: Այնպէս որ եթէ մեր ներքին բոլոր շարժումները կաղմակերպուէին Վարդանանց ողիով, ըստ իս, մեր ազգային գոյութեան այս կերպով վտանգուիլը մեծ համեմատութիւններ չէր առներ:

Գ. Ի՞նչ էր Վարդանանց եւ Վահանեանց շարժումներու ոգին:

Ես ամենեւին պիտի չուզէի խօսիլ եւ գրել Վարդանանց պատերազմին եւ անոր շարունակութեան եւ յաջող ելքին վրայ, եթէ այդ շարժումներու ոգին պէտք ըըլլար Վարդանանց դարուն յաջորդող բոլոր ժամանակներու Հայոց համար: Ես նոյն իսկ չէի ուզեր, որ ուրիշներ ալ խօսէին Վարդանանց անունով, չտարծէին անոնց քաջազործութեամբ, եւ երեւակայական տիեզէ պատկերներ եւ նկարներ չըխնէին Վարդանի համար, Սուրբն Դեւոնդի համար, Վարդանանց պատերազմի համար, եւ պիտի չհանդուրժէի մանաւանդ, որ Վարդանանց յիշատակները տօնախմբուէին Հայաստանեայց եկեղեցւոյ մէջ, եթէ անոնց ոգին պիտի չխանդավառէր ապրող Հայութիւնը եւ պիտի չառաջնորդէր անոր՝ իր գժուարութիւններու միջոցին:

Այդ ոգին շատ յայտնի է եւ ներշնչող՝ ի՞նչպէս Վարդանանց շարժումին մէջ, նոյնպէս անոնց վրայ գրուած ամբողջ գրականութեան մէջ, մեր Երդ. Դարու պատմագիրներէն սկսեալ մինչեւ մեր օրերը:

Վարդանանք եւ Վահանեանք կոռւեցան մտքի եւ խղճի ազատութեան համար. ուրիշ խօսքով՝ Հայ Քրիստոնէութեան համար, որ արտայայտուած է Հայաստանեայց Եկեղեցիով: Այս ոգին զսպանակն է այդ շարժումներուն:

Վարդանանք եւ Վահանեանք չհանդութեցին ներքին չարիքներուն: Բրին ինչ որ կարող էին ընել՝ ուզզելու եւ սիրաշահելու համար փառասէրները, մատնիշները, ուրացողները, բայց երբ չյաջողեցան սիրով, յաջողեցան սրով:

Վարդանանք եւ Վահանեանք՝ իրենց շարժումներու բովանդակ բնթացքին հաւատարիմ (Loyal) եղան ո՛չ միայն իրենց Հայ—Քրիստոնէական ըսկըզբունքներուն, այլ նաև գերիշխան Կառավարութեանց: Ասիկա մեծ քաջութեամբ եւ հիանալի համարձակութեամբ շեշտեցին իրենց գործքին եւ խօսքին մէջ հաւասարապէս:

Վարդանանք եւ Վահանեանք ասպետական ճշշդրիտ ոգիով վարուեցան թշնամիներու հետ: Ասիկա Հայ գինուորին եւ ասպետին ամէնէն չքնաղ եւ հոյակապ առաքինութիւնն էր, որ կը չեշտուի Մամիկոնեան Նախարարութեան բոլոր պատմութեան մէջ: Ճերմակաձի Մուշեղ զօրավարին ասպետական վարժունքին պատմութիւնը Շապուհի կանանցին հանդէպ, Փաւատոս Բիւզանդի ազնիւ դրուագներէն մէկն է: Այս ոգին ասպետական է բարին ամէնէն իրական ու մաքուր առումով, եւ այս ոգին է, որ կը բարձրացնէ զէնք բռնող Հայ կտրիճներու քաջութիւնը:

Վարդանանք եւ Վահանեանք, կ'արժէ եւ հարկ է որ չեշտեմ մասնաւոր խնամքով, Հայաստանեայց Եկեղեցւոյ ազատութեան դէմ լարուած ներքին եւ արտաքին որոգայթներն եւ ոտնածութիւնները ջախիջախեցին: Վարդանանց պատերազմին մէջ Հայաստանեայց Եկեղեցւոյն, Դենչապուհի կարգադրութեամբ, հարկի տակ իյնալը ըմբռոստացուցիչ պատճառներէն մին եղաւ: Եւ ասոր կընային հանդուրժել, որովհետեւ ասիկա նիւթական կողմն էր Եկեղեցւոյ ազատութեան բռնաբարութեան, բայց կա՛ր նաև անոր հոգեւոր ազատութեան դէմ վտանգ մը, որուն պաշտպանութեան համար ո՛չ միայն գրչի

Հոյակասլ պայքարով մը գերազանցեցին Վարդանանք իրենց զինուուրական քաջութիւնը, այլ նաեւ իրենց մեծ պատերազմով նուիրագործեցին եկեղեցւոյ ազատութիւնը^(*):

Այս ոգին մնաց Հայ ժողովուրդին ներսը, եւ ամենեւին չհանդուրժեց ան, որ իր եկեղեցին նիւթապէս սրբազնութիւն հաւատքին եւ արեան թշնամիներուն ձեռքով. այնպէս որ նոյն իսկ իր եկեղեցական ուրբութիւնները (զիրք, սպասք, անօթք, պատկերք, եւյլն) երբ գերուած գերփուած են, գրամական փրկանքներով եւ հոգեկան մաշումներով յաջողածէ ազատել զանոնք: Ամէն անգամ, որ ձեռագիր Աւետարանի մը յիշատակարաններու մէջ հանդիպիմ այսպիսի դէպքի մը արձանագրութեան, կը յուղուիմ, տաքութիւն մը կ'եռայ ներսս, աչքերս կը լեցուին, եւ հպարտ կ'զգամ ինքզինքս, որ իր թշուա-

(*) Հայք կ'ըսէիմ Յազկերտին. «Մի՛ դու, արքայ, եւ մի՛ զայդ այլ առ մեզ ասեր. քանզի ոչ է եկեղեցի շինուած մարդոյ, եւ ոչ տուրք արեգական, որպէս դուք այլ ընդ այլոյ կարծես՝ թէ աստուած իցէ. ոչ միայն զի ասուուած չէ, այլ եւ կենդանի չէ: Այլ եկեղեցի ոչ են պարզեւք քազաւրաց, եւ ոչ արուեստ նարտարութեանց, եւ ոչ գիտք իմաստնոց, եւ ոչ աւար քաջուրեան զինուրաց, եւ ոչ պատիք խարէութիւնք դիւաց. ան եւ բնաւ իսկ ամեններմ զինչ եւ տասացես յերկրաւորացն, կամ ի վեհեց կամ ի վատրարաց, բնաւ ուրեք եկեղեցի ի նոցանէ ոչ գտցի: Այլ շնորհք են մեծին Աստուծոյ, ոչ միումումեք. ի մարդկանէ տուեալ, այլ ամենայն բանաւոր ազգաց, որք վիճակեալք են ի բնակութիւն ի ներքոյ արեգականս: Հիմունք նորա եղեալ են ի վերայ հաստառուն վիմի. ոչ ներքինք շարժել կարեն, եւ ոչ վերինք դրդուեցանել: Եւ զորերկինք եւ երկիր ոչ դողացուցանէ, մի՛ ո՛վ ի մարդկանէ խրոխտացի յաղբել նմա» (Եղիշէ, Բ. Յեղ. էջ 35-36):

ոութեան մէջ ազատական եւ ասպետական ազգի մը զաւակն եմ:

Եկեղեցւոյ եւ եկեղեցւոյ վերաբերեալ ամէն նուիրական բանի ազատութիւն նախանձախնդիր այս ոգին, որ մեր ժամանակներու մէջ, յաւակնուան հանհարազատ ազգասիրութենէ մը սկսաւ արհամարհուիլ, պայման է որ բոնէ կեդրոնական տեղը մեր բոլոր շարժումներուն մէջ:

Վարդանանք եւ Վահանեանք[»] գեռ այսօր եւ վազը, եւ յաւէ՛տ, ցո՛րչափ Հայ Ազգն ապրի ոեւէ չափով ու կերպով, իրենց ոգիով պէտք են վառել հայերը, խանդավառել եւ առաջնորդել:

Վարդանանց պատերազմը պատմական պարզ յիշատակ մը պէտք է մնայ Հայոց Պատմութեան մէջ—որովհետեւ այդ պատերազմին բոլոր պարծանքը իրենցն է միայն—, եթէ իր ոգիով պիտի չոգեւորէ մեզ:



ՎԱՐԴԱՆԱՑ ՊԱՏԵՐԱԶՄԻՆ ՏԵՂԸ

Ա. ԱՐԴԱՆԱՑ պատերազմին տեղւոյն անունը կապուած է Աւարայր կամ Աւերայր Դաշտին հետ:

Կան նաեւ Տղմուտ Գետ, Շաւարշան դաշտ եւ Արտագ Գաւառ անունները, որոնք նոյնպէս կապուած են Վարդանանց Պատերազմին տեղագրութեան հետ:

Բայց խնդիրը սա՛ է — Հայաստանի աշխարհագրական քարտէսին վրայ ո՞ւր պէտք է փնտռել այդ տեղերը:

Մ. Խորենացին է, որ առաջին տեղեկութիւնը կ'ընձեռէ մեզ Շաւարշանի եւ Արտազի մասին:

Բայտ Խորենացւոյն՝ Շաւարշան կամ Շաւարշական Գաւառը կ'իյնայ Մասիս լեռան հարաւային արեւելեան կողմը (ի հարաւոյ յարեւելից կուսէ Մասեաց):

Այս Շաւարշան Գաւառը, յետոյ կը կոչուի Արտագ Գաւառ այն գաղութին պատճառաւ, որ բերուեցաւ Ալանաց Արտագ աշխարհէն, եւ Արտաշէս թագաւորի հրամանաւ զետեղուեցաւ Շաւարշան Գաւառին մէջ: Այս գաղութը, ի յիշատակ իր բընաշխարհին, Արտագ կոչեց իր այս նոր գաղթավայրը (Մ. Խոր. Բ. ծր. :— Հմմտ. Բ. լդ.):

Շաւարշան շատ նշանաւոր է Վարդանանց Պատերազմէն յառաջ ալ: Հո՛ն էր Հայ թագաւորաց ամառանոցն եւ բանակետղը: Հո՛ն է որ Մ. Թաղէսս Առաքեալ հանդիպեցաւ Սանատրուկ թագաւորին, եւ

քրիստոնէացուց Հայոց Օրիորդն զԱմնդուխտ, որուն հետեւանքով նահատակուեցան երկուքն ալ հոն, եւ յետոյ, ի յիշատակ այս նահատակութեան, շինուեցաւ Ս. Թաղէսսի Վանքը, Մակուայ հիւսիսային կողմը, ծործորի մը մէջ, գետեզերքը:

«Եւ անդ ասեն զյզութիւն մօր Մրոյ ու Մեծի Լուսաւորչին» (Մ. Խոր. Բ. հգ.):

Բայտ Փարպեցւոյ՝ Աւարայր Գիւլ մըն է Արտագ Գաւառին մէջ, եւ այդ գիւղին մօտ՝ Տղմուտ դաշտին մէջ, «Հրջափակ տեղ» մըն էր, զոր ընտրեցին սպարսիկ զօրավարներ «յաղագս երկիւղի զօրացն Հայոց», եւ հո՛ն դրին իրենց բանակը: (Ղ. Փրպ. էջ 226):

Եղիշէ անխտիր կը գործածէ Դաշտն Արտազու եւ Դաշտն Աւարայրի բացաւրութիւնները «առ ափըն Տղմուտ գետոյն» (Եղիշէ էջ 77, 147, 90):

Տղմուտ յայտնապէս գետի անուն է, եւ Փարպեցին՝ երբ կ'ըսէ Տղմուտ դաշտ, ըսել կ'ուզէ Տղմուտի դաշտ, այսինքն՝ այն դաշտը, որու մէջն կ'անցնի Տղմուտ գետը:

Վերջին պատմագիրներու համաձայն, Արտագ՝ Մակու է. իսկ Մակու, ըստ Ալիշանի, կ'իյնայ արդի Պարսիկ Հայաստանի հիւսիսային ծայրը, այսինքն Պայազիտի (արեւելութէն), Մասիս լերան (հարաւէն) եւ Երասիս գետին (արեւելքէն) մէջ տեղ գտնուած երկերը մինչեւ Պալըք գետ:

Դարձեալ ըստ Ալիշանի, Շաւարշական կամ Աւարայր գաշտը կ'իյնայ Մակուայ արեւելեան հիւսիսային (պիտի ըլլար՝ հարաւային) կողմը, Տղմուտ գետին եզերքը, եւ կը հաւանի թէ Տղմուտ գետն է

Հիմակուան Աք-Զայ վլտակը, որ կը խառնուի Ե-
րասխ գետին. Հոն է նաև Աք-Զայ լճակը:

Ալիշան այս հչգրտումներն ընելով հանդերձ,
կ'ըսէ — «Այլ աւաղ, զի ոչ ոք ցարդ հետախուզ-
եաց եւ ետ ծանօթս հչգրիտս ցցանկալի վայրացն,
յորում կրօնք եւ հայրենիք միաբանեալ գործս սըս-
րալիս կատարեցին յաւուրսն անդ հարստութեան
Հայոց» (Տեղագիր Հայոց Մեծաց, Էջ 56):

Իսկ Միքայէլ Փորթուգալ, քննելով Պարսկաս-
տանէն Հայաստան բերող ճամբաները, կ'ըսէ.

Երկու ճամբայ միայն կայ Պարսկաստանէն Այ-
րարատ: Եւ ասոնց ամէնէն հարթն ու կարճն է Ե-
րասխ գետին արեւելեան ափունքը. իսկ միւսն է
Բագրեւանդի կամ Պայազիտի ճամբան, կրկին լեռ-
նագօտիներու մէջ, եւ այն ճամբէն է որ կարաւան-
ներ կ'երթեւեկն մինչեւ ցայժմ Դավրէժէն էրզրում:

Արդ, գիտել կուտայ, այս երկու ճամբաներէն
ո՛ր մէկն ալ ընտրէ Դավրէժի եւ Խոյի վրայէն ե-
կող բանակ մը, անպատճառ պիտի անցնի Արտա-
դու դաշտին մէջէն կամ քովէն:

Այս գիտողութիւնը հիմնուած է սա՛ իրողու-
թեան վրայ, որ Պարսիկ բանակին կեդրոնավայրն
է Հեր եւ Զարեւանդ գաւառը, որ միշտ բանուկ
ճամբան եղած է Պարսկաստանէն Հայաստան, եւ
Պարսիկ միշտ այս գիծէն յարձակած էն Հայա-
տանի վրայ պատերազմներու ատեն:

Հեր կը համապասխանէ հիմակուան Խոյ դա-
ւառին, իսկ Զարեւանդ՝ Սալմաստ կամ Տիլման
գաւառին, երկուքն ալ կից Ուրմիոյ ծովուն (Տե-
ղագիր Հայոց Մեծաց Էջ 57):

«Ուստի յԱրտազ պէտք էին դիմաւորել Հայք
զՊարսիկս եթէ կ'ուզէին արգիլել նոցա Հայաստան
մտնելը, ինչպէս եւ յԱրտազ դիմելու են Պարսիկք
եթէ հարկ ըլլայ պաշտպանել զԱրպատական ընդ-
դէմ թշնամւոյ մը, որ թէ ի Բագրեւանդայ եւ թէ
յԵրասխայ դաշտէն կընայ անդ հասանել:

«Աւարայրի պատերազմէն 1063 տարի ետքը,
այս է 22 Օգոստոս 1514ին, Եավուզ Սուլթան Աէ-
լլիմ՝ Շահ Իսմակիլի բանակները նոյն տեղերը խոր-
տակեց, բանզի Զալտրանի դաշտը նոյն ինքն Շա-
ւարշականն է: Աէլլիմ Բագրեւանդայ եւ Մակուայ
ճամբով կուգար, Իսմակիլ ալ Խոյի (Միք. Փորք.
Եղի՛նէ Էջ 341-42 ծնթ.):

Միքայէլ Փորթուգալ, կ'եղրակացնէ, թէ «պա-
տերազմին վայր Մեծ դաշտ մի է ընդ մէջ Արտազ
եւ Հեր եւ Զարեւանդ գաւառաց», թէ այդ դաշտը
Արտազու կից կամ անոր մասն ըլլալուն համար,
կ'ըսուի Արտազու դաշտ: Դաշտիս մէջ գետ մը պի-
տի ըլլայ՝ Տղմուտ, որոյ մէկ կողմը Հայք՝ միւս
կողմը Պարսիկք բոնեցին: Գետը գժուարութիւն-
ներ կը մատուցանէ Պարսիկ բայց Հայք աւելի հը-
մուտ վայրացն գիւրաւ կ'անցնին: Տղմուտին ոռո-
գած մասին կամ գոնեա սորա հարաւային ափանց՝
Փարպեցին «Տղմուտ դաշտ» կ'ըսէ. իսկ Եղիշէ կ'ան-
ուանէ «դաշտ Աւարայրի». վասն զի Աւարայր, ըստ
Փարպեցոյ, գիւղ մի էր, եւ այդ գիւղի մօտ բա-
նակեցան Պարսիկք՝ ի շրջափակ տեղի Տղմուտ դաշ-
տի: Դաշտին եղերքը (այս է ըստ աշխարհագրա-
կան քարտիսից՝ արևմտեան և հիւսիսային կողմերը)
կը գտնուին «լեռնադաշտք եւ ամուրք ձորոց»:

Եւ յետոյ, հետեւելով Պ. Գալուստ Շիրմազան-
եանի տեղագրութեան եւ տեղեկագրութեան (ԱՐԱ-
ՐԱՅԻ ամսագիր էջմիածնի, 1872, Նոյեմբեր եւ Դեկ-
տեմբեր) սա' քաղուածը կուտայ.

— «Յարեւելս Մասեաց եւ ի հիւսիսոյ Մակուայ
գետոյ, կայ արդարեւ տափարակ տեղի մը, զոր
հարթ է նախնեաց Գերատոյ դաշտն համարել, եւ
որ շարունակութիւն մի է Շարուրայ դաշտին, յոր-
մէ կը բաժանի Երասխաւ: Բայց ըստ քննութեանց
Պ. Շիրմազանեանէ այդ Գերատոյ կամ Մակուայ
դաշտը չէ Աւարայրինը, ըստ որում չէ շրջափակ
ու անյարմար է պատերազմի:

Մակուայ գետն անցնելէ ետքը, գէպ ի հարաւ
երթալով, կը հասնիս, ասէ, երկրորդ դաշտի մը,
որ գլխաւոր գիւղին անուամբը մարթ է կոչել զնա
Քարաչեադին: Այդ երկրորդ դաշտն ալ կը խառնուի
երրորդի մը հետ, զոր այժմ Զորսի դաշտ կը կոչեն,
եւ որ կը զատուի յերկրորդէն՝ միայն Ազսու գետով:

«Բստ Թաղէի վանականաց՝ այդ Ազսուն է Տըղ-
մուտ գետը, եւ լեռներով շրջափակ Զորսի՝ Աւա-
րայրի դաշտը:

«Ուստի Պարսիկը Ազսու եւ Խոյ գետոց մէջ-
տեղը՝ Զորսի դաշտին մէջ, իսկ Վարդանանք նոյն
դաշտին Ազսույի հիւսիսակողմը գտնուող Քարա-
չեադինի մասին մէջ բանակած ըլլալու են:

«Վանականք ի հնուց հետէ սովորութիւն ունին,
Քարաչեադինը անցնելէ ետքը Վարդանանց շարա-
կանը երգելու:

«Մեր ճանապարհորդը Զորսի դաշտին հողը
կաւային եւ կարգէ դուրս տղմուտ տեսեր էր, եւ
ամենայն կերպով յարմար բանակ մը պատրաստելու:

«Յարեւելս Զորսի դաշտին է աւանն Մառական.
այս կողմերս նշանաւոր է այծեմի պորտին արտադ-
րած մուշկը կամ քարացեալ արինը, որ գեղի հա-
մար սուզ կը վաճառի: Ծամկական աւանդու-
թիւն մը կ'ըսէ, թէ այդ մուշկը Վարդանանց Պա-
տերազմէն յառաջ չէր ըլլար, եւ թէ այծեմունք այդ
սրբազն տեղեաց վրայ երեք օր արածուելէ ետքը
կը սկսին արտադրել զայն:

«Պայազիսի, Մակուայ եւ սոցա գեղերուն
Հայք՝ տարին մի անդամ սաստիկ պահք կը պահեն
սուրբ Վարդանայ համար Հոկտեմբերի վերջերը:

.....«Ի հարաւոյ Ս. Թաղէի վանաց Պ.
Շիրմազանեան տեսեր էր Շաւարշան քաղաքին ա-
ւերակները» (Միք. Փորբ. Անդ, էջ 342-43 ծնթ.):



ԹԱՆԿԱԳԻՆ ՅԻՇԱՏԱԿԱՐԱՆ ՄԸ

ՇՀԹ — 1130

Եղիշեի Վարդանանց Պատմութեան ամենէն իին ձեռագիր-ներէն մէկը, որ գրուած է 1174ին, իր գտնուի Ս. էջմիածնի Մատենադարանին մէջ: Խալ այս քանիզին Յիշատակարանը այն Զեռագրին է, որ գրուած է 1130ին, Այնքապի մօտ, Տլուքի Ս. Պողոս Վանքին մէջ, Ս. ՎԱՐԴԱՆՆ Եկեղեցոյ հովանոյն տակ, Սամուել Եպիսկոպոսի Առաջնորդութեան աստեն, գրիչ ՅԱԿՈ-ԲՈՒՍԻ ձեռքով: Այդ չքնաղ Զեռագիրը, Պիքլիսի Ամրուող Վանքին սեփականութիւնն էր, եւ ես 1900ի Մայիս ամսուն մէջ քննած եմ զայն եւ ձեռքովս օրինակած եմ՝ ատոր այս քանիզին Յիշատակարանը եւ իրատարակած իմ ԾՈՎՔ ամուն գրքոյին մէջ (էջ 49):

«Գրեցաւ յիշատակարանս Քաջին Վարդանայ եւ Սրբոց Ընկերաց իւրոց եւ Սուրբ Քահանայից եւ Աչակերտաց նոցուն, եւ Նախարարացն Հայոց, որք նահատակութեամբ եւ հեղմամբ արեան իւրեանց հերքեալ կործանեցին զզրադաշտական մոլորութիւնն եւ եղեն վկայք Քրիստոսի Աստուծոյ, որոց աղաւթիւք եւ բարեխուսութեամբ ողորմեսցի Քրիստոս Աստուծած՝ ՀՕՐ ՍԱՄՍՈՒԵԼԻ, որ զննարեալ աւրինակս չնորհեաց եւ բազում սատար եղեւ գրոյս:

«Եւ ես անպիտան եւ վերջին ի գրչաց ՅԱԿՈՎՅՈՒ մեծաւ փափականաւք եւ սրտաշան աշխատութեամբ ըստ կարի իմոյ գրեցի եւ կատարեցի զսա աւզնականութեամբ եւ չնորհաւք Սուրբ Հոգևոյն: Վասն որոց աղաւեմ զամենեսեան, յիշեսչիք զգծորոյ, որ բազում մեղաւք վիրաւորեալ եմ ի սատանայէ, եւ արտասոււաք պազատիմ ամենեցուն, ողորմեցարուք ինձ բանիւ առ Աստուծած, յիշելով զծնողս իմ եւ գեղբարերիկն իմ, որ սակաւ ժամանակաւ յառաջ ի մահ կոչեցաւ ի Տեառնէ, եւ բարեխուսութեամբ այս Սրբոյս եւ ամենայն Սրբոց ողորմեսցի Քրիստոս Աստուծած մեզ եւ ամենեցուն առ հասարակ ի գալստեան իւրում. Ամէն:

«Ի թուականն Հայոց ՇՀԹ, ի բռնակալութիւնն Փռանգաց կոմսին ձաւլնին: Բայց գրեցաւ ի Գաւառս ՏԼՈՒՔ կոչեցեալ, ի Վանքո ՊԱՒՂՈՍԻ, ընդ Հովանեաւ ՍՈՒՐԲ ԶԱՒՐԱՎԱՐԻՍ եւ Առաջնորդութեանն Սուրբ Հաւրն ՍԱՄՍՈՒԵԼԻ»:

ՄԱՏԵՆԱԳՐՈՒԹԻՒՆ

Մ. ԽՈՐ. — Մովսէսի Խորենացւոյ Պատմութիւն Հայոց. տպ. 1881, Վենետիկ. ի Վանս Միկթարեանց:

Փ. ԲՈՒԶ. — Փաւստոսի Բուզանդացւոյ Պատմութիւն Հայոց, ի Զորս Դպրութիւնն. Երրորդ Տպագրութիւն, 1914. Վենետիկ, ի Տպարանի Սրբոյն Հազարու:

Ղ. ՓԱՐՊ. — Ղազարայ Փարպեցւոյ Պատմութիւն Հայոց եւ թուղթ առ Վահան Մամիկոնեան, Երրորդ Տպագրութիւն. 1891. Վենետիկ. ի Վանս Սրբոյն Ղազարու:

ԵՂԻՇԵ — Սրբոյ Հօրն Մերոյ Եղիշէի Վարդապետի Մատենադրութիւնք, ըստ Ընտրելագոյն ընթերցուածոց դրչագրաց. տպ. 1859, Վենետիկ. ի Տպարանի Սրբոյն Ղազարու:

ԿՈՐԻԻՆ — Կորին, Պատմութիւն Վարուց եւ մահուան Սրբոյն Մեսրոպայ Վարդապետի Մերոյ Թարգմանչի. տպ. 1894, Վենետիկ, Սուրբ Ղազար:

ԶԱՄՉԵԱՆ — Պատմութիւն Հայոց, ի սկզբանէ աշխարհի մինչեւ ցամն Տեառն, 1874. յերիս հատորս, ի Հայր Միհայէլ Վկաչ. Զմէշեանց, եւն. տպ. 1784-86. Վենետիկ. ի Տպարանի Յովհաննու Փիացեանց:

ՏԵՂԱԳԻՐ — Տեղաղիր Հայոց Մեծաց, Հ. Ղ. Վ. Ալիշանեանի, տպ. Վենետիկ, 1855, ի Ս. Ղազար:

ՑՈՒՇԻԿԻ — Հայրենեաց Հայոց ի Հ. Ղեւոնէ Մ. Ալիշան. Հատոր Ա. տպ. 1869. ի Ս. Ղազար Վենետիկոյ:

ԵՂԻՇԵ, ՔԱՅ. Ուսմ. — Եղիշէ, Քննական Ուսումնասիրութիւն, զբեց Բարգէն Մ. Վ. Կիւէսէրեան ի Դպրեվանուց. տպ. 1909, Վիեննա, Միկթարեան Տպարան:

ՄԻԲ. ՓՈՐԹ. — Եղիշէի Վարդապետի վասն Վարդանայ եւ Հայոց Պատմութիւնք եւ Բննադատութիւնք Միքայէլ Փաշարի Փորթուգալ. տպ. 1903. Վենետիկ, ի Տպարանի Սուրբ Ղազարու:

ԱՆԴԻԿԻ. — Հ. Ն. Անդրիկեան. Բիւզանդիոնի Մամբկոնեան-ները. տպ. 1904. Վենետիկ, Սուրբ Ղաղար:

ԿԻՊՈԾՆ — The History of the Decline and Fall of the Roman Empire, by EDWARD GIBBON, Esq. with notes, by the Rev. H. H. Milman, a new edition. in five volumes. Philadelphia: Porter & Coates, 1880.

ՄՈՄՍԵՆ — The History of Rome, by THEODOR MOMMSEN, translated by William P. Dickson, D. D., The Popular Edition, (in four volumes). London, Richard Bentley & Son. 1881.



ԲԱԲԳԻՆ ՍՐԲԱԶԱՆԻՆ ԳՈՐԾԵՐԸ

Ա.

ՈՒՍՈՒՄՆԱՍԻՐՈՒԹԻՒՆՆԵՐ

- 1.— Կիլիկիյ, Տպ. Թիֆլիս, 1896: էջ 40:
- 2.— Շովար, ՏԼՈՒՔ, ՀՐՈՄԿԱՅ, Տպ. Վիեննա. 1904: էջ 127:
- 3.— ԿՈԼՈՏ ՅՈՎՃԱՆՆԵՍ ՊԱՏՐԻԱՐՔ, Տպ. Վիեննա. 1904: էջ 235:
- 4.— ԵՂԻՇՔ. ՔՆՆԱԿԱՆ ՈՒՍՈՒՄՆԱՍԻՐՈՒԹԻՒՆ, Պակուած Յովկի-իզմիրեանց մրցանակով. Տպ. Վիեննա. 1908: էջ 464:
- 5.— ՀԱՅԱՍՏԱՆՆԵԱՅՅ ԵԿԵՂԵՑՅԻՆ ՀԻՆԳԵՐՈՐԴ ԴԱՐՈՒ ՄԷՅ, Տպ. Կ. Պոլիս. 1912: էջ 118:
- 6.— ՔԱՅՆ-ՎԱՐԴԱՆ, Կենսագրութիւն Հայոց Մեծ Սպարապետ ՎԱՐԴԱՆ ՄԱՄԻԿՈՆՆԵԱՆԻ, Պում. Վարդանանց Պատերազմին եւ Ռւսումնասիրութիւնն. Տպ. Պոստոն. 1920: էջ 176:

Բ.

ԵԿԵՂԵՑԱԿԱՆ ԳՈՐԾԵՐ

- 7.— ԺՈՂՈՎՈՒՐԴԻՆ ՏՕՆԱՑՈՅՑ, Տպ. Կ. Պոլիս. 1901: էջ 86:
- 8.— ՄԻՒՆԱՃԱԹ. Ալօրագիրք մը յառկապէս պատրաստուած քուրքերէն խօսող Հայոց համար: Գ. թպ. Կ. Պոլիս: էջ 327:
- 9.— ՔԱՐՈԶՆԵՐ, Ա. Հատոր, տպ. Կ. Պոլիս, 1904: էջ 403:

Գ.

ՀՐԱՏԱՐԱԿՈՒԹԻՒՆՔ

- 10.— ԼՈՅՍ, Շաբարարերք Եկեղեցագիտական. Տպ. Կ. Պոլիս, Ա. Տարի, 1905. էջ 1260: Բ. Տարի, 1906, էջ 1248:


11.- ՅԻՇԱՏԱԿՈՐԱՆ Պատմանեան Գրիգոր Պատրիարքի, Յառա-
շաբան և Բնագիր, Տպ. Փարիզ: էջ 153:

12.- ԽՈՐԵՆ ՊԱՏՐԻԱՐՔԻ (Աշբիւնան) գրած Ժամանակակից
Պատմութիւնը, իր Պատրիարքութենէ հրաժարումէն
ետք, Տպ. Կ. Պոլիս., որ դժբախտաբար այրեցաւ
բոլորովին Տէր Ներսէսեան Նղբարց Տպարանին հրդե-
հի ատեն, եւ միայն օրինակ մը պրծաւ:

Դ.

ՀՐԱՏԱՐԱԿԵԼԻ

- ՄԱՅՐ ՑՈՒՑԱԿ Կ. Պոլսի Ազգային Մատենադարանի 300-ի
մօւ հայերէն ձեռագիրներուն:
- ՄԱՅՐ ՑՈՒՑԱԿ Անկիւրիոյ Կարմիր Վանքի 300-է աւելի հա-
յերէն ձեռագիրներուն:
- ՊԱՏՄՈՒԹԻՒՆ ԱՆԿԻՒՐԻՈՅ:
- ՀԱՅԱՍՏԱՆԵԱՑ ԵԿԵՂԵՑԻ, Դասեր Աւետարանէն:
- ՕՐՄԱՆԵԱՆ ՄՐԲԱԶԱՆ, Կենսագրական Վերլուծումներ:



102.

3204

2017

